

# TUTÚ NÍ CADÚHA TĒ PĀBLŪ QUIHI<sup>n</sup> NDAHA ÑÁYIU ÑUÚ RÒMÁ

*Té Pāblū cādūha-dé tutú quihí<sup>n</sup> ndaha ñáyiū xñndecu ichi Xítóhó Jesucristú ndécú ñuú Rómá*

<sup>1</sup> Yúhú té Pāblū xínú cuèchi-í núú Xítóhó Jesucristú, chi mee Yă Ndiöxí ní cachí-gá sá cùu-í ñ<sup>n</sup> tée cáhá<sup>n</sup> tnúhu-gá núú ñáyiū, te tnúhu-gá cùu-xí tnúhu sá cáhá<sup>n</sup> nàcuáa naníhí tàhú-ó, núu ñu-gá ní tendaha ñàha-gá xii-í xícá cùu-í cáhá<sup>n</sup>-í tnúhu-gá.

<sup>2</sup> Te ndée şanaha ñí cachí Yă Ndiöxí sá dàcuítíí sàá nduu ngñndecu ndíhi ñáyiū tnúhu-gá. Te duca<sup>n</sup> ñí xáha<sup>n</sup>-gă xii cue tée ní cáhá<sup>n</sup> tnúhu-gá dàvâ-án ñí chídó tnùní-güedé núú tütú-gá.

<sup>3</sup> Te tnúhu-gá sá cáhá<sup>n</sup>-í-a cáhá<sup>n</sup>-xi ñu-ni cuendá Xítóhó Jesucristú Yaá cùú Dêhe-gá. Te Dêhe-gá-án cùú-gă ñ<sup>n</sup> ñáyiū, te cùu-gá ñaní tnáhá ndíi Dàvií.

<sup>4</sup> Te cùu-gá Yaá ñá túú tnàhí cuèchi-xi. Te ní xíhí-gá te ní ndoto-gá, te xíă<sup>n</sup> cútñuní iní-ó sã cùú-gă Dêhe Yă Ndiöxí, te ío cànñu cuu-gá.

<sup>5</sup> Te ñu-ni Xítóhó Jesucristú ní quide-gá ní nduu táhù-í núú Yă Ndiöxí sá cáhá<sup>n</sup>-í tnúhu-gá núú cuè ñáyiū ñuyíú-a cuendá quíndáá iní-yu tnúhu-gá te canchicú<sup>n</sup> nihnú-yu cadá-yu nchaa nàcuáa cáhá<sup>n</sup>-xi, te duca<sup>n</sup> ño cuu cànñu-gá.

<sup>6</sup> Te tnàhá nchòhó cùú-ndó ñáyiū sa nchícú<sup>n</sup> nihnu quide-ndo nchaa nacuáa cáhá<sup>n</sup> tnúhu-án, chi ní

cachí Yă Ndiõxí sá nchòhó tnahá tnúhu-ndo ndìhi Xítóhó Jesucrìstú.

<sup>7</sup> Te nchòhó ñáyiú xĩndecu ñuú Ròmá, ñáyiú ío cùu iní ñáhá Yă Ndiõxí, càdúha-í tutú-a daquìxi-í ndaha-ndo. Te ñu-ñi nchòhó cúú-ndó cuè ñáyiú ní cachí Yă Ndiõxí cada ndáá cundecu-ndo núú-gă. Te xìcá<sup>n</sup> táhù-í núú Tătá-ó Dǔtú Ndiõxí ndìhi núú Xítóhó Jesucrìstú sá ío na chĩndee chitúu ñaha-gă xii-ndo, te duca<sup>n</sup> ndì nduú-gá ná càda te ío váha cuu iní-ndó cundecu-ndo.

*Té Păblú cuìní-dé quíhí<sup>n</sup> ngoto-dé cue ñáyiú xĩndecu ichi Xítóhó Jesucrìstú ndécú ñuú Ròmá*

<sup>8</sup> Te díhna nuu-gă càchí tnúhu-í xii-ndo sã ío ndàcá<sup>n</sup> táhù-í núú Yă Ndiõxí cuèndá sá ío sàndáá iní-ndó-gă, te nchaa ñáyiú ñihí-yu tnúhu sá dúcá<sup>n</sup> quide-ndo. Te Xítóhó Jesucrìstú dáyăha-gá nchaa tnúhu càhá<sup>n</sup>-í núú Yă Ndiõxí.

<sup>9</sup> Te ndì tnahá òré càhá<sup>n</sup> ndìhi-í Yă Ndiõxí duca<sup>n</sup>-ñi xìcá<sup>n</sup> táhù-í núú-gă cuèndá-ndó, te mee-gă náhá-gă sá càhá<sup>n</sup> ndáá-í, te ñu-ñi núú-gă xínú cuèchi-í ñi yùhu ñi iní-í, chi càhá<sup>n</sup>-í nàcuáa ní quide Déhe-gá Xítóhó Jesucrìstú cuèndá naníhí tàhù-ó.

<sup>10</sup> Te xìcá<sup>n</sup> táhù-í núú Yă Ndiõxí sá ñuú mee-gă ná càchí te sáá ñ<sup>n</sup> nduu quìxi coto ñaha-í xii-ndo.

<sup>11</sup> Chi ío cuìní-í cundecu ndìhi ñaha-í xii-ndo dànehé ñáhà-í ñ<sup>n</sup> úú tnúhu nàcuáa ío-gá chĩndee ñàha Espíritú Yă Ndiõxí xii-ndo, te duca<sup>n</sup> ío-gá cuita nducu ndèe-ndo cada-ndo nchaa nàcuáa cuìní-gá.

<sup>12</sup> Te ío chí ná cuăha tnàha-o tnúhu ndee iní cundecu-o ichi-gá, chi nchòhó ndìhi yúhú ío sàndáá iní-ó-gă.

13 Te nchòhó ñáyiú ndècu ndihí-í ichi Xítóhó Jesucristú na cächí tnúhu-í xii-ndo sã dúcá<sup>n</sup>-ní ïo sàni iní-í quixi coto ñaha-í xii-ndo. Te cuìní-í sá òré quixi coto ñaha-í xii-ndo, te vá cuíta chiú<sup>n</sup> quixi-í dàtná quidè-í òré sãngoto-í nchaa ñáyiú dava-gá ñuú ñá túú xíta chiú<sup>n</sup>-í chi ío váha sàhúu<sup>n</sup>-yu tnúhu càhá<sup>n</sup>-í, dico ñá ndácù-í quixi-í quixi coto ñaha-í xii-ndo.

14 Te yúhú yídíqui-í cáhá<sup>n</sup>-í tnúhu Xítóhó Jesucristú núú nchàa ñáyiú cáhá<sup>n</sup> tnúhu griégú, ndihí núú nchàa ñáyiú cáhá<sup>n</sup> dava-gá núú tnúhu, ndihí núú nchàa ñáyiú túha, ndihí núú nchàa ñáyiú ñá túú tũha.

15 Te cuëndá sá dúhá yídíqui-í cáhá<sup>n</sup>-í tnúhu-gá, xiã<sup>n</sup> ío cuìní-í danèhé ñáhà-í xii nchaa nchòhó ñáyiú ñuú Ròmá nàcuáa ndùu tnúhu sá cáhá<sup>n</sup> nàcuáa naníhí tàhú-ó.

### *Ío cùnuu tnúhu Xítóhó Jesucristú*

16 Te yúhú ñá túú tnàhí cùcaha<sup>n</sup> núú-í cáhá<sup>n</sup>-í tnúhu Xítóhó Jesucristú, chi cùu-xi tnúhu ío cùnuu, chi Yá Ndiõxí ní cachí-gá sá ncháá ñáyiú na quindáá iní-xi tnúhu-á<sup>n</sup> te naníhí tàhú-yu. Te ní cachí-gá sá dñnanuu-gã ñáyiú isràél ngúndecu ndihí-yu tnúhu-á<sup>n</sup> te dàtnùní ngúndecu ndihí ñáyiú ñá túú cùu ñáyiú isràél.

17 Te tnúhu-á<sup>n</sup> dánèhé ñáhá-xí xii-o sá cúdiú-o núú Yá Ndiõxí te núu mee-ni sã quindáá iní-ó-gã dàtná cáhá<sup>n</sup>-xi núú tütú-gá núú cächí-xi: “Nchaa ñáyiú sàndáá iní ñáhá xii Yá Ndiõxí cúdiú-yu núú-gã, te ndècu ndihí ñahá-yu xii-gá”, duha cächí-xi núú tütú-gá.

*Nchaa ñáyiú ndècu ñuyú ndècuéchi-yu*

18 Te ndéé andiü tëndaha Yá Ndiöxí sá ùhú quixi sá cúú-xí nchàa ñáyiü ñá túú quide ndáá núú-gã, ñáyiü quide nchaa sá cuèhé sá dúhá. Te cuendá nchaa sá quidě-yu-á<sup>n</sup> xíá<sup>n</sup> ñá túú cuini-yu tñí-yu tñúhu ndáá tñúhu Yá Ndiöxí cuendá cuu-xi ñ<sup>n</sup> sá vãha sá cúú-xí-yu.

19 Te cuëi duca<sup>n</sup> quidé-yu dico cùtnuní ndáá iní-yu nàcuáa ndùu sá sání iní Yã Ndiöxí ndihí nàcuáa ndùu sá quidé-gã dàtná cùtnuní iní nchaa dava-gá-yu, chi ñiü-gá dánèhé ñáhá-gã xií-yu.

20 Te ni vã ndácú-ó quini-ó ñása càa-gá, te ni vã ndácú-ó quini-ó ñása càa iní-gá, te ni vã ndácú-ó quini-ó ñása quide-gá táxi tñuni-gá nchaa nduu nchaa quíú. Te cuëi duca<sup>n</sup> dico ndéé cùtnàhá ní ngáva ñuyíú ñí ngúita nchaa ñáyiü tècú tñuní váha-yu nàcuáa ndùu sá sání iní-gá ndihí nàcuáa ndùu sá quidé-gã te duca<sup>n</sup> tècú tñuní-yu cuendá nchaa sá ñí cadúha-gá ndéhé-yu ío ñuyíú-a, núu xíá<sup>n</sup> vá càchí-yu sá ñà túú cuëchi-yu.

21 Te cuëi duca<sup>n</sup> ñí cutnùní iní-yu cuendá Yã Ndiöxí dico ñá túú cuini-yu canehé-yu sá yíñùhu núú-gã nàcuáa tàú-xi cunduu. Te ni ñà túú cuini-yu ndacá<sup>n</sup> táhü-yu núú-gã cuendá nchaa sá vãha quide ñaha-gá xií-yu, chi mee-ni nchàa sá ñà túú vëdana nàndíhi ñùhu iní-yu. Te quidé-yu dàtná quidé ñ<sup>n</sup> ñáyiü ñá túú ndècu ndihí nchaa sá xini tñuní-xi. Te uu<sup>n</sup>-gá uu<sup>n</sup>-gá tá quidé-yu cuáhá<sup>n</sup>.

22 Te càchí-yu sá cúü-yu ñáyiü ío váha sàá sá xini tñuní-xi dico ñá ndáá, chi cùú-yu ñáyiü ío ñí ñíquí-xi.

23 Te ñá túú cuini-yu cáhá<sup>n</sup>-yu sá ío càhnu cuu Yá Ndiöxí Yaá ndécú nchàa nduu nchaa quíú, chi da

nchaa sá nĩ cadúha mée-yu quide cahnú-yu. Te ní cadúha-yu nchaa sá nàhá ñáyiu ñá túú cùdíi ndècu ñuyíú-a. Te ní cadúha-yu sá nàhá quitì ndàva, ndihì sá nàhá quitì sàcuíta ñuhu mee-xi, ndihì sá nàhá nchaa dava-gá quitì, nchaa xíá<sup>n</sup> quidé cahnú-yu.

24 Te xíá<sup>n</sup> nũu ní dáñá Yă Ndiöxí quidě-yu nchaa sá cuèhé sá dúhá sàni iní-yu. Te xíá<sup>n</sup> ío quide ndihì tnahá-yu sá cuèhé sá dúhá sàcúú-xí yìqui cuñú-yu.

25 Te duca<sup>n</sup> quidé-yu chi ñá túú sàndáá iní-yu tnúhu ndáá tnúhu Yă Ndiöxí. Te mee-ni tnũhu ndehnde sàndáá iní-yu, te nèhé-yu sá yíñùhu núú dàva sá nĩ cadúha-gá ío ñuyíú-a ndihì dava sá ndèé andiú te quide cahnú-yu, te ñá túú cächí-yu sá mée-gă ío cahnú cuu-gá, dico mee-gă xíní ñùhu-xi cáhá<sup>n</sup>-yu sá ío cahnú cuu-gá ni caa ni quíhí<sup>n</sup>. Te ndáá ndisa sá ío cahnú cuu-gá.

26 Te sá dúcá<sup>n</sup> ñà túú quide váha-yu núu xíá<sup>n</sup> ní dáñá-nă Yă Ndiöxí quidě-yu nchaa sá cuèhé sá dúhá sàni iní mée-yu. Te dava ñáyiu dìhí cáhá<sup>n</sup> ndihì tnahá-yu ndi mée dìhí-yu te ñá túú quidé-yu nàcuáa ní nduu táhũ-yu cadá-yu.

27 Te diu-ni duca<sup>n</sup> xíquide dava cue tée chi sàni cuehé sání dùha iní-güedé sá cúú-xí yìqui cuñú-güedé ndi mée tnaha tée-güedé, chi cáhá<sup>n</sup> ndihì tnaha ndi mee-güedé te ñá túú quide-güedé nàcuáa ní nduu táhú-güedé cada-güedé, te sá dúcá<sup>n</sup> quide-güedé te ñá túú tnàhí cùu váha iní-güedé ndécú-güedé, te duca<sup>n</sup> tnàhí tàù-xi ndoho-güedé cundecu-güedé.

28 Te ñá túú tnàhí ñùhu iní-yu Yă Ndiöxí nũu xíá<sup>n</sup> duu<sup>n</sup> duu<sup>n</sup> ní dáñá ñìhnu ñaha-gá xíí-yu sàni

cuehé sání dùha iní-yu, te quidé-yu nchaa sá ñà túú tàú-yu cadá-yu.

29 Te nchaa núú sá cuehé sá dúhá cùnuu quidé-yu. Te cue tée càhá<sup>n</sup> ndihí-güedé ñáyiú dñí te ñá díú ñàdihí-güedé cúŷ-yu. Te diu-ni duca<sup>n</sup> xĩquide cue ñáyiú dñí chi càhá<sup>n</sup> ndihí-yu cue tée te ñá díú yĩ-yu cùu-güedé. Te mee-ni sá ñà túú vãha quidé-yu sá cúú-xí tnàha ñáyiú-yu, te xihó-yu cundecu ndihí-yu sá ndécú ndihí dava-gá tnàha ñáyiú-yu, te ío sàni cuehé sání dùha iní-yu sá cúú-xí tnàha ñáyiú-yu, te ío cuédú ínŷ-yu, te sàhni tnahá-yu, te ío plètú-yu, te dándahú tnáhã-yu, te cùu úhú iní-yu cue tnàha ñáyiú-yu, te ío yiti yùhú-yu.

30 Te càhá<sup>n</sup> cuehé-yu cuendá nchaa dava-gá tnàha ñáyiú-yu, te cùu úhú iní-yu Yá Ndiõxí, te xio xio cuíní-yu cunuu tnúhu-yu, te mee-ni sàni iní-yu sá ío vãha cunduú-yu, te ío quide cahnú-yu mée-yu, te ío sàni iní-yu sá cadá ŷhú-yu tnàha ñáyiú-yu, te ñá túú sàndáá iní-yu ni tãtä-yu ni nãñã-yu.

31 Te ñá túú tècú tnùní-yu sá vãha, te ñá túú quidé-yu ñ<sup>n</sup> sá càhá<sup>n</sup>-yu, te ñá túú cùu iní-yu ni ñáyiú cùu ndi meé-yu, te ni dãva-gá tnàha ñáyiú-yu, te ñá túú quide cahnu iní-yu ñ<sup>n</sup> sá cúmãní núú tnáhã-yu, te ni ñà túú cùndahú iní-yu tnàha ñáyiú-yu.

32 Te Yá Ndiõxí ní cachí-gá sá ncháá ñáyiú duca<sup>n</sup> xĩquide quihí<sup>n</sup>-yu núú ùhú núú ndàhú. Te xìní-yu sá Yã Ndiõxí daquihí<sup>n</sup> ñáhã-gã xií-yu núú ùhú núú ndàhú sá dúcã<sup>n</sup> quidé-yu, dico uu<sup>n</sup>-gá quidẽ-yu chi vãha-gá cúú iní-yu cue ñáyiú quide datná quidé mée-yu.

## 2

*Yá Ndiõxí cada ndáá-gá cuéchi nchaa ñáyi ndècu ñuyú*

<sup>1</sup> Te nchòhó ñáyi cächí sá ïo ndècu cuéchi dava-gá ñáyi tnàhá-ndó ïo ndècu cuéchi-ndo cuéi nágá ñáyi cùu-ndo, chi tnàhá-ndó quide-ni-ndo nchaa nacuáa quide dava-gá ñáyi cächí-ndó ndècu cuéchi-xi, te sá dúcá<sup>n</sup> càhá<sup>n</sup>-ndó sã ndécú cuéchi ñáyi-á<sup>n</sup> te dàcaa-ndo cuéchi díquí-ndó chi tnàhá-ndó quide-ndo datná quidě-yu.

<sup>2</sup> Te nchoo xìní-ó sã Yă Ndiõxí ío váha cùtnuní iní-gá nàcuáa cada ndáá-gá cuéchi ì<sup>n</sup> ì<sup>n</sup> nchoo ñáyi ndècu ñuyú-a, chi daquihí<sup>n</sup>-gá nchaa ñáyi quide nacuáa ní cáhá<sup>n</sup>-í núú ùhú núú ndàhú.

<sup>3</sup> Te nchòhó ñáyi ì<sup>n</sup>-ni quide ndihí ñáyi cächí méé-ndó sã ndécú cuéchi-xi dacuitíí sã ná cháhu-ndo núú Yă Ndiõxí sá dúcá<sup>n</sup> quide-ndo.

<sup>4</sup> Te ñá túú cùu váha iní-ndó sã Yă Ndiõxí cùndàhú iní ñáhá-gã xii-ndo, te ni ñà túú cùu váha iní-ndó sã ïo cuíní-gá cada càhnu iní-gá nchaa sá ñà túú vãha quide-ndo, te ni ñà túú quide cuendá-ndó sã Yă Ndiõxí quidé vãha ñaha-gã xii-ndo cuendá cuíní-gá sá nchòhó ndixi túu iní-ndó sã ñà túú quide váha-ndo ndècu-ndo.

<sup>5</sup> Te nchòhó cúú-ndó ñáyi ío sàá iní-xi, chi ñá túú cuíní-ndó ndixi túu iní-ndó sã ñà túú quide váha-ndo ndècu-ndo, te xíã<sup>n</sup> núu ío-gá tá cùu vai tnúndòho sá cúú-xí-ndó. Te na sàá nduu tnúhu ndòho tnúhu ndàhú te ío ndoho-ndo, chi Yá Ndiõxí cada ndáá-gá nàcuáa ndùu cuéchi-ndo.

<sup>6</sup> Te dàvá-á<sup>n</sup> cada ndáá Yă Ndiõxí nchaa nàcuáa ndùu nchaa sá ñí quide ì<sup>n</sup> ì<sup>n</sup> ñáyi ndècu ñuyú-a.

7 Te nchaa ñáyiú nchìcú<sup>n</sup> nihnu-ni quìde mee-ni sá vâha, ñáyiú-á<sup>n</sup> nduu táhũ-yu cundecú-yu ndihì Yá Ndiõxí ñi caa ñi quíhí<sup>n</sup>, te duca<sup>n</sup> quìde váha-yu chi cuìní-yu sá Yá Ndiõxí cuu váha iní ñáhá-gă xii-yu, te cuìní tucú-yu nduu táhũ-yu núú ïo váha càa ndecu Yá Ndiõxí cundecú-yu ñi caa ñi quíhí<sup>n</sup>.

8 Te ío cùdéé<sup>n</sup>-gă núú nchàa ñáyiú ñũhu iní mee-ni sã cúú-xí mèe-xi, te ñá túú sàndáá iní-yu tnúhu ndáá chi mee-ni sã cuèhé sá dúhá quìdé-yu.

9 Te nchaa ñáyiú duca<sup>n</sup> xĩquide ío ndíhú iní-yu. Te díhna-gă ñáyiú isràél ngüíta-xi ndohó-yu, te dătnùní ngüíta-xi ndoho nchaa ñáyiú ñá túú cùu ñáyiú isràél.

10 Te nchaa ñáyiú ní quìde váha, te Yá Ndiõxí cada-gă te ngúndecú-yu núú ïo váha càa ndecu-gă, te cachí-gă sá ñi quìde váha-yu, te ío váha cuu iní-yu cundecú-yu. Te díhna-gă ñáyiú isràél ñáyiú ní quìde váha duca<sup>n</sup> càda ñaha-gă xii-yu, te dătnùní duca<sup>n</sup> càda ñaha-gă xii ñáyiú ñá túú cùu ñáyiú isràél ñáyiú ní quìde váha.

11 Te ñá túú quìde cuendá-gă cuèi náí ñáyiú cùú-yu.

12 Te nchaa ñáyiú ndècu ndihì nchaa tnúhu ní chídó tnùní ndíi Moisés, Yá Ndiõxí cada ndáá-gă cuéchi-yu nàcuáa càhá<sup>n</sup> nchaa tnúhu-á<sup>n</sup>. Te nchaa ñáyiú ñá túú ndècu ndihì tnúhu ní chídó tnùní ndíi-á<sup>n</sup>, Yá Ndiõxí vá cádá ndáá-gă cuéchi-yu nàcuáa càhá<sup>n</sup> nchaa tnúhu-á<sup>n</sup>. Dico nchaa ñáyiú quìde nándi sá cuèhé sá dúhá dàcuítíi cuíta ni-hnú-yu cuèi ndècu ndihí-yu tnúhu ní chídó tnùní ndíi Moisés àdi ñá túú ndècu ndihí-yu.



13 Te nchaa ñáyiú dicó-ni sàcúndedóho nchaa tnúhu ní cáhá<sup>n</sup> ndíi Moisés te ñá túú tní<sup>ñ</sup>-yu, ñáyiú-á<sup>n</sup> ñà túú cùdú<sup>ñ</sup>-yu núú Yá Ndiöxí, dico nchaa ñáyiú tní<sup>ñ</sup> nchaa tnúhu ní cáhá<sup>n</sup> ndíi, ñáyiú-á<sup>n</sup> càchí Yá Ndiöxí sá cùdú<sup>ñ</sup>-yu núú-gă, chi ñá túú-gă cuéchi-yu ndècu núú-gă.

14 Te nchaa ñáyiú ñá túú ndècu ndíhi tnúhu ní chídó tnùní ndíi Moisés, te núú quidé-yu nchaa nàcuáa ní cáhá<sup>n</sup> ndíi te cùu-xi ñ<sup>n</sup> sá sání tnàhí iní méě-yu cadá-yu, te sá sání ìní-yu-á<sup>n</sup> cúú-xi ñ<sup>n</sup> tnúhu váha sá sánú ìchi ñaha xií-yu nàcuáa cada váha-yu cundecú-yu.

15 Te sá dúcá<sup>n</sup> quidé-yu xiă<sup>n</sup> cùtnùní sá sání ìní-yu dàtná càhá<sup>n</sup> tnúhu ní chídó tnùní ndíi Moisés cada ñáyiú isràèl, te ïo váha cùtnùní iní-yu nchaa nàcuáa quidé-yu chi ndixi túú iní-yu òré ñá túú quide váha-yu.

16 Te sáa nduu te Yá Ndiöxí cùñaha-gă xii Xítóhó Jesucristú cada ndáá-gá nchaa cuéchi ñáyiú, nchaa sá sání iní méě-yu ndùu yuhu, te cada-gá dàtná càhá<sup>n</sup> tnúhu sá sánú ìchi ñaha xii-o nacuáa naníhí tàhú-ó, tnúhu sá dánèhé ñàhà-í xii-ndo.

*Cuèndá ñáyiú isràèl ndíhi cuèndá nchaa tnúhu ní chídó tnùní ndíi Moisés*

17 Te nchòhó ñáyiú isràèl nchaa-ndo cùu-ndo ndí mee-í, te càchí-ndó sã nchìcú<sup>n</sup> nihnu-ndo quide-ndo nchaa tnúhu ní cáhá<sup>n</sup> ndíi Moisés nũu xiă<sup>n</sup> ndécú vãha-ndo, te càchí-ndó sã ïo càhnu cuu-ndo sá ndécú ndíhi-ndo Yá Ndiöxí.

18 Te cùtnùní iní-ndó nchàa nacuáa cuení Yá Ndiöxí cada-ndo, te sá dúcá<sup>n</sup> nchìcú<sup>n</sup> nihnu-ndo quide-ndo nacuáa càhá<sup>n</sup> tnúhu-á<sup>n</sup> xiă<sup>n</sup> cùtnùní iní-ndó nchàa sá ïo-gá váha xìni ñuhu-xi cada-ndo.

19 Te cächí-ndó sǎ ǐo váha xìní-ndó cànuichi-ndo nchaa ñáiyu ñá túú cùtnuní iní-xi, te cächí tucu-ndo sǎ ǐo váha xìní-ndó nà canu ichi-ndo nchaa ñáiyu ndècu ichi cuehé ichi duha.

20 Te sànu ichi-ndo nchaa ñáiyu ǐo ñi ñíquí-xi, ndihí nchaa ñáiyu vitna ta tècú tnùní nchaa sá vǎha, te duca<sup>n</sup> quide-ndo chi ndècu ndihí-ndo nchaa tnúhu ní chídó tnùní ndíi Moisés, te tnúhu-án cúú-xí tnúhu ndáá, chi sànu ichi ñaha-xi xii-ndo nacuaá cada-ndo.

21 Te nchòhó dàcuaha-ndo ñáiyu nàcuáa cada-yu, te mee-ndo ñà túú dàcuaha-ndo cada-ndo nchaa nacuaá tàú-xi cunduu, te xǎha<sup>n</sup>-ndo xii-yu sá vǎ cúú dùhú-yu te mee-ndo dùhu-ndo.

22 Te dàcuaha-ndó-yu sá cuè téé vá cúú cǎhá<sup>n</sup> ndihí-güedé ñáiyu ñíhí te núu ñá díú ñàdihí-güedé cúú-yu, te duca<sup>n</sup>-ni cuè ñáiyu ñíhí, vá cúú cǎhá<sup>n</sup> ndihí-yu téé te núu ñá díú yí-yu cùu-güedé. Te nchaa sá xǎha<sup>n</sup>-ndo vǎ cúú càda ñáiyu te mee-ndo quide-ni-ndo, te xǎha<sup>n</sup>-ndo xii-yu sá vǎ cǎnèhé-yu sá yíñùhu núú nchàa sá cächí-yu cùu ndiòxí-yu, te mee-ndo nèhé-gá quidé-ndó, chi dùhu-ndo nchaa sá ndécú vèñúhu.

23 Te cächí-ndó sǎ ǐo cùnuu nchaa tnúhu ní chídó tnùní ndíi Moisés, te ñá túú quide-ndo nchaa nacuaá ní cǎhá<sup>n</sup> ndíi, te sá dúcá<sup>n</sup> quide-ndo-án te dàquee tíhú-ndó Yǎ Ndiòxí.

24 Te quèe ndáá-xi nàcuáa cǎhá<sup>n</sup>-xi núú tütú Yǎ Ndiòxí nàcuáa quide-ndo-án nùú cächí-xi sá ncháá ñáiyu ñá túú cùu ñáiyu isràél cǎhá<sup>n</sup> cuèhé-yu cuèndá Yǎ Ndiòxí sá cuèndá-ndó.

25 Te nchòhó ñáiyu isràél nchaa-ndo cùu-ndo ndi mee-í, te tnàhá-ndó ndècu ndihí-ndo seña ñi-ndo,

te váha-ni sá dúcá<sup>n</sup> te núu quide-ndo nchaa nacuáa ní cáhá<sup>n</sup> ndíi Moisés. Dico núu ñá túú quide-ndo nchaa nacuáa ní cáhá<sup>n</sup> ndíi ña, te ñá túú nándíhi-xi sá cúú-ndó ñáiyu israhél cuèi ndècu seña ñi-xi.

<sup>26</sup> Te nchaa ñáiyu ñá túú ndècu ndíhi seña ñi-xi, te núu quidé-yu nchaa nacuáa ní cáhá<sup>n</sup> ndíi Moisés, te cúú-yu dàtná cue ñáiyu ndècu ndíhi seña ñi-xi, chi quidé-yu nchaa nacuáa ní cáhá<sup>n</sup> ndíi.

<sup>27</sup> Te ñáiyu ñá túú ndècu ndíhi seña ñi-xi, te núu na càdá-yu nchaa nacuáa ní cáhá<sup>n</sup> ndíi Moisés, te ñáiyu-án cachí-yu sá ñà túú quide ndáa nchaa nchòhó ñáiyu ndècu ndíhi seña ñi-xi, chi ndècu ndíhi-ndo nchaa tnúhu ní chídó tnùní ndíi te ñá túú quide-ndo nacuáa cáhá<sup>n</sup> tnúhu-án.

<sup>28</sup> Te nchòhó ñáiyu israhél, ñáiyu nchìcú<sup>n</sup> ni-hnu-ni quide nchaa nacuáa ta quide tnahi-ndo véxi, ñá túú quide-ndo sá cúú-ndó ñáiyu israhél, te mee-ndo ndècu seña ñi-ndo dico ñá túú quide-ndo nacuáa tàú-xi cada nchaa ñáiyu ndècu seña ñi-xi, te mee-ni seña-án sàha-ndo ñi-ndo te ñá túú quide-ndo nacuáa cuìní Yá Ndiöxí cada-ndo.

<sup>29</sup> Te nchaa ñáiyu sàndáa ndisa iní-xi Yá Ndiöxí, ñáiyu-án cúú ndisá-yu ñáiyu israhél, te sa ní nduu ndoo ní nduu nine iní-yu chi Espiritú Yá Ndiöxí duca<sup>n</sup> ñi quide-xi, dico ñá díú sã sãha-yu seña ñi-yu dàtná ní cachí ndíi Moisés. Te ñáiyu-án cúú váha iní ñáhá Yá Ndiöxí xií-yu cuèi ñá túú cáhá<sup>n</sup> váha tnàha ñáiyú-yu cuèndá-yu.

### 3

<sup>1</sup> Te sá dúhá cáhá<sup>n</sup>-í te ió dava ñáiyu quesàhá-yu sá íí<sup>n</sup>-ní cùu ñáiyu ñá túú cùu ñáiyu israhél ndíhi

nchoo ñăyiu isràél, te quesaha tùcú-yu sá ìí<sup>n</sup>-ní quide tucu-xi cuéi na cuăha àdi vá cuăha sèñá ñí<sup>í</sup>-yu.

<sup>2</sup> Dico yúhú càchí-í sá ncháá ñăyiu isràél ío-gá cúnùú-yu, chi ío titní núú sã vãha ní quide ñaha Yã Ndiöxí xii-yu, chi ní sãñaha-gã tnúhu-gá ndécú ndìhí-yu.

<sup>3</sup> Te davá-yu ñá túú cuení-yu cada ndáá-yu, dico ñá díú sã xǎ<sup>n</sup> te cùyica iní Yã Ndiöxí ñá túú quide ndáá-gá.

<sup>4</sup> Dico ñáhá chi xini ñuhu-xi sá ncháá ñăyiu cada cuendá-yu sá Yã Ndiöxí cúú-gã Yaá quidé ndáá cuítì, te cuéi nchaá-yu na càchí-yu sá ñà túú quide ndáá-gá, dico mee-gã chi quide ndáá-ni-gá. Te núú tùtú-gá càhá<sup>n</sup>-xi nàcuáa ní xáha<sup>n</sup> ìí<sup>n</sup> tée ní xíndecu ndée sanaha xii-gá, te duha ní xáha<sup>n</sup>-dẽ:

Yòhó Dútú Ndiöxí, cùtnuní iní ñăyiu sá ìo ndáá càhá<sup>n</sup>-n,

te cùnunu nahi-ni tnúhu-n cuéi òré càchí ñăyiu sá ñà túú càhá<sup>n</sup> ndáá-n.

Duha ní xáha<sup>n</sup> tée ndée sanaha-ã<sup>n</sup> xii-gá càchí-xi núú tùtú-gá.

<sup>5</sup> Te cuendá nchaa sá cuèhé sá dúhá quide ñăyiu, xǎ<sup>n</sup> cútnuní iní-yu sá Yã Ndiöxí cúú-gã Yaá ío váha quide ndáá, chi mee-gã ñá túú dùca<sup>n</sup> quide-gá. Te cuéi duca<sup>n</sup> dico vá cání ìní-yu sá Yã Ndiöxí ñá túú quide ndáá-gá sá dándòho ñaha-gá xii-yu na sàa nduu, te núú duca<sup>n</sup> na càni iní-yu, te sàni iní-yu dàtná sání iní cue ñăyiu ñá túú ndècu ichi-gá.

<sup>6</sup> Te vá dúcá<sup>n</sup> càni iní-yu, chi núú Yá Ndiöxí ñá túú quide ndáá-gá ñá, te vá cúú càda ndáá-gá nchaa cuéchi cue ñăyiu ñuyíú-a te núú duca<sup>n</sup>.

<sup>7</sup> Te núu yúhú ná càni iní-í cáhá<sup>n</sup>-í ì<sup>n</sup> tnúhu ndehnde, te sá tnúhu-á<sup>n</sup> te cani tucu iní-í sá quidé càhnu-gá-í tnúhu ndáá tnúhu Yá Ndiõxí, te sá dúcá<sup>n</sup> ná cáhá<sup>n</sup>-í te cani tucu iní-í sá vǎ cúú cáhá<sup>n</sup> Yǎ Ndiõxí sá ndécú cuèchi-í.

<sup>8</sup> Te núu na càni tucu iní-í sá vǎha-gá cada-í nchaa sá cuèhé sá dúhá cuendá Yǎ Ndiõxí cada-gá sá vǎha, dico ñá ndáá. Te ío ñáyiu cáhá<sup>n</sup> cuèhé cuendá-í te cǎchí-yu sá díú-ní dùca<sup>n</sup> dacuaaha-í ñáyiu dico ñá ndáá sá dúcá<sup>n</sup> dǎnehé-í-yu, te ñáyiu-á<sup>n</sup> nacháhu-yu tnúhu cáhá<sup>n</sup>-yu, chi duca<sup>n</sup> tàú-xi cunduu.

*Nchaa ñáyiu ñuyúú-a ndècuéchi-yu*

<sup>9</sup> Te vitna cǎchí dava ñáyiu sá ïo-gá cúnùu nchoo cue ñáyiu isràél dǎcúúxí dǎva-gá ñáyiu, dico yúhú cǎchí-í sá ñǎhá, te sa ní cachí tnúhu ndáá-í xii-ndo sǎ nchaa ñáyiu ndècuéchi-yu cuèi ñáyiu isràél te cuèi ñáyiu ñá túú cùu ñáyiu isràél.

<sup>10</sup> Te núú tùtú Yǎ Ndiõxí cǎchí-xi:  
Vá yǎo ì<sup>n</sup> quide ndáá,

<sup>11</sup> te ni vá yǎo ì<sup>n</sup> tècú tnùní tnúhu váha,  
te ni vá yǎo ì<sup>n</sup> nǎnducu nihnu Yá Ndiõxí.

<sup>12</sup> Chi nchaá-yu ñá túú nchìcú<sup>n</sup> nihnú-yu ichi váha,  
te nchaá-yu cùú-yu ñáyiu xǐndecu neñúú sá cúú-xí Yǎ Ndiõxí.

Te ni ì<sup>n</sup>-yu ñá túú quidé-yu ì<sup>n</sup> sá vǎha.

<sup>13</sup> Te cada iní-ndó sǎ yúhǔ-yu cùu-xi datná cúú ì<sup>n</sup>  
yaú núú yǐndǔxi ndíyí núú ïo ndehe sáhá<sup>n</sup>,  
te duca<sup>n</sup> sǎtnahá-xi cùu yuhú-yu, chi ío cáhá<sup>n</sup>  
cuèhé-yu, te mee-ni dǎndahú-yu nchaa  
tnàha ñáyíú-yu.

Te cada iní-ndó sǎ vènenú cóó yíhí yùhú-yu chi mee-ni càhá<sup>n</sup> úhú-yu cuèndá tnàha ñáyíu-yu.

14 Te ió iní-yu càhá<sup>n</sup> úhú tnáhǎ-yu.

15 Te àú<sup>n</sup> nǎ cuu àú<sup>n</sup> nǎ xǐǎ<sup>n</sup> xǐsahni tnàhá-yu.

16 Te nchaa núú xícá cùú-yu quìde úhú iní-yu nchaa tnàha ñáyíu-yu nàcuáa ndìhú iní ñáyíu-á<sup>n</sup>.

17 Te ñá túú cuení-yu cundecu ndìhi tnàha váha-yu.

18 Te ñá túú sàni iní-yu canehé-yu sá yíñùhu núú Yǎ Ndiǒxí.

Duha quìdè-yu càchí-xi núú tütú-gá.

19 Te cùtnuní iní-ó sǎ nchàa tnúhu ní chídó tnùní ndíi Moisés cúú-xí cuèndá nchaa ñáyíu nchicú<sup>n</sup> nihnu nchaa tnúhu-á<sup>n</sup>. Te tnúhu-á<sup>n</sup> cúú-xí cuèndá sá vǎ yǒo tnàhí cachí sá ñà túú cuèchi-xi, te duca<sup>n</sup> te nchaandi túhú ñáyíu cutnùní iní-yu sá ná chǎhu-yu nchaa sá quídè-yu núú Yǎ Ndiǒxí.

20 Te duca<sup>n</sup> càda-xi chi ni ì<sup>n</sup> ñáyíu vá càchí-ó sǎ vǎ cùndècu cuèchi-yu núú Yǎ Ndiǒxí cuèndá-ni sá nchicú<sup>n</sup> nihnú-yu nchaa tnúhu sá ñí chídó tnùní ndíi Moisés, te tnúhu-á<sup>n</sup> càchí tnúhu-xi cuèndá-ni sá cùtnùní iní-ó sǎ ndécú-ó ìchi cuehé ichi duha.

*Te núu na quìndáá iní-ó Xìtohó Jesucristú te naníhí tàhú-ó*

21 Te vitna ní cutnùní iní-ó sǎ ñà díú sǎ cáda-ó nchàa nacuáa ní càhá<sup>n</sup> ndíi Moisés cudíu-o núú Yǎ Ndiǒxí, chi mee-gǎ quídè cùdíu-o núú-gǎ. Te núú tütú ndíi Moisés ndìhi núú tütú cue téé ní xóo càhá<sup>n</sup> tnúhu Yǎ Ndiǒxí ndéé sanaha càhá<sup>n</sup>-xi nàcuáa cada ñaha-gǎ xii-o vitna.

22 Te duca<sup>n</sup> cùdíu-o núú Yǎ Ndiǒxí te núu na quìndáá iní-ó Xìtohó Jesucristú. Te díu-ni duca<sup>n</sup> cùdíu nchaa ñáyíu ñuyíú te núu na quìndáá iní

ñáhă-yu xii-gá, chi #<sup>n</sup>-ni cùu-o nchaa-o sá cúú-xí Yă Ndiöxí.

23 Chi nchaa-yu ndècu cuéchi-yu, chi ñá ĩ<sup>n</sup>-yu quidé-yu nàcuáa cáhá<sup>n</sup> Yă Ndiöxí sá cúú-yu ñáyi u quède váha.

24 Dico Yá Ndiöxí ío váha iní-gá chi ní quide ñaha-gă xii-o ĩ<sup>n</sup> sá váha, chi òí-có-ni duca<sup>n</sup> ñí quide-gá nàcuáa vá cùndècu-gá cuéchi-o nũú-gă, chi Xítóhó Jesucristú ní sati níñí-gă te ní xíhí-gá, te duca<sup>n</sup> ñí yáha-gá cuendá sá vă cùndècu-gá cuéchi-o.

25 Te Yá Ndiöxí ní taxi ndecu-gá Xítóhó Jesucristú núú ñáyi u ñuyíú-a, te ní xíhí-gá sá cuendá nchaa yíca cuéchi-yu, te duca<sup>n</sup> ñí cuu cuendá sá ncháá ñáyi u na quíndáá iní ñáhá xii-gá te vá náchăhu-yu cuéchi-yu núú Yă Ndiöxí. Te Yá Ndiöxí ní quide ndee iní-gá nchaa sá cuèhé sá dúhá ñí quide cue ñáyi u ní xíndecu ndéé sanaha. Te xíá<sup>n</sup> ní xíhí Xítóhó Jesucristú cuendá cutnùní iní-ó să Yă Ndiöxí cúú-gă Yaá ío váha quide ndáá cuèi duca<sup>n</sup> ñí quide ndee iní-gá nchaa sá ñí quide cue ñáyi u-á<sup>n</sup>.

26 Núu xíá<sup>n</sup> vitna ní cutnùní ndisa iní-ó să quidé ndáá-gá, te quide-gá sá cuè ñáyi u vá cùndècu-gá cuéchi-yu núú-gă, te núu na quíndáá iní-yu Xítóhó Jesucristú.

27 Te vitna vá càchí-ó să ío càhnu cuu-o cuendá sá ñà túú-gă cuéchi-o ndècu núú Yă Ndiöxí, te duca<sup>n</sup> ñà túú-gă cuéchi-o ndècu núú-gă cuendá sá sàndáá iní-ó Xítóhó Jesucristú, te ñá díú să cuendá nchaa tnúhu ní cáhá<sup>n</sup> ndíi Moisés.

28 Te cutnùní iní-ó să nděda-ni càa ñáyi u vá cùndècu-gá cuéchi-yu núú Yă Ndiöxí te núu na quíndáá iní-yu Xítóhó Jesucristú cuèi ní quidé-yu

nchaa nàcuáa ní cáhá<sup>n</sup> ndíi Moisés àdi ñá túú ní quidé-yu.

<sup>29</sup> Te cùtnuní iní-ó sã Yă Ndiöxí cúú-gă Ndiöxí nchaandi túhú ñáyiu, te ñá díú mèe-ni Ndiöxí ñáyiu isràél cúú-gă.

<sup>30</sup> Te ñndii díí-gă cúú-gă Ndiöxí, te nchaa ñáyiu sàndáá iní ñáhá xii Xítóhó Jesucristú te vá cùndècu-gá cuéchi-yu núú Yă Ndiöxí cuèi cùú-yu ñáyiu isràél àdi ñá túú cùú-yu.

<sup>31</sup> Te ñá díú sã sàndáá iní-ó Xítóhó Jesucristú te cachí-ó sã ñà túú nàndíhi nchaa tnúhu sá sánú ìchi ñaha xii-o nacuáa cada-o, te ñáhá chi sá dúhá sàndáá iní-ó-gă te xíă<sup>n</sup> nchìcú<sup>n</sup> nihnu-o quide-o nacuáa càhá<sup>n</sup> tnúhu-á<sup>n</sup>.

## 4

### *Cuèndá ndíi Àbrahám*

<sup>1</sup> Te vitna na càchí tnúhu-í xii-ndo cuèndá ndíi Àbrahám téé ní cuu ñaní tnáhá-ó ñí xíndecu ndéé sanaha.

<sup>2</sup> Te ndíi-á<sup>n</sup> ñà túú ní xíndecu cuéchi ndíi núú Yă Ndiöxí, dico ñá díú cuèndá ñ<sup>n</sup> chiu<sup>n</sup> ní quide ndíi duca<sup>n</sup> ñà túú ní xíndecu cuéchi ndíi núú-gă. Chi núú cuèndá ñ<sup>n</sup> chiu<sup>n</sup> ní quide ndíi duca<sup>n</sup> ñà túú ní xíndecu cuéchi ndíi núú Yă Ndiöxí ñá, te cada càhnu ndíi mee ndíi ni cùu, dico ñá díú núú Yă Ndiöxí cada càhnu ndíi mee ndíi te núú duca<sup>n</sup> ñí quide ndíi.

<sup>3</sup> Te chí dándàcu iní nàcuáa càhá<sup>n</sup>-xi núú tütú Yă Ndiöxí núú càchí-xi: “Té Àbrahám ní sàndáá iní-dé Yă Ndiöxí, te xíă<sup>n</sup> ní cachí-gá sá cúdù-dé núú-gă”, duha càchí-xi núú tütú-gá.



4 Te sá cùhú<sup>n</sup> yǎhu ì<sup>n</sup> téé quède chiu<sup>n</sup>, te vá cǎchí-ó sǎ xǎ<sup>n</sup> cúú-xí ì<sup>n</sup> táhú sǎ cúú-xí-dě chi yáhu tnàhí-dé cúú-xí.

5 Te vá yǎo ì<sup>n</sup> ndàcu cada ì<sup>n</sup> chiu<sup>n</sup> nacuáa cudìu-xi núú Yǎ Ndiǒxí. Te ñá túú nǎ chiù<sup>n</sup> xini ñuhu-xi cada ñáyiú te cudìú-yu núú-gǎ, chi xini ñuhu-ni-xi sá quìndáá-ni iní-yu-gá. Te ñiú-gá cǎchí-gá sá ñáyiú ndècu ichi cuehé ichi duha vá cúndècu-gá cuéchi-yu núú-gǎ, te núú na quìndáá iní ñáhǎ-yu xii-gá.

6 Te ñiú-ni duca<sup>n</sup> ñí cǎhá<sup>n</sup> ndíi Dàvií, chi ní cachí ndíi sá ìo váha táhú nchaa ñáyiú ní cachí Yǎ Ndiǒxí cudìu núú-gǎ, dico ñá díú cuendá ì<sup>n</sup> chiù<sup>n</sup> quidé-yu cudìú-yu núú-gǎ.

7 Te duha ní cachí ndíi:  
Váha táhú nchaa ñáyiú quède cahnu iní Yǎ Ndiǒxí  
nchaa cuéchi-xi,  
te ñá túú-gǎ quidé cuendá-gá nchaa sá cuehé sá  
dúhá ñí quidé-yu.

8 Váha táhú-yu chi Yǎ Ndiǒxí cǎchí-gá sá ñà túú-gǎ  
cuéchi-yu.

Duha ní cachí ndíi Dàvií.

9 Te ñá díú mèe-ni ñáyiú ngǔndecu sèñá ñí-xi  
duca<sup>n</sup> váha táhú-yu, chi tnàhá ñáyiú ñá túú  
ngǔndecu sèñá ñí-xi duca<sup>n</sup> váha táhú-yu. Te sa  
nàha-o sá Yǎ Ndiǒxí ní cachí-gá sá cúdiu ndíi  
Àbrahám núú-gǎ cuendá sá ni sàndáá iní ñáhá ndíi  
xii-gá.

10 Te cunaha-ndo sǎ dǐhna-gá ní cachí Yǎ Ndiǒxí  
sá cúdiu ndíi Àbrahám núú-gǎ te dǎtnùní ngǔndecu  
sèñá ñí ndíi.

11 Te ní ngúndecu señá ñ# ndíi cuendá xíã<sup>n</sup> cuu-xi #<sup>n</sup> señá sá cúdiu ndíi núú Yá Ndiöxí. Te ndéé cútnàhá vátá ngúndecu-gá señá ñ# ndíi, te sa cúdiu ndíi núú-gã chi ní sándáá iní ñáhá ndíi xii-gã. Te sá dúcá<sup>n</sup> ñà túú ndècu señá ñ# ndíi cútnàhá ní sándáá iní ndíi Yá Ndiöxí xíã<sup>n</sup> ní cuu ndíi dàtná #<sup>n</sup> díhí dütú nchaa ñáyiú sándáá iní ñáhá xii-gã, ñáyiú ñá túú ní ngúndecu señá ñ#-xi, te cùdiú-yu núú-gã.

12 Te ndíi Àbrahám ní cuu tucu ndíi dàtná #<sup>n</sup> díhí dütú nchaa ñáyiú ní ngúndecu señá ñ#-xi, dico ñá díú cuendá-ni sá nǐ ngúndecu señá ñ#-yu cùu ndíi díhí dütü-yu, chi cuendá sá sándáá iní-yu Yá Ndiöxí nchìcú<sup>n</sup> nihnú-yu nàcuáa ní quide ndíi ní sándáá iní ñáhá ndíi xii-gã ndéé cútnàhá vátá ngúndecu-gá señá ñ# ndíi.

*Yá Ndiöxí cada-gá nchaa nàcuáa ní cachí-gá te núu na quindáá iní-ó-gã*

13 Te Yá Ndiöxí ní xáha<sup>n</sup>-gã xii ndíi Àbrahám sá ndúú tǎhú ndíi cunuu ndíi ñuyíú, ndíhí cue déhe ndíi, ndíhí nchaa dava-gá cue ñaní tnáhá ndíi vitna cacu túu. Te duca<sup>n</sup> nǐ xáha<sup>n</sup> Yá Ndiöxí xii ndíi ndíhí cue ñaní tnáhá ndíi, chi ní sándáá iní ñáhá ndíi xii-gã núu xíã<sup>n</sup> ní cudíu ndíi núú-gã. Te duca<sup>n</sup> nǐ xáha<sup>n</sup>-gã xii ndíi dico ñá díú cuendá sá nǐ quide ndíi nàcuáa ní xáha<sup>n</sup> Yá Ndiöxí xii ndíi Moisés cada ñáyiú ndéé cuéé-gã.

14 Te núu mee-ni ñáyiú nchìcú<sup>n</sup> nihnu quide nacuáa ní cáhá<sup>n</sup> ndíi Moisés ní ndùu tǎhü-yu cunùú-yu ñuyíú-a ni cùu ña, te ñá túú xìni ñuhu-xi quindáá iní-ó Yá Ndiöxí, te ñá túú nàndíhí tnúhu ní xáha<sup>n</sup> Yá Ndiöxí xii ndíi Àbrahám ní cùu te núu duca<sup>n</sup>.

15 Te núu ñ<sup>n</sup> ñáyu ñá túú quide nacuaá càhá<sup>n</sup> tnúhu sá sánú ìchi ñaha xii-o nacuaá cada-o te nacháhu-yu sá dúcá<sup>n</sup> quidé-yu. Te núu ñá túú tnúhu sá sánú ìchi ñaha-xi xii-o nacuaá cada-o ni cùu ña, te ñá túú cuèchi-o ni cùu.

16 Te duca<sup>n</sup> ñí xáha<sup>n</sup> Yă Ndiöxí xii ndíi Àbrahám nàcuáa cada-gá, chi cuendá sá ni sàndáá iní ñáhá ndíi xii-gá. Te duca<sup>n</sup> ñí quide-gá chi ío váha iní-gá, dico ñá díú sǎ ñ<sup>n</sup> chiu<sup>n</sup> ni quide ndíi duca<sup>n</sup> ñí xáha<sup>n</sup>-gǎ. Te sá dúcá<sup>n</sup> ñí cuu te cùu-xi ñ<sup>n</sup> tnúhu ndáá sá cúu-xi nchàa ñaní tnáhá ndíi, ñáyu sàndáá iní ñáhá xii-gá dàtná ní sàndáá iní ñáhá mèe ndíi xii-gá, te ñá díú mèe-ni cuendá nchaa ñaní tnáhá ndíi nchìcú<sup>n</sup> nihnu nchaa nàcuáa ní cáhá<sup>n</sup> ndíi Moisés, chi ndíi Àbrahám-á<sup>n</sup> ñí cuu ndíi dàtná ñ<sup>n</sup> díhí dütú cue ñáyu sàndáá iní ñáhá xii Yá Ndiöxí.

17 Te núú tütú Yă Ndiöxí càhá<sup>n</sup>-xi nàcuáa ní xáha<sup>n</sup>-gǎ xii ndíi, te duha ní xáha<sup>n</sup>-gǎ: “Yohó té Àbrahám ní quide ñaha-í xii-n dàtná ñ<sup>n</sup> díhí dütú cue ñáyu xñdecu nihí ñuyíú.” Duha ní xáha<sup>n</sup> Yă Ndiöxí xii ndíi, càchí-xi núú tütú-gá. Te Yá Ndiöxí náhá ndáá-gá sá cádá-xi nàcuáa ní xáha<sup>n</sup>-gǎ xii ndíi Àbrahám, te ñi-ni-gá cúu Yáá ní sàndáá iní ndíi, te ñi-ni-gá dándòto-gá ñáyu ní xíhí, te ñi-ni-gá quidé tá ngñdecu nchaa sá vǎtá cùndècu-gá ñuyíú-a.

18 Te Yá Ndiöxí ní xáha<sup>n</sup>-gǎ xii ndíi Àbrahám sá ío cuéhé dèhe ndíi coo, te ío ní sàndáá iní ndíi nàcuáa ní xáha<sup>n</sup>-gǎ dico ñá túú ní cùtnuní iní ndíi nása cada-gá, chi ío ní sahnu ndíi. Te cuendá sá dúcá<sup>n</sup> ío ní sàndáá iní ndíi tnúhu ní xáha<sup>n</sup>-gǎ nñu xíá<sup>n</sup> ní cuu ndíi díhí dütú vai ñáyu xñdecu nihí ñuyíú.

19 Te ndíi Àbrahám ñùhu ndíi ìḡ<sup>n</sup> cièndú cuíá cǔtnàhá duca<sup>n</sup> ñí xáha<sup>n</sup> Yă Ndiöxí xii ndíi, te ní cutnùní iní ndíi sá ñà túú tàhú ndíi sá cóó dēhe ndíi ndíi ñadìhí ndíi ndíi Sărá, chi ndíi ndùú-yu sa ní sahnú vîhí-yu, te cuèi duca<sup>n</sup> dico ní sándáá-ni iní ndíi nàcuáa ní xáha<sup>n</sup> Yă Ndiöxí.

20 Te ñá túú ní sàni ìḡ<sup>n</sup> saní úú iní ndíi nàcuáa ní xáha<sup>n</sup> Yă Ndiöxí cada-gá sá cúu-xí ndíi, chi da uu<sup>n</sup>-gá váha ní sándáá iní ndíi nàcuáa ní xáha<sup>n</sup>-gă, te ní cachí ndíi sá ìo càhnú cuu-gá.

21 Te ní cutnùní ndáá iní ndíi sá Yă Ndiöxí ndácú-gă quídé-gă nchaa sá càhá<sup>n</sup>-gá.

22 Te sá ni sándáá iní ndíi nàcuáa ní cáhá<sup>n</sup> Yă Ndiöxí, núu xiá<sup>n</sup> ní cachí-gá sá cúu ndíi ìḡ<sup>n</sup> tée ñá túú cuèchi-xi núú-gă.

23 Te ní ngódó tnùní núú tütú Yă Ndiöxí cuèndá ndíi Àbrahám sá ñí cachí-gá sá ñà túú cuèchi ndíi núú-gă, te ñá díú-ní cuèndá méé ndíi ni ngódó tnùní núú tütú-gá.

24 Chi tnàhá cuèndá-ó nchàa-o ní ngódó tnùní núú tütú-gá. Te càchí-gá sá ñà túú cuèchi-o nǔú-gă chi sándáá iní-ó-gă, te díu-gá cúu-gă Yaá ní dándótó ñàha xii Xítóhó Jesucristú Yaá cúu Xítóhó-ó.

25 Te Yá Ndiöxí ní cachí-gá sá díú Xítóhó Jesucristú cuú-gá cuèndá nacháhu-gá nchaa cuèchi-o. Te ní xíhí-gá te ní ndoto-gá cuèndá nchaa-o vă cùndècu-gá cuèchi-o nǔú Yă Ndiöxí te núu na quìndáá iní-ó-gă.

## 5

*Ío váha tnàhá ñáyiu càchí Yă Ndiöxí sá ñà túú cuèchi-xi*

1 Te vitna, ñá túú-gă cuéchi-o ndècu núú Yă Ndiõxí chi sàndáá iní-ó Xítóhó Jesucrìstú, te ío váha ndècu ndìhi-o Yá Ndiõxí vitna sá cuèndá Xítóhó Jesucrìstú.

2 Te cuèndá sá ni sàndáá iní-ó Xítóhó Jesucrìstú xíá<sup>n</sup> diu-gá ní quide ní ngúndecu váha-o núú Yă Ndiõxí, te duca<sup>n</sup>-ni cùndecu-o, te ío cùdíí iní-ó chi ndècu ndìhi-o tnúhu ndee ìní sá sáa nduu ngúndecu-o núú ìo váha càa ndecu Yá Ndiõxí.

3 Te ñá díú-ní sá cuèndá sá ndúú tǎhú-ó cùndecu-o núú ndécú-gă cùdíí iní-ó, chi cùdíí iní-ó ndòho-o cuendá-gá, chi cùtnuní iní-ó sá nùu na ndòho-o cuendá-gá te cunduu càhnu-gá iní-ó,

4 te núu cùu-o ñáyiu ta quide cahnu-gá iní-xi te cùtnuní sá cúú-ó ñáyiu quide váha, te núu cùu-o ñáyiu quide váha te uu<sup>n</sup>-gá tá ngúndecu ndìhi-o tnúhu ndee ìní cuáhá<sup>n</sup> sá cádá vǎha ñaha Yă Ndiõxí xii-o.

5 Te núu duca<sup>n</sup> te vá íí<sup>n</sup> ndùu ndixi cuéchi iní-ó sá ndécú ndìhi-o tnúhu ndee ìní ngúndecu váha-o. Te Espíritú sá ñí taxi Yá Ndiõxí ndécú ndìhi-o xíá<sup>n</sup> quidé-xí cùtnuní iní-ó sá ìo cùu iní ñáhá Yă Ndiõxí xii-o.

6 Te nchoo ñà túú vǎdana ná ní ndàcu-o cada-o cuendá dàcácu nihnu-o mǎe-o, dico Xítóhó Jesucrìstú ní xíhí-gá cuèndá-ó, ndìhi cuèndá nchaa dava-gá ñáyiu ñá túú tnàhá tnúhu ndìhi Yá Ndiõxí, te ní xíhí-gá mei ndùu taú-xi cuú-gá.

7 Te cudana-ni núu xìhí íí<sup>n</sup> ñáyiu sá cuèndá íí<sup>n</sup> ñáyiu quide ndáá, te áma xìhí tucu íí<sup>n</sup>-yu sá cuèndá ñáyiu quide váha tnàha ñáyiu-xi.

8 Te Yá Ndiõxí ní quide-gá sá nchoó cùtnuní iní-ó sá ìo cùu iní ñáhá-gă xii-o, chi cútnàhá ndécú-ó ìchi

cuehé ichi duha te ní tendaha-gă Xítóhó Jesucrìstú ní quixi-gă ñuyú-a ní xíhí-gă cuèndá-ó.

<sup>9</sup> Te sá cuèndá sá ñí xíhí Xítóhó Jesucrìstú xǎ<sup>n</sup> ñá túú-gă cuéchi-o ndècu núú Yă Ndiǒxí, te vitna ní cutnùní ndáá iní-ó sǎ vǎ dáquihí<sup>n</sup> ñáhá-gă Yă Ndiǒxí xii-o nǔú ùhú núú ndàhú sá cuèndá Xítóhó Jesucrìstú.

<sup>10</sup> Te cùtnàhá ñá túú tnàhá tnúhu-o ndìhi Yá Ndiǒxí ní cùu ní xíhí Xítóhó Jesucrìstú Yaá cúú Dèhe-gă cuèndá cuu váha iní ñáhá-gă xii-o, te duca<sup>n</sup> te nduu táhú-ó cùndecu-o ndìhi-gă ñí caa ñí quíhí<sup>n</sup> cuèndá sá ñí ndoto Xítóhó Jesucrìstú.

<sup>11</sup> Te ndètu-o sáá nduu ngúndecu-o ndìhi-gă ñí caa ñí quíhí<sup>n</sup>, te ñá díú-ní xǎ<sup>n</sup> quidé-ó chi tnàhá cùdí<sup>í</sup> ìní-ó Yă Ndiǒxí, chi Xítóhó Jesucrìstú ní quide-gă duca<sup>n</sup> cùdí<sup>í</sup> ìní-ó-gă, te ñíu-ni Xítóhó Jesucrìstú ní quide-gă ní nucúndecu váha-o ndìhi Yá Ndiǒxí.

### *Nàcuáa ní quide ndíi Àdán ndìhi nàcuáa ní quide Xítóhó Jesucrìstú*

<sup>12</sup> Te ndíi Àdán ñá túú ní quide ndáá ndíi núú Yă Ndiǒxí nǔu xǎ<sup>n</sup> ní ngúndecu nchaa sá cuèhé sá dúhá ñùyú-a, te sá cuèndá nchaa sá cuèhé sá dúhá quide ñáyíu xǎ<sup>n</sup> xìhí-yu, te ncháá-yu xìhí-yu chi ncháá-yu quidé-yu nchaa sá cuèhé sá dúhá.

<sup>13</sup> Te sa quide-gá-yu nchaa sá cuèhé sá dúhá te dǎtnùní ní ngúndecu nchaa tnúhu sá ñí chídó tnùní ndíi Moisés nàcuáa ní xáha<sup>n</sup> Yă Ndiǒxí cada ñáyíu, te nchoo cùtnuní iní-ó sǎ nǔu ñá túú tnúhu sá sánú ichi ñaha xii-o nàcuáa cada-o, te ñá túú cuéchi-o sànuu.

14 Te ndéé cútnàhá ní xíndecu ndíi Àdán ní que-saha-xi xihí ñáyiu, te duca<sup>n</sup>-ni xihí-yu ndéé ní sáá nduu nĩ xíndecu ndíi Moisés. Te duca<sup>n</sup> nĩ xihí-yu chi ní quidé-yu nchaa sá cuèhé sá dúhá cuèi ñá túú ní quidé-yu nàcuáa ní quide ndíi Àdán, chi ndíi-á<sup>n</sup> ñà túú ní sàndáá iní ndíi nàcuáa ní xáha<sup>n</sup> Yă Ndiõxí cada ndíi. Te ndíi Àdán ní cuu ndíi ì<sup>n</sup> téé cùu cahnu ní xíndecu ñuyíú-a, te sátá dúcá<sup>n</sup> te ní quixi Xítohó Jesucrístú te Yáá-á<sup>n</sup> ìo-gá càhnu cuu-gá.

15 Te sá nĩ quide ndíi Àdán te vá càchí-ó sã ì<sup>n</sup>-ní cùu-xi ndíi sá nĩ cachí Yă Ndiõxí nduu táhú-ó vitna. Te sá ñà túú ní quide ndáá ndíi xíá<sup>n</sup> nchaa ñáyiu xihí-yu, dico Yă Ndiõxí ío váha iní-gá chi ío váha ní quide-gá sá cúú-xí nchaa nchoo ñáyiu ndècu ñuyíú-a, chi òcò duca<sup>n</sup> nĩ cachí-gá sá nánihí tàhú-ó, te ì<sup>n</sup>dìi-ni téé tnàhá-dé ío váha ní quide-dé sá cúú-xí-ó, te téé-á<sup>n</sup> cúú-dě Xítohó Jesucrístú.

16 Te sá nĩ quide ì<sup>n</sup>dìi-ni ndíi Àdán ñá túú ì<sup>n</sup>-ni cuu-xi ndíi sá nĩ quide Yă Ndiõxí sá cúú-xí-ó, chi ndíi-á<sup>n</sup> ñà túú ní quide ndáá ndíi núú-gă. Te sá dúcá<sup>n</sup> nĩ quide ndíi te xíá<sup>n</sup> ní cuu-xi cuéchi díhna nuu ní quide ndíi, núu xíá<sup>n</sup> ní cachí Yă Ndiõxí sá cuè ñáyiu quíhí<sup>n</sup>-yu núú ùhú núú ndàhú nacháhu-yu nchaa sá cuèhé sá dúhá quidé-yu. Dico mee-gă ní quide sá cuè ñáyiu naníhí tàhú-yu òcò-ni duca<sup>n</sup>, te duca<sup>n</sup> te vá cùndècu-gá cuéchi-yu núú-gă cuèi ío vâi cuéchi-yu.

17 Te sá dúcá<sup>n</sup> ñà túú ní quide ndáá ì<sup>n</sup>dìi-ni ndíi Àdán-á<sup>n</sup> núú Yă Ndiõxí, xíá<sup>n</sup> ní quide-xi xihí nchaa ñáyiu. Te sá cuèndá sá nĩ quide ì<sup>n</sup>dìi-ni Xítohó Jesucrístú xíá<sup>n</sup> ío váha ní quide ñaha Yă Ndiõxí xii ñáyiu, chi òcò-ni duca<sup>n</sup> nĩ nduu táhú-yu cùdúú-yu

núú-gă. Te nchaa ñáyiú duca<sup>n</sup> cùdiú núú-gă nduu táhũ-yu cunúú-yu ndihi Xítohó Jesucrístú cuendá sá ñi quide-gá sá vâha sá cúú-xĩ-yu.

18 Te sá dúcá<sup>n</sup> ñi quide ndíi Àdán ñá túú ní quide ndíi nàcuáa ní xáha<sup>n</sup> Yă Ndiöxí xii ndíi ñ<sup>n</sup> xito, núu xíá<sup>n</sup> ní cachí-gá sá ncháá ñáyiú tàú-yu nacháhu-yu nchaa cuéchi-yu, dico Xítohó Jesucrístú ní quide-gá ñ<sup>n</sup> sá vâha cuendá nchaa ñáyiú vá cùndècu-gá cuéchi-yu núú Yă Ndiöxí te núu na quíndáá iní ñáhã-yu xii-gá, te duca<sup>n</sup> te cundecú-yu ndihi-gá ñi caa ñi quíhí<sup>n</sup>.

19 Te sá ñà túú ní sàndáá iní ñ<sup>n</sup>dii-ni ndíi Àdán nàcuáa ní xáha<sup>n</sup> Yă Ndiöxí xii ndíi, xíá<sup>n</sup> ní nguínchicú<sup>n</sup> nihnu nchaa ñáyiú quidé-yu nchaa sá cuèhé sá dúhá. Te duca<sup>n</sup> ñ<sup>n</sup>dii-ni Xítohó Jesucrístú ní quide-gá nàcuáa ní xáha<sup>n</sup> Yă Ndiöxí cuendá sá Yă Ndiöxí cachí-gá sá cúdiú-yu núú-gă.

20 Te Yă Ndiöxí ní xáha<sup>n</sup>-gă xii ndíi Moisés nàcuáa cada ñáyiú, te sá cuendá tnúhu-á<sup>n</sup> uu<sup>n</sup>-gá ní ngüíta nchaa ñáyiú quidé-yu nchaa sá cuèhé sá dúhá, te Yă Ndiöxí uu<sup>n</sup>-gá cùndàhú iní ñáhá-gă xii-yu tucu.

21 Te sá cuendá nchaa cuéchi ñáyiú xíá<sup>n</sup> xihí-yu, dico Yă Ndiöxí ío váha iní-gá chi diú-gá ní cachí-gá sá ncháá ñáyiú na tnàhá tnúhu ndihi ñaha xì-gá cudíú-yu núú-gă, te cundecú-yu ndihi-gá ñi caa ñi quíhí<sup>n</sup>, te duca<sup>n</sup> chi Xítohó Jesucrístú ní quide-gá sá vâha sá cúú-xĩ-yu.

## 6

*Ñáyiú ñá túú-gă ndécú ichi cuehé ichi duha ndècú-yu cuendá Xítohó Jesucrístú*



1 Te sá dúcá<sup>n</sup> quide Yá Ndiǒxí, te vá cání ìní-ó cànchicú<sup>n</sup> nihnu-ni-o ìchi cuehé ichi duha, chi ñá díú sǎ cànchícú<sup>n</sup> nihnu-o ìchi-á<sup>n</sup> te ngóo cànì ìní-ó sǎ ìo-gá cundàhú ìní ñáhá-gǎ xii-o.

2 Te vá cúú cànchicú<sup>n</sup> nihnu-o ìchi cuehé ichi duha, chi nchoo cùu-o datná cue ñáyiu sa ní xíhí, núu xíǎ<sup>n</sup> vá cúú-gǎ cànchicú<sup>n</sup> nihnu-o ìchi-á<sup>n</sup>.

3 Te sa nàha-o sá cuendá sá ñí sandute-o quèe-xi sá tnàhá tnúhu-o ndìhi Xítóhó Jesucrìstú. Te sá ñí sandute-o quèe tucu-xi sá cúú-ó dàtná ñáyiu ní xíhí ndìhi-gá.

4 Te ñá díú-ní sǎ ñí xíhí-ó ndìhi-gá chi quèe tucu-xi sá ñí nguíndǔxi-o ndìhi-gá te ní ndoto-o dàtná ní ndoto mee-gǎ ní dándótó ñàha Dútú Ndiǒxí Yaá ío cànhu cuu, te duca<sup>n</sup> ñí cuu cuendá sá vǎ cùndècu-gá-ó dàtná ní xíndecu-o.

5 Te núu ì<sup>n</sup>-ni cùu-o ndìhi Xítóhó Jesucrìstú cuendá sá cúú-ó dàtná ñáyiu ní xíhí ndìhi-gá, te ndáá sá cúú-ó dàtná ñáyiu ní ndoto ní nguíndecu váha dàtná ní ndoto mee-gǎ ní nucúndecu váha-gá.

6 Te nchoo nàha-o sá cúú-ó ñáyiu ío ndècu cuéchi-xi ní cùu, dico sátá ñí cuu-o dàtná ñáyiu ní xíhí dàtná ní xíhí Xítóhó Jesucrìstú núu cùrúxí, te ndéé dàvá-á<sup>n</sup> ñí dáñá-ó nchàa ichi cuehé ichi duha ndècu-o ní cuu, te ñá túú-gǎ cúnùu sá cuèhé sá dúhá ìní-ó.

7 Chi nchaa ñáyiu ní xíhí ñá túú-gǎ ndécǔ-yu ichi cuèhé ichi duha.

8 Te núu cùu-o datná ñáyiu ní xíhí dàtná ní xíhí Xítóhó Jesucrìstú ñá, te cùtnuní ndáá ìní-ó sá cùndècu-o ndìhi-gá ñí caa ñí quíhí<sup>n</sup>.

9 Te sa nàha-o sá Xítóhó Jesucrìstú ní xíhí-gá te ní

ndoto-gá te vá ìí<sup>n</sup> ndùu ìí<sup>n</sup> quiú-gă te cuú-gá, chi ñá túú năgá sá cádá cùú-gá.

10 Te Xítóhó Jesucristú ní xíhí-gá ìí<sup>n</sup> xito-ni sá cuèndá nchaa cuéchi nchoo ñăyiu ñuyíú, te vá ìí<sup>n</sup> ndùu-gá cuú-gá, te ndècu-ni-gá sá cúú-xí Yă Ndiöxí.

11 Núu xíă<sup>n</sup> nchòhó cada iní-ndó să dàtná sá ñí xíhí-ndó vă cùndècu-gá-ndó sá cúú-xí ìchi cuehé ichi duha, chi ndècu-ná-ndó să cúú-xí Yă Ndiöxí, chi ní tnahá tnúhu-ndo ndìhì Xítóhó Jesucristú Yaa cúú Xítóhó-ó.

12 Te núu xíă<sup>n</sup> vá dáñá-gă-ndó cùnūu ni ìí<sup>n</sup> sá cuèhé sá dúhá ìní-ndó cuèndá sá vă cádá-gă-ndó ñí ìí<sup>n</sup> sá cuèhé sá dúhá sàni iní-ndó.

13 Te vá dáñá-ndó tàxi tnuní ñáhá ñí ìí<sup>n</sup> sá cuèhé sá dúhá-ă<sup>n</sup> xii-ndo cuèndá sá vă cádá-gă-ndó, te chí dáñá ná tàxi tnuní ñáhá Yă Ndiöxí xii-ndo, te chí dáñá ná chindee ñaha-gá cada-ndo mēe-ni sá văha, te duca<sup>n</sup> te cada iní-ndó să cúú-ndó dàtná ñáyiu ní xíhí te ní ndoto ndècu.

14 Te duca<sup>n</sup> càda-ndo chi vá ndácú-gă ñí ìí<sup>n</sup> sá cuèhé sá dúhá tàxi tnuní ñáhá-xí xii-ndo, chi Yă Ndiöxí cùndàhú iní ñáhá-gă chíndèe ñaha-gá xii-ndo. Te duca<sup>n</sup> chi ñá túú-gă cùnūu nchaa tnúhu sá ñí chídó tnùnì ndíi Moisés cada ñáyiu.

### *Ñáyiu nchícú<sup>n</sup> nihnu sá văha*

15 Te ñá díú să cùndàhú iní ñáhá Yă Ndiöxí xii-o chindee ñaha-gá ndìhì sá ñá túú-gă cùnūu nchaa tnúhu ní chídó tnùnì ndíi Moisés, te cachí-ó să cúú-ní cùndecu-o ichi cuehé ichi duha.

16 Te nchoo xìnì-ó să nūu na cuăha-o tnúhu cunu cuechi-o nūú ìí<sup>n</sup> ñáyiu cuìnì cunu cuechi-o nūú-xi, te cùu-ná-ó ñáyiu xìnu cuechi nūú-yu te quide-o

nchaa chiu<sup>n</sup> tahu-yu. Te duca<sup>n</sup> sãtnahá-xi cùu nchaa ñáyiu quide nchaa sá cuèhé sá dúhá chi tàxi tñuní ñáhá-nã-xi xií-yu, te ñiu nchaa xiã<sup>n</sup> dácuíta nihnu ñaha-xi xìi-yu, te ñiu-ni duca<sup>n</sup> sãtnahá-xi cùu nchaa ñáyiu sãndáá iní ñáhá xìi Yá Ndiõxí chi tàxi tñuní ñáhá-gã xií-yu, te quide-yu nchaa sá vãha nàcuáa cuìní mée-gã cadá-yu.

17 Te nchòhó duca<sup>n</sup> ñí xóo cada-ndo nchàa sá cuèhé sá dúhá ní cùu, dico táxãhu xìi Yá Ndiõxí chi vitna ñi yùhu ñi iní-ndó quide-ndo nchaa nacuáa càhá<sup>n</sup> tñuhu-gá sá ñí ngúndecu ndihi-ndo.

18 Te vitna ñá túú-gã táxi tñuní ñáhá ñi ñ<sup>n</sup> sá cuèhé sá dúhá xìi-ndo, te quide-ná-ndó nchàa sá vãha tàuchiu<sup>n</sup> Yá Ndiõxí cada-ndo.

19 Te duha càhá<sup>n</sup>-í cuendá cue ñáyiu xìnu cuechi cuendá sá nchòhó tecú tñuní-ndó nàcuáa ndùu tñuhu càhá<sup>n</sup>-í. Te nchòhó ní dáñá-ndó ñí taxi tñuní ñáhá nchàa sá cuèhé sá dúhá xìi-ndo, te ñá túú ní quide-ndo nacuáa ní càhá<sup>n</sup> Yá Ndiõxí cada-ndo chi da vìhi-gá ní quide-ndo, te ñiu-ni duca<sup>n</sup> chĩ dáñá ná tàxi tñuní ñáhá Yá Ndiõxí xìi-ndo vitna cuendá cada-ndo mée-ni sá vãha nàcuáa cuìní mée-gã cada-ndo, te duca<sup>n</sup> te cuu-ndo ñáyiu quide ndáá cundecu núú-gã.

20 Te nchoo cùtnàhá ní xóo cada-o nchàa sá cuèhé sá dúhá ñá túú ní xóo cada-o ñi ñ<sup>n</sup> sá vãha cuìní Yá Ndiõxí cada-o.

21 Te ñicó sácá<sup>n</sup>núú sãñaha nchàa sá cuèhé sá dúhá-ã<sup>n</sup> te núu na càda-o, te ñi ñ<sup>n</sup> sá vãha vá ñihí-ó te núu na càda-o nchaa xiã<sup>n</sup>, te ñiu nchaa xiã<sup>n</sup> dácuíta nihnu ñaha-xi xìi-o.

22 Te vitna ñá túú-gã cúú-ó ñáyiu ndècu ichi cuehé ichi duha, chi cùu-ná-ó ñáyiu quide nchaa nacuáa càhá<sup>n</sup> Yá Ndiõxí. Te sá dúhá quide-o cuu ndisa-xi ñ<sup>n</sup> sá vãha sá cúú-xí-ó, te cùu-o ñáyiu quide

ndáá ndécú-ó nõú-gă vitna, te sáá nduu cùndecu-o ndìhi-gá ni caa ni quíhí<sup>n</sup>.

<sup>23</sup> Te nchaa sá cuèhé sá dúhá dìcò dácũta nihnu ñaha-xi xì-o, dico Yá Ndiõxí ní quide-gá sá dìcò-ni duca<sup>n</sup> ndùu táhú-ó cùndecu-o ndìhi-gá ni caa ni quíhí<sup>n</sup>, chi ní tnahá tnúhu-o ndìhi Xítóhó Jesucrìstú Yáá cúú Xítóhó-ó.

## 7

### *Cuèndá ñáyiú tnãndaha*

<sup>1</sup> Te nchaa nchòhó ñáyiú ndècu ndìhi-í ichi Xítóhó Jesucrìstú sa nàha-ndo nacuáa càhá<sup>n</sup> tnúhu sá dánèhé ñáhá xì-o nacuáa cada-o cùndecu-o, chi tnúhu-á<sup>n</sup> càhá<sup>n</sup>-xì dóho nchaa ñáyiú xĩndecu vǐvú ñuyíú-a.

<sup>2</sup> Te nchaa ñáyiú dǐhí sa ndècu yíi-xi, te diu tnúhu-á<sup>n</sup> dánèhé ñáhá-xí xì-yu sá vǎ dáñǎ-yu yíi-yu, dico núu na cùu yíi-yu te ñá túú-gă ná càhá<sup>n</sup> tnúhu-á<sup>n</sup> cuèndá-yu.

<sup>3</sup> Dico núu vátá cùú-gá yíi-yu te ñá túú ndùu váha-xi naquehé<sup>n</sup>-yu ingá téé, dico núu na cùu yíi-yu te quendóo mèé-yu, te ñá túú nǎgá càhá<sup>n</sup> tnúhu sá dánèhé ñáhá xì-yu nàcuáa cadá-yu te duca<sup>n</sup> te cuu naquehé<sup>n</sup>-yu ingá téé, te ñá túú cùu-xi ñ<sup>n</sup> cuéchi.

<sup>4</sup> Te nchòhó cue ñáyiú ndècu ndìhi-í ichi Xítóhó Jesucrìstú cúú-ndó dàtná ñáyiú ní xíhí dàtná ní xíhí-gá. Te xǐǎ<sup>n</sup> ñá túú-gă táxí tnùnì ñáhá nchaa tnúhu ní chídó tnùnì ndíi Moisés xii-ndo. Te duca<sup>n</sup> nǐ cuu cuèndá nchòhó ngúndecu-ndo ndìhi Xítóhó Jesucrìstú Yáá ní xíhí ní cùu te ní ndoto-gá. Te

duca<sup>n</sup> ñĩ cuu cuendá nchaa nchoo ñăyiu ndècu ichi-gá cada-o nchàa nacuáa càhá<sup>n</sup> Yă Ndiõxí.

<sup>5</sup> Te nchoo ñĩ xíndecu-o ichi cuehé ichi duha, te tnúhu sá sánú ìchi ñaha xii-o nacuáa cada-o cùndecu-o cachi-xi sá ñà túú vâha cundecu-o ìchi-á<sup>n</sup>, te nchoo dà uu<sup>n</sup>-gá ní quide-o nchàa sá cuehé sá dúhá sã dúcá<sup>n</sup> càhá<sup>n</sup> tnúhu-á<sup>n</sup>, te sá dúcá<sup>n</sup> ñĩ quide-o te ta xíta nihnu-o cuăhá<sup>n</sup> ní cùu.

<sup>6</sup> Te vitna cada iní-ó sã cúú-ó dàtná ñăyiu ní xíhí sá cúú-xí tnúhu sá dánèhé ñáhá xii-o nacuáa cada-o cùndecu-o, chi ñã túú-gã cúnùu-xi, te vitna mee-ñã Espíritú Yă Ndiõxí chíndèe ñaha-xi xii-o xinu cuechi-o núú-gã, te ñã díú cuendá nchaa tnúhu sá ñĩ ngúndeé ndéé díhna cada ñăyiu xinu cuechi-o núú-gã vitna.

*Nchaa sá cuehé sá dúhá ñùhu iní-í*

<sup>7</sup> Te cuëi duha càhá<sup>n</sup>-í dico vá cúú tnàhí cáhá<sup>n</sup>-ó sã tnúhu sá sánú ìchi ñaha xii-o nacuáa cada-o cùndecu-o ñã díú tnúhu vâha cùu-xi. Te yúhú ñã túú cùtnuní iní-í ná cúú nchàa sá cuehé sá dúhá ní cùu te núu ñã túú tnúhu-á<sup>n</sup> ní càhí tnúhu-xi xii-í, te ni ñã túú cùtnuní tucu iní-í nõu vâha àdi ñã túú vâha sá nchídó ìní-í sá ndécú ndìhì tnaaha ñăyiu-o ni cùu te núu ñã túú tnúhu-á<sup>n</sup> ní càhí-xi sá vã cúú cùu iní-í sá ndécú ndìhí-yu.

<sup>8</sup> Te tnúhu-á<sup>n</sup> ñĩ dánèhé ñáhá-xí xii-í sá vã cúú càda-í ni ñ<sup>n</sup> sá cuehé sá dúhá, dico sá cuendá tnúhu-á<sup>n</sup> uu<sup>n</sup>-gá duca<sup>n</sup> ñĩ sani iní-í ní quide-í. Te núu ñã túú tnúhu sá sánú ìchi ñaha xii-o nacuáa cada-o cùndecu-o ñã, te ñã túú cùtnuní iní-í sá quidè-í nándi sá cuehé sá dúhá ní cùu.

<sup>9</sup> Te cútnàhá vátá ñihí-gá-í tnúhu-á<sup>n</sup> te ñã túú tnàhí ná sání ìní-í ndécù-í ni cùu, dico sátá ni ñihí-í

tnúhu-án te ní cutnùní iní-í sá ndécú cuěchi-í, te ta xíta nihnu-í cuáhán ní cùu.

<sup>10</sup> Te núu ni quide-í nchaa nàcuáa càhá<sup>n</sup> tnúhu-án te sa ndéé ama-gá naníhí tàhú-í ní cùu, dico ñá túú ní quide-í núu ní cutnùní iní-í sá tá xíta nihnu-í cuáhán ní cùu.

<sup>11</sup> Te sá xíí tnúhu-án xíá<sup>n</sup> uu<sup>n</sup>-gá ní cunuu nchàa sá cuèhé sá dúhá nǐ dándàhú ñáhá-xí xii-í te ní quide-í, te ta dàcuíta nihnu ñaha-xi xii-í cuáhán ní cùu.

<sup>12</sup> Te tnúhu sá sánú ìchi ñaha xii-o nacuáa cada-o cùndecu-o cuu-xi tnúhu ío yíñùhu ní taxi Yá Ndiöxí, te ñ<sup>n</sup> ñ<sup>n</sup> tnúhu-án cúú-xí mèe-ni tnúhu váha, te ni ñ<sup>n</sup> tnúhu cuèhé tnúhu duha ñá túú ñùhu tnahá.

<sup>13</sup> Te vá cúú càchí-í sá tnúhu váha-án nǐ quide-xi ta xíta nihnu-í cuáhán ní cùu, chi nchaa sá cuèhé sá dúhá nǐ quide-í, xíá<sup>n</sup> tá dàcuíta nihnu ñaha-xi xii-í cuáhán ní cùu, te sá cuendá tnúhu váha-án nǐ cutnùní iní-í sá quidè-í nchaa sá cuèhé sá dúhá, te xíá<sup>n</sup> tá xíta nihnu-í cuáhán ní cùu. Te sá cuendá nchaa nàcuáa càhá<sup>n</sup> tnúhu sá sánú ìchi ñaha xii-o nacuáa cada-o cùndecu-o ní cutnùní iní-í sá xidó ndécú cuěchi-í ní cùu.

<sup>14</sup> Te tnúhu-án nǐ taxi Espiritú Yă Ndiöxí ndécú ndìhi-o cachí tnúhu-xi nàcuáa cada váha-o. Te nchoo cùu-o mee-ni ñáyiu yíca cuěchi, te tàxi tnuní ñáhá nchàa sá cuèhé sá dúhá xii-o ni cuu.

<sup>15</sup> Dico nchoo tnàhá iní-ó càda-o nchaa sá vǎha dico ñá túú quide-o, te da nchaa sá ñá túú tnàhá iní-ó càda-o quide-o, te ñá túú cùtnuní iní-ó nǎ cuendá duca<sup>n</sup> quide-o.

<sup>16</sup> Te sá dúcá<sup>n</sup> quide-o nchaa sá ñà túú tnàhá iní-ó, te xíá<sup>n</sup> ndixí tǔu iní-ó sǎ tnúhu sá dúcá<sup>n</sup> sànu ìchi ñaha xii-o nacuáa cada-o cùndecu-o cuu-xi tnúhu ío váha.

17 Te cùtnuní iní-ó sǎ nchàa sá cuèhé sá dúhá ñùhu iní-ó, xǎ<sup>n</sup> quidé-xí dùca<sup>n</sup> quide-o sá ñà túú vǎha, te ñá díú sǎ cáhú ìní mée-ó dùca<sup>n</sup> quide-o.

18 Te cùu-o cue ñáyiu sàni cuehé sání dùha iní-xi, te cuìní-ó càda-o nchaa sá vǎha dico ñá túú ñihí ndée-ó càda-o.

19 Te cuìní-ó càda-o nchaa sá vǎha dico ñá ndácú-ó, te ñá túú cuìní-ó càda-o datná quidé nchàa ñáyiu ndècu ichi cuehé ichi duha, chi ñáyiu-á<sup>n</sup> mee-ni nchàa sá cuèhé sá dúhá quidé-yu, dico ðiu-ni nchaa xǎ<sup>n</sup> quidé-ó tnàhá-ó.

20 Te sá dúcá<sup>n</sup> quide-o nchaa sá ñà túú tnàhá iní-ó càda-o te ñá díú mèe-o duca<sup>n</sup> cahu iní-ó quide-o, chi nchaa sá cuèhé sá dúhá ñùhu iní-ó xǎ<sup>n</sup> quidé-xí dùca<sup>n</sup> quide-o.

21 Te duca<sup>n</sup> tnàhí yáha-o òré cuìní-ó càda-o sá vǎha, chi da mee-ni nchàa sá cuèhé sá dúhá quide-o.

22 Te ío cùdíí ìní-ó càda-o nchaa nacuáa càhá<sup>n</sup> Yǎ Ndiǒxí,

23 te dìcò-ni sá ncháá sǎ cuèhé sá dúhá ñùhu iní-ó, xǎ<sup>n</sup> quidé-xí ngàni ñaha-xi xii-o ñá túú quide-o sá vǎha sàni iní-ó càda-o, te duca<sup>n</sup> yáha-o chi nchaa sá cuèhé sá dúhá-ǎ<sup>n</sup> cúnùu-xi taxi tnuní ñáhá-xí xii-o.

24 ;Te ndàhú ní cuu nchoo! Chi vá yǒo ì<sup>n</sup> ni ndàcu cada nacuáa vá táxí tnùnì ñáhá-gǎ nchaa sá cuèhé sá dúhá xii-o sá tá dàcuíta nihnu ñaha xii-o cuáhá<sup>n</sup> ní cùu.

25 Te táxǎhu xii Yá Ndiǒxí sá Xǐtohó Jesucristú ní quide-gá cuendá sá vǎ táxí tnùnì ñáhá-gǎ ni ì<sup>n</sup> sá cuèhé sá dúhá xii-o, sá tá dàcuíta nihnu ñaha xii-o cuáhá<sup>n</sup> ní cùu. Te mee-o sàni iní-ó càda-o nchaa nacuáa càhá<sup>n</sup> Yǎ Ndiǒxí, dico núu nchaa sá cuèhé

sá dúhá ná cùnuu-xi taxi tnuní ñáhá-xí xì-o, te ñiu-ni nchaa xíá<sup>n</sup> cada-o.

## 8

*Ñáyiú quide nchaa nacuaá càhá<sup>n</sup> Espíritú Yá Ndiöxí*

<sup>1</sup> Te vitna nchaa nchoo ñáyiú tnàhá tnúhu ndihi Xítohó Jesucrístú vá cuíta nihnu-gá-ó, chi ñá túú-gã ndécú-ó ìchi cuehé ichi duha, chi mee-nã nchaa nacuaá càhá<sup>n</sup> Espíritú Yá Ndiöxí quidé-ó.

<sup>2</sup> Te Espíritú Yá Ndiöxí-ã táxi tnùní ñáhá-xí xì-o, te duca<sup>n</sup> chi ndècu ndihi-o Xítohó Jesucrístú, te sá dúcá<sup>n</sup> tàxi tnuní ñáhá Espíritú-gá xii-o nõu xíá<sup>n</sup> ñá túú-gã táxi tnùní ñáhá ñi ì<sup>n</sup>-gá sá cuèhé sá dúhá xì-o, te duca<sup>n</sup> quide Espíritú-gá cuendá sá vã cuíta nihnu-o, te ñiu-ni Espíritú-gá quidé-xí cuendá sá nchóó ndùu táhú-ó cùndecu-o ndihi-gá ni caa ni quíhí<sup>n</sup>.

<sup>3</sup> Te nchoo ñã ní ndàcu-o cada-o nchaa nacuaá càhá<sup>n</sup> tnúhu sá sánú ìchi ñaha xii-o nacuaá cada-o cùndecu-o, nõu xíá<sup>n</sup> tnúhu-á<sup>n</sup> ñã túú ní ñihí ndéé-xí càda-xí cuendá sá nchóó vã cuíta nihnu-o. Dico Yá Ndiöxí ní tendaha-gã Déhe mee-gã ní quixi ñuyíú-a, te Yaá-á<sup>n</sup> cúú-gã ì<sup>n</sup> ñáyiú, te càa-gã dàtná cáá ñáyiú ndècu cuéchi-xi xĩndecu ñuyíú-a, te sá cuendá nchaa cuéchi nchaa nchoo ñáyiú xĩndecu ñuyíú-a ní quixi-gá, te ndéé dàvá-á<sup>n</sup> ñi quide-gá cuendá sá vã táxi tnùní ñáhá-gã ni ì<sup>n</sup> sá cuèhé sá dúhá xì-o.

<sup>4</sup> Te duca<sup>n</sup> ñi quide-gá cuendá nchoo nchicú<sup>n</sup> nihnu-o quide-o nacuaá càhá<sup>n</sup> tnúhu sá sánú ìchi ñaha xii-o nacuaá cada-o, chi ñá túú-gã cúnùu ni



ii<sup>n</sup> sá cuèhé sá dúhá ìní-ó, chi Espíritú Yă Ndiöxí-nă táxí tnùnì ñáhá-xí xli-o.

<sup>5</sup> Te nchaa ñáyiú cùnuu nchaa sá cuèhé sá dúhá ìní-xi mee-ni xǎ<sup>n</sup> ñúhú ìní-yu te quidé-yu. Dico nchoo ñáyiú quide nchaa nacuáa cùní Espíritú Yă Ndiöxí ñúhú ìní-ó mèe-ni nacuáa càhá<sup>n</sup> Espíritú-gá-á<sup>n</sup> te quide-o.

<sup>6</sup> Te núu mee-ni nchaa sá cuèhé sá dúhá cùnuu ìní-ó, te cuíta nihnu-o, dico núu mee-ni nchaa tnúhu càhá<sup>n</sup> Espíritú Yă Ndiöxí cùnùu ìní-ó, te ío váha cuu ìní-ó cùndecu-o ndihí-gá ni caa ni quíhí<sup>n</sup>.

<sup>7</sup> Te nchaa ñáyiú ñùhu ìní mee-ni sá cuèhé sá dúhá cùu úhú ìní-yu Yá Ndiöxí, te ñá túú cùní-yu cadá-yu nacuáa càhá<sup>n</sup>-gá, te ni ñă ndácŭ-yu cadá-yu.

<sup>8</sup> Te nchaa ñáyiú duca<sup>n</sup> cùnuu nchaa sá cuèhé sá dúhá ìní-xi-á<sup>n</sup> ñă túú cùdíú-yu núú Yă Ndiöxí.

<sup>9</sup> Te nchòhó chi ñă túú-gă cùnùu sá cuèhé sá dúhá ìní-ndó, chi mee-nă nacuáa càhá<sup>n</sup> Espíritú Yă Ndiöxí quidé-ndó, te duca<sup>n</sup> quide-ndo chi ndècu ndihí-ndo Espíritú-gá, te diu-ni Espíritú-gá-á<sup>n</sup> ñă tendaha Xítóhó Jesucrístú véxi ndècu ndihí-o, te nchaa ñáyiú ñă túú ndècu ndihí Espíritú sá ñă tendaha Xítóhó Jesucrístú véxi ndècu ndihí-o ñă túú ndècu ndihí ñáhá-yu xii-gá.

<sup>10</sup> Te núu ndècu ndihí-ndo Xítóhó Jesucrístú, te cuèi na cùú yiqui cùñú-ndó sá cuèndá nchaa sá cuèhé sá dúhá íó ñuyúú-a, dico ìní-ndó chi cundecu ndihí-xi Yă Ndiöxí chi ñă túú-gă cuéchi-ndo ndècu núú-gă.

<sup>11</sup> Te núu ndècu ndihí-ndo Espíritú Yă Ndiöxí Yaá ní dándótó ñàha xii Xítóhó Jesucrístú, te diu-ni-gá cada te ndoto yiqui cùñú-ndó sá tá xíta nihnu

cuáhá<sup>n</sup> nõu na cùú-xi, te duca<sup>n</sup> chi ndècu ndìhi-ndo Espíritú-gá.

<sup>12</sup> Te nchòhó ñáyi ndècu ndìhi-í ichi Xítóhó Jesucristú, ñá túú-gã tàú-ndó cùnunu ni ì<sup>n</sup> sá cuèhé sá dúhá ìní-ndó nàcuáa vá cùndècu-gá-ndó ichi cuehé ichi duha.

<sup>13</sup> Chi núu na cùnunu sá cuèhé sá dúhá ìní-ndó te cuíta nihnu-ndo, chi quíhí<sup>n</sup>-ndó nõú ùhú núú ndàhú. Dico núu dañá-ndo mèe-ndo chindee ñaha Espíritú Yá Ndiõxí xii-ndo cuendá sá vã cùnùu-gá sá cuèhé sá dúhá ìní-ndó ñá, te nduu táhú-ndó cùndècu-ndo ndìhi-gá ni caa ni quíhí<sup>n</sup> te núu duca<sup>n</sup> na càda-ndo.

<sup>14</sup> Chi nchaa ñáyi quide nchaa nacuaa sànu ichi ñaha Espíritú Yá Ndiõxí cúú-yu déhe-gá.

<sup>15</sup> Te Espíritú sá ñí taxi Yá Ndiõxí ndécú ndìhi-o ñá túú quide-xi sá nchóó yùhú-ó cùnunu cuechi-o núú-gã, chi Espíritú-á<sup>n</sup> quidé-xí sã nchóó cùu-o déhe-gá, te ñiu-ni Espíritú-á<sup>n</sup> quidé xãha<sup>n</sup>-o xì Yá Ndiõxí: “¡Yòhó Dútú Ndiõxí cúú-n Tãtá méé-ndí!” duha xãha<sup>n</sup>-o xì-gá.

<sup>16</sup> Te ñiu-ni Espíritú-gá-ã<sup>n</sup> tnàhá tnúhu-xi ndìhi ìní-ó, te càhá<sup>n</sup> ndáá-xi sá nchóó cùu-o déhe-gá.

<sup>17</sup> Te sá dúcá<sup>n</sup> cùu-o déhe Yá Ndiõxí xíã<sup>n</sup> ní cachí-gá sá tnàhá-ó ndùu táhú-ó sã ñí nduu táhú Xítóhó Jesucristú, te duca<sup>n</sup> ndùu táhú-ó te núu na càda ndee ìní-ó ndòho-o datná ní ndoho Xítóhó Jesucristú, te núu duca<sup>n</sup> te ío cuu càhnu-o ndìhi-gá ni caa ni quíhí<sup>n</sup>.

<sup>18</sup> Te yúhú càhí-í sá ñà túú ñã cada-xi cuèi ndòho-o cuendá-gá ndécú-ó ñùyúú-a, chi ío váha càa núú ndúú táhú-ó cùndècu-o na saá nduu.

19 Te nchaandi túhú sá nǐ cadúha Yá Ndiõxí ní taxi ndecu-gá ñuyíú-a ndètu cahnu-ná-xi sáá nduu càchí-gá sá ìo càhnu cuu nchaa déhe-gá.

20 Te nchaa sá nǐ cadúha Yá Ndiõxí ní taxi ndecu-gá ñuyíú-a ní sáá nduu ñà túú-gă cúú-xí sǎ vǎha sá cúú-xí-gă. Te ñá díú mée sá nǐ taxi ndecu Yá Ndiõxí ñuyíú-a duca<sup>n</sup> ni sàni iní-xi cunduu, chi mee-gă duca<sup>n</sup> tnàhí ní cachí-gá cunduu sá sáá nduu vǎ cúú-xí sǎ vǎha sá cúú-xí-gă, dico sáá tucu nduu te nchaa xíǎ<sup>n</sup> cuu tucu-xi sá vǎha sá cúú-xí-gă.

21 Te nchaa sá nǐ taxi ndecu-gá ñuyíú-a vá cùndùu-gá-xi dàtná cáá-xí vitna te ni vǎ dánàa-gá, chi nduu saa-xi te ngúndecu váha-xi dàtná ngúndecu váha nchaa cue déhe-gá.

22 Te nàha-o sá ncháándi túhú sá nchító nǐ cadúha Yá Ndiõxí ndécú ñuyíú-a ndòho-xi vitna datná ndóhó ì<sup>n</sup> ñadihí sa ní tnahá òré cacu déhe-xi.

23 Te ñá díú-ní nchaa sá dúcá<sup>n</sup> nǐ cadúha-gá-ǎ<sup>n</sup> duca<sup>n</sup> ndòho-xi, chi tnàhá nchoo dùca<sup>n</sup> ndoho-o ndecu-o ñuyíú-a tucu, te nchoo sà ní nduu táhú-ó Espíritú Yá Ndiõxí Espíritú sá nǐ cachí mée-gă nduu táhú-ó dǐhnanuu. Te ío ndòho tnahá-ó ndècu-o ñuyíú-a te ndètu cahnu-ná-ó sáá nduu ndàda saa-gá yiqui cùñú-ó, te cáhá<sup>n</sup>-gá sá cúú-ó dèhe-gá.

24 Te Yá Ndiõxí ní quide-gá ní naníhí tàhú-ó nǔu xíǎ<sup>n</sup> ní ngúndecu ndíhi-o tnǔhu ndee ìní ndétú-ó sáá nduu càda-gá nàcuáa ní cachí-gá, te núu sa ndècu ndíhi-o sá ndúú táhú-ó te vá cúú cáhá<sup>n</sup>-ó sá cùndètu-o sá ndúú táhú-ó chi sa ndècu ndíhi-o.

25 Dico sá ndétú-ó ndùu táhú-ó cùu-xi sá vǎta cùndècu ndíhi-gá-ó, te xìni ñuhu-ni-xi cada ndee-ni iní-ó cùndetu-o ndéé sáá nduu ndùu táhú-ó sá dúcá<sup>n</sup> nǐ cachí Yá Ndiõxí nduu táhú-ó.

26 Te Espiritú-gá chindee ñàha-xi xii-o nacuáa níhí ndéé-ó cùndecu-o, te nchoo ñà túú xìní-ó cǎhá<sup>n</sup> ndìhi-o Yǎ Ndiǒxí nàcuáa tàú-xi cunduu dico Espiritú-gá cǎhá<sup>n</sup> ndàhú-xi núú-gǎ cuèndá-ó cuèi òré ñǎ níhí-ó tnǎhu cǎhá<sup>n</sup>-ó cuèndá nchaa sá ïo cuìní-ó cǎcǎ<sup>n</sup>-ó núú-gǎ.

27 Te Yá Ndiǒxí sa nàha ndáá-gǎ nchaa nàcuáa sàni iní-ó, te duca<sup>n</sup> sà naha ndáá-gǎ nchaa nàcuáa sàni iní Espiritú-gá. Te Espiritú-gá cǎhá<sup>n</sup> ndàhú-xi núú-gǎ cuèndá nchoo ñǎyiu yìndaha-gǎ, te cǎhá<sup>n</sup> ndàhú-xi núú-gǎ nàcuáa cuìní mée-gǎ cunduu.

*Nchaa sá ná càda ñaha ñáyiu te vá ndácǔ-yu nàdatùhú-yu iní-ó chi ndacu nahi-ni-o yǎha-o nchàa sá ná cǎdá ñàhá-yu*

28 Te sa nàha-o sá Yǎ Ndiǒxí quidé-gǎ sá ncháá sǎ yǎha-o ndècu-o ñuyíú-a cùu-xi sá vǎha sá cúú-xi nchòo cue ñáyiu cùu iní ñáhá xii-gǎ, chi cùu-o ñáyiu ní cǎhá<sup>n</sup>-gǎ cundecu ndìhi-gǎ dàtná ní cachí iní mée-gǎ.

29 Te ndéé cútnàhá vátá ngǎva-gǎ ñuyíú, te Yá Ndiǒxí sa nàha-gǎ nándi cùu ñáyiu cundecu ndìhi-gǎ, te ðiu-ni ndéé dàvá-á<sup>n</sup> ñí cachí-gǎ sá ñáyiu-á<sup>n</sup> cunduu váha iní-yu dàtná váha iní Déhe mee-gǎ, te duca<sup>n</sup> ñí cachí-gǎ cuèndá sá Dèhe mee-gǎ-á<sup>n</sup> cunuu-gǎ núú nchàa ñáyiu cundecu ndìhi-gǎ.

30 Te nchaa ñáyiu duca<sup>n</sup> ñí cachí-gǎ cundecu ndìhi-gǎ ndéé cútnàhá vátá ngǎva-gǎ ñuyíú cǎhá<sup>n</sup> ñáhá-gǎ xii-yu vitna, te nchaa ñáyiu duca<sup>n</sup> cǎhá<sup>n</sup>-gǎ cǎchí-gǎ sá ñà túú-gǎ cuéchi-yu ndècu núú-gǎ, te ðiu-ni ñáyiu-á<sup>n</sup> cachí-gǎ sá ïo cǎhnu cúú-yu.

31 Te vitna ní cutnùní iní-ó, te ñá túú nǎgá cani iní-ó, chi Yá Ndiǒxí ndécú ndìhi ñaha-gá xii-o, te vá yǎo ì<sup>n</sup>-gá ndacu quehdé nihnu cuendá sá vǎ chíndèè ñaha-gá xii-o.

32 Te Yá Ndiǒxí ñá túú ní cùdí iní-gá Déhe-gá sá cùú-gá cuendá nchaa nchoo ñǎyiu xǐndecu ñuyíú-a, te sá dúcá<sup>n</sup> ndéé Déhe-gá ñá túú ní cùdí iní-gá xǐǎ<sup>n</sup> cútnùní iní-ó sǎ táxí-gǎ nchaandi túhú sá xíní ñùhu-o.

33 Te vá yǎo ì<sup>n</sup> ndacu cacá<sup>n</sup> cuéchi núú Yǎ Ndiǒxí cuendá nchaa ñǎyiu ní cachí-gá cundecu ndìhi-gá te núú ná cúú cuéchi-yu ndècu. Chi mee-gǎ cǎchí-gá sá ñà túú ndècu cuéchi-yu núú-gǎ.

34 Te vá yǎo ì<sup>n</sup> ndacu daquìhí<sup>n</sup> ñáhá xì-o núú ùhú núú ndàhú, chi Xítóhó Jesucristú ní xíhí-gá te ní ndoto-gá, te cuándaa-gá núú ndécú Dútú Ndiǒxí núcǎo-gá xio cùha-gá, te duca<sup>n</sup> ìo cùnuu-gá, te yàcá<sup>n</sup> cǎhá<sup>n</sup> ndàhú-gá núú Dútú Ndiǒxí cuendá-ó.

35 Te vá yǎo ì<sup>n</sup> ndacu cada ñaha xì-o ì<sup>n</sup> sá ñà túú vǎha cuendá sá vǎ cúú ìní ñáhá-gǎ Xítóhó Jesucristú xii-o, te ni tnúndòho tnúhu ndàhú, te ni sá ndìhú iní-ó ñǎ cútnùní iní-ó nǎsa cada-o cǎcu nihnu-o ì<sup>n</sup> sá ná yǎha-o, te ni nchàa sá cǎdá ñaha ñǎyiu sá cuendá-gá, te cuèi-ni sá vǎ ñìhí-ó sǎ cǎhó sǎ cǎxí-ó, te cuèi-ni sá vǎ ñìhí-ó dǎo cuihnu-o, te cuèi ndècu-ná-ó sǎ yǎha-o ì<sup>n</sup> sá yǎha-o, te cuèi sa ndècu-ná-ó sǎ cǎhí ñáhá-yu, dico Xítóhó Jesucristú vá dáǎá ndéé-gá sá cúú ìní ñáhá-gǎ xii-o.

36 Te quee ndáá-xi nàcuáa ní cǎhá<sup>n</sup> ì<sup>n</sup> téé ní xóo cǎhá<sup>n</sup> tnúhu Yá Ndiǒxí ndéé sanaha ñí ngódó tnùní núú tütú-gá núú cǎchí-xi:

Yòhó Dútú Ndiǒxí nchaa-ni nduu nchaa-ni

òré cuìní ñáyiú cahni ñàhá-yu xii-ndí sá  
cuèndá-n,  
te cächí-yu sá cúú-ndí dàtná cue mběé cue quiiti sa  
ndècu túha-ná cahní-yu.

Duha ní cachí téé ní xóo cáhá<sup>n</sup> tnúhu-gá-á<sup>n</sup>, te duca<sup>n</sup>  
ní ngódó tnùní núú tütú-gá.

<sup>37</sup> Te cuèi duca<sup>n</sup> nãndi sá ná càda ñahá-yu xii-o,  
dico vá ndácú-yu nadatùhú-yu iní-ó chi ndacu  
nahi-ni-o yãha-o nchàa sá dúcá<sup>n</sup> ná càda ñahá-yu  
xii-o, te duca<sup>n</sup> chi Xítóhó Jesucrìstú Yaá ío cùu iní  
ñáhá xii-o ndecu ndihí ñaha-gá chíndèe ñaha-gá.

<sup>38-39</sup> Te yúhú cútnùní ndáá iní-í sá ñi ì<sup>n</sup> sá ío ñuyíú-a  
vá ndácú-xí càda-xi cuendá sá vã cúú iní ñáhá-gã  
Yã Ndiõxí xii-o, te ni sã cúú-ó, te ni sã cùndècu-o  
ñuyíú-a, te ni ì<sup>n</sup> espíritú sá ío cùnūu cundihí yucu  
ñávãha te ni ì<sup>n</sup> dava-gá cue espíritú cùndihí-xi vá  
ndácú-xí càda-xi cuendá sá vã cúú iní ñáhá Yã  
Ndiõxí xii-o. Te ni sã cúú ñùyíú-a vitna, te ni sã  
cúú ndèe cuèé-gá, te ni ì<sup>n</sup> sá ndécú àndiú, te ni ì<sup>n</sup> sá  
ndécú ñùyíú-a, te ni ì<sup>n</sup> sá ñi cadúha mee Yã Ndiõxí,  
ni ì<sup>n</sup> xíã<sup>n</sup> vá ndácú-xí càda-xi cuendá sá vã cúú iní  
ñáhá-gã xii-o chi ndècu ndihí-o Xítóhó Jesucrìstú  
Yaá cúú Xítóhó-ó.

## 9

*Yá Ndiõxí ní cachí-gá sá ñáyiú isràel cuú-yu ñáyiú  
canchicú<sup>n</sup> nihnu ñaha xii-gá*

<sup>1</sup> Te yúhú càhá<sup>n</sup> ndáá-í chi cùu-í ì<sup>n</sup> téé ndècu  
ndihí Xítóhó Jesucrìstú, te ndècu ndihí-í Espíritú Yã  
Ndiõxí nūu xíã<sup>n</sup> cútnùní iní-í sá càhá<sup>n</sup> ndáá-í.

<sup>2</sup> Te nchaa-ni nduu nchaa-ni òré ío ndihú iní-í, te  
duca<sup>n</sup>-ni ío quìde úhú-xi iní-í

<sup>3</sup> sá cuendá nchaa ñáyiú cùu ndi mee-í. Te núu òicó cúú-xí ì<sup>n</sup> sá chíndèe ñaha xií-yu nucúndecu váha-yu núú Yá Ndiòxí ñá, te dàña-í mée-í dàcuíta nihnu ñaha Xítóhó Jesucristú núu òicó sá cúú.

<sup>4</sup> Te nchaa ñáyiú cùu ndi mee-í-á<sup>n</sup> cúú-yu ñáyiú isràél, te Yá Ndiòxí ní cachí-gá sá cúú-yu déhe-gá, te ní quide-gá nàcuáa ní cutnùní iní-yu sá ìo càhnu cuu-gá, te ní cáhá<sup>n</sup> ndáá-gá núú-yu nàcuáa cada ñaha-gã xií-yu, te ní xáha<sup>n</sup>-gã xii ndí Moisés ní chídó tnùní ndí nàcuáa cadá-yu cundecú-yu. Te ní xáha<sup>n</sup>-gã xií-yu nàcuáa cadá-yu cada càhnu ñahá-yu xii-gá, te ní xáha<sup>n</sup> tùcu-gá xií-yu nchaa nàcuáa cada-gá ndéé cuéé-gá.

<sup>5</sup> Te nchaa ñáyiú-á<sup>n</sup> cúú-yu ñaní tnáhá nchàa cue téé ní cunuu ní xíndecu ndéé sanaha, te òiu-ni ñaní tnáhá-yu cùu Xítóhó Jesucristú Yaá ní tendaha Dütú Ndiòxí ní quixi ñuyíú-a, te tnáhá-gá cúú-gã Ndiòxí te ìo cùnuu-gá, te nchaa nduu nchaa quíú ìo càhnu cuu-gá. Te duca<sup>n</sup> na cùnduu.

<sup>6</sup> Te vá càchí-ó sã Yá Ndiòxí ñá túú ní quide-gá nchaa nàcuáa ní cachí-gá cada-gá cuendá sá ñà túú sàndáá iní ñáhá dàva ñáyiú isràél xii-gá. Te sá dúcá<sup>n</sup> xíquide dáva-yu te ñá túú quidé-yu nàcuáa tàú-xi cadá-yu sá cúú-yu ñáyiú isràél. Te ñáyiú duca<sup>n</sup> xíquide-á<sup>n</sup> cúú-yu ñáyiú ñá túú cùu cuendá ñáhá Yá Ndiòxí.

<sup>7</sup> Te cuéi ncháá-yu cùú-yu ñaní tnáhá ndíi Àbrahám òico ñá túú quidé-yu nchaa nàcuáa tàú-xi cunduu cadá-yu sá cúú-yu ñaní tnáhá ndíi. Te Yá Ndiòxí ní xáha<sup>n</sup>-gã xii ndí Àbrahám: “Nchaa cue ñaní tnáhá tẽ Isàác téé cùu déhe ducu<sup>n</sup>-n, mee-ni cué ñáyiú-á<sup>n</sup> cuu ñaní tnáhá-n”, duha ní xáha<sup>n</sup>-gã

xii ndíi Àbrahám.

<sup>8</sup> Te xiǎ<sup>n</sup> cútnùnì iní-ó sǎ ñǎ ncháá ñǎyiu cùu ñanì tnháá ndíi Àbrahám cúu-yu ñáyiu cùu cuendá Yǎ Ndiǒxí, chi mee-ni ñáyiu sàndáá iní nàcuáa ní cáhá<sup>n</sup>-gá cada-gá, ñáyiu-á<sup>n</sup> cúú cuendá-gá.

<sup>9</sup> Te duha ndùu tnúhu ní xáha<sup>n</sup> Yǎ Ndiǒxí xii ndíi Àbrahám: “Sáá nduu te yúhú cada-í te coo ì<sup>n</sup> déhe-n ndìhì ñadihì-n tǎ Sǎrá”, duha ní xáha<sup>n</sup>-gǎ xii ndíi.

<sup>10</sup> Te ñá díú-ní xiǎ<sup>n</sup> ní quide Yá Ndiǒxí, chi tnháá ní ndatnúhu-gá ndìhì ndíi Rèbecá cútnàhá vitna ñùhu úú déhe ndíi ndìhì ndíi Isàác téé ní cuu ñanì tnháá-ó nì xíndecu ndéé sanaha.

<sup>11-13</sup> Te cútnàhá vitna ñùhu-gá déhe ndíi Rèbecá, cútnàhá vátá cádá-gǎ-güexi ni ì<sup>n</sup> sá cuèhé sá dúhá, te ni ì<sup>n</sup> sá vǎha, ní xáha<sup>n</sup> Yǎ Ndiǒxí xii ndíi: “Déhe-n tée díhna na càcu te téé-á<sup>n</sup> tñii-dé nchaa tnúhu cáhá<sup>n</sup> déhe-n tée cùu uú ná càcu”, duha ní xáha<sup>n</sup>-gǎ xii ndíi Rèbecá. Te ní queue ndáá-xi nàcuáa ní cáhá<sup>n</sup> Yǎ Ndiǒxí núú tütú-gá núú càchí-xi: “Té Jácób ní cuu váha iní-í núú-dě, te té Esàú ñá túú ní cùu váha iní-í núú-dě”, duha càchí-gá núú tütú-gá. Te duca<sup>n</sup> ñǎ cuu chi duca<sup>n</sup> ñǎ cachí méé-gǎ cunduu sá càhá<sup>n</sup>-gá nchaa ñáyiu cuiní méé-gǎ, te ñá díú cuendá ì<sup>n</sup> chùu<sup>n</sup> quidé-yu càhá<sup>n</sup> ñáhá-gǎ xií-yu.

<sup>14</sup> Te vá cúú tnháí cáhá<sup>n</sup>-ó sǎ Yǎ Ndiǒxí ñá túú quide váha-gá sá dúcá<sup>n</sup> quide-gá chi mee-gǎ ío ndáá quidé-gǎ!

<sup>15</sup> Te mee-gǎ ní xáha<sup>n</sup>-gǎ xii ndíi Moisés: “Cundàhú iní-í chindee-í mee-ni cuè ñáyiu càchí iní-í”, duha ní xáha<sup>n</sup>-gǎ xii ndíi.

<sup>16</sup> Te xiǎ<sup>n</sup> cútnùnì iní-ó sǎ cundàhú iní-gá ñáyiu chi duca<sup>n</sup> cuiní méé-gǎ cunduu, dico ñá



túú cùndahú iní ñáhá-gă xií-yu cuendá sá dúcá<sup>n</sup> cuení-yu cada-gá, te ni ñà túú cùndahú iní ñáhá-gă xií-yu cuendá sá ïo ndùcu ndeé-yu quidé-yu ñ<sup>n</sup> sá quidě-yu.

<sup>17</sup> Te núú tütú Yă Ndiöxí càhá<sup>n</sup>-xi nàcuáa ní xáha<sup>n</sup>-gă xii téé ní cuu Faràón téé ní xíndaha nàció<sup>n</sup> Ègiptú, te duha ní xáha<sup>n</sup>-gă: “Yúhú ní quide-í yíndàha-n ñáyíu cuendá cada-í títí ní núú să cáda-í núú-n cuendá cutnùní iní-n să ïo càhnu cuu-í, te duca<sup>n</sup> nchaa ñáyíu ñuyíú cutnùní iní-yu sá yúhú cúu-í Ndiöxí”, duha ní xáha<sup>n</sup>-gă xii téé ní cuu Faràón.

<sup>18</sup> Te xiá<sup>n</sup> cútnùní iní-ó să Yă Ndiöxí cùndàhú iní-gá mee-ni cuè ñáyíu càchí iní méé-gă, te duca<sup>n</sup> ndàda dí-gá iní nchaa ñáyíu càchí iní méé-gă duca<sup>n</sup> càda-gá.

<sup>19</sup> Te sá dúhá càhá<sup>n</sup>-í te dava-ndo quèsaha-ndo: “Ná cuendá Yă Ndiöxí dácàa-gá cuéchi díquí ñáyíu núu ni ñ<sup>n</sup>-yu ñá ndácũ-yu quehndé nihnú-yu cuendá sá vă cáda Yă Ndiöxí nàcuáa cuení-gá”, quésaha-ndo.

<sup>20</sup> Te chí cuăha cuendá sá dícó ñáyíu ñuyíú-a cùu-ndo te ñá túú ndùu váha-xi sá nchòhó cáhá<sup>n</sup>-ndó ñ<sup>n</sup> tnúhu sá ñà túú ndùu váha sá cúú-xí Yă Ndiöxí. Te duha na càhá<sup>n</sup>-í núú-ndó nàcuáa tecú tnùní-gá-ndó nàcuáa ndùu tnúhu càhá<sup>n</sup>-í. Te ñá túú xíní-ó să ñ<sup>n</sup> quídí ñuhu cúñaha-xi xì ñáyíu ní cadúha ñaha xì-xí: “Ná cuendá duha ní cadúha ñaha-n xì-í”, cúñaha-xi.

<sup>21</sup> Chi ñáyíu càdúha nchaa quídí-á<sup>n</sup> cuu-ni cadúha-yu ndihí ñuhu cuèi nása na cùnduu quídí cadúha-yu canehe chiú<sup>n</sup>-yu, chi ñ<sup>n</sup>-ni ñùhu cadúha-yu quídí cánehe chiú<sup>n</sup>-yu ndi tnahá nduu

sàcòo-yu vico ndihì quídi sá cǎnehe chiù<sup>n</sup>-yu nduu cùtexínu.

22 Te ñiu-ni duca<sup>n</sup> quide Yá Ndiöxí, chi cuení-gá dandòho-gá ñáyiu ñá túú quide nchaa nacuáa nduu vétú iní-gá, te cada-gá nàcuáa cutnùní iní-yu sá ïo càhnu cuu-gá. Te sa ndècu túha-ná-yu sá quihí<sup>n</sup>-yu núú ùhú núú ndàhú, te cuèi duca<sup>n</sup> dico ío ta quide cahnu iní-gá cuáhá<sup>n</sup>.

23 Te duca<sup>n</sup> quide-gá cuendá cutnùní iní nchaa ñáyiu ñuyúú sǎ ïo váha quide-gá sá cúú-xí nchàa nchoo ñáyiu cùndahú iní-gá, chi ní cachí-gá sá nchóo cuè ñáyiu cùndahú iní-gá nduu táhú-ó cùndecu-o ndihì-gá núú ïo váha cǎa ndecu-gá.

24 Te dava nchoo ñáyiu ní cáhá<sup>n</sup> Yǎ Ndiöxí cúú-ó ñáyiu isràél, te dava-o cùu-o ñáyiu ñá túú cùu ñáyiu isràél.

25 Te ní quee ndáá-xi nàcuáa ní xáha<sup>n</sup> Yǎ Ndiöxí xii ndíi Òseás tée ní xóo cáhá<sup>n</sup> tnúhu-gá ndéé sanaha ñǎ chídó tnùní ndíi núú tütú-gá núú càchí-xi:

Ñáyiu ñá túú cùu cuendá-í ní cùu te nduu cuendá-í-yu,

te ñiu-ni ñáyiu-á<sup>n</sup> ñà túú cùu váha iní-í núú-yu ni cùu, dico vitna cùu váha iní-í núú-yu.

26 Te ñiu-ni ñuú núú dúcá<sup>n</sup> ñǎ cachí-í sá ñà túú ñáyiu cùu cuendá-í ñiu-ni ñuú-á<sup>n</sup> coo ñáyiu cuu déhe yúhú Dútú Ndiöxí Yaá ndécú tǔu andíu.

Duha ní xáha<sup>n</sup> Yǎ Ndiöxí xii ndíi Òseás ní chídó tnùní ndíi núú tütú-gá.

27 Te ndíi Chàíá tée ní xóo cáhá<sup>n</sup> tucu tnúhu Yá Ndiöxí ndéé sanaha ñǎ cáhá<sup>n</sup> ndíi cuendá ñáyiu isràél, te duha ní cachí ndíi: “Cuèi cuéhé víhí

ñáyiú isràél dàtná cuéhé ñuhu cúchí làmár dico sacú-ni-yu vá quíní-yu tnúndòho tnúhu ndàhú.

<sup>28</sup> Te Yá Ndiöxí ío ndìhì cada-gá nchaa nàcuáa càhá<sup>n</sup>-gá ñuyíú”, duha ní cachí ndíi.

<sup>29</sup> Te ní cáhá<sup>n</sup> tucu ndíi nàcuáa cada-xi ndéé cuéé-gá, te ní cachí ndíi:

Yá Ndiöxí Yáá táxí tnùnì nchaandi túhú sá ío andiú ndìhì ñuyíú ñà túú ní dànaa-gá nchaa ñáyiú isràél, chi núu ni ndìhì-yu danàa ñaha-gá, te nchoo cùu-o datná ní cuu nchaa ñáyiú ní xíndecu ñúú Sòdomá ndìhì nchaa ñáyiú ní xíndecu ñúú Gòmorrá, te ndìhì-o nàa datná ní naa nchaa ñáyiú-á<sup>n</sup> ní cùu.

Duha ní cachí ndíi.

*Ñáyiú isràél ñá túú sàndáá iní-yu tnúhu Xítóhó Jesucrìstú*

<sup>30</sup> Te sá cuèndá xíá<sup>n</sup> nùu vitna càchí tnúhu-í xii-ndo sã cué ñáyiú ñá túú cùu ñáyiú isràél ñá túú ní nànducu nihnú-yu nàcuáa cadá-yu cudíú-yu núú Yá Ndiöxí, dico vitna cùdìú-yu núú-gã chi ní sàndáá iní-yu Xítóhó Jesucrìstú.

<sup>31</sup> Te ñáyiú isràél nchìcú<sup>n</sup> nihnú-yu tnúhu sá dánèhé ñáhá xíi-yu nàcuáa cadá-yu cudíú-yu núú Yá Ndiöxí dico ñá túú cùdìú-yu núú-gã chi ñá ndácũ-yu cadá-yu nchaa nàcuáa càhá<sup>n</sup>-xí.

<sup>32</sup> Te duca<sup>n</sup> ñà túú cùdìú-yu núú Yá Ndiöxí chi ñá túú sàndáá iní-yu Xítóhó Jesucrìstú, te sàni iní-yu sá sã cuèndá mee-ni nchaa sá quidé mèé-yu cudíú-yu núú-gã, te sá dúcá<sup>n</sup> quidé-yu te cùú-yu dàtná ì<sup>n</sup> ñáyiú nguñenu ì<sup>n</sup> yúú te ndùá-yu. Te duca<sup>n</sup> sãtnahá-xi cùú-yu chi ñá túú cùu váha iní-yu núú Xítóhó Jesucrìstú.

33 Te quèe ndáá-xi nàcuáa ní cáhá<sup>n</sup> Yă Ndiöxí ì<sup>n</sup> xichi núú tütú-gá núú càchí-xi:  
 Yúhú táxí ndècu-í ì<sup>n</sup> téé ñuú Sìon, te cuu-dé dàtná ì<sup>n</sup> yúú, te yúú-ă<sup>n</sup> nguñenu ñáyiu te nduá-yu,  
 te nchaa ñáyiu na quëndáá iní ñáhá xii-dé, te vá ndíxí cuèchi iní-yu sá dúcá<sup>n</sup> ñí sándáá iní ñáhă-yu xii-dé.  
 Duha càchí-gá núú tütú-gá.

## 10

1 Te nchòhó ñáyiu ndècu ndihi-í ichi Xítohó Jesucristú càchí tnúhu-í xii-ndo sá cáhá<sup>n</sup> ndihi-í Yă Ndiöxí cuèdá ñáyiu israél, chi ìo cuìní-í sá náníhí tãhú-yu.

2 Te na cáhá<sup>n</sup> ndáá-í cuèdá-yu sá ìo ndùcu ndeé-yu xinu cuechí-yu núú Yă Ndiöxí, te dìcò-ni sá ñà túú quidè-yu nàcuáa cuìní méé-gă cadá-yu.

3 Chi ñá túú quide cuèdá-yu nàcuáa cuìní Yă Ndiöxí cada ñaha-gă xií-yu nàcuáa cudíú-yu núú-gă, te quide-ní-yu nàcuáa sàni iní méè-yu cudíú-yu núú-gă te ñá túú cuìní-yu tní-yu tnúhu cáhá<sup>n</sup>-gá nàcuáa cudíú-yu núú-gă.

4 Te Xítohó Jesucristú ní quide-gá cuèdá sá vă cúnù-gá nchaa tnúhu ní chídó tnùní ndíi Moisés, te nchaa ñáyiu na quëndáá iní ñáhá xii-gá te diu-gá cada te cudíú-yu núú Yă Ndiöxí.

5 Te ndíi Moisés cáhá<sup>n</sup> ndíi núú tütú ndíi cuèdá ñáyiu cuìní cudíu núú Yă Ndiöxí cuèdá sá nchicú<sup>n</sup> nihnú-yu nchaa nàcuáa ní cáhá<sup>n</sup> ndíi. Te ní cachí ndíi sá ncháá ñáyiu na càda nchaa nacuáa ní xáhá<sup>n</sup> Yă Ndiöxí xii ndíi ní chídó tnùní ndíi te naníhí

tàhú-yu, te núu dìcò ndacú-yu cadá-yu nchaa nàcuáa ní cáhá<sup>n</sup> ndíi.

<sup>6</sup> Dico vitna núu na quìndáá iní-ó Xítóhó Jesucristú, te cudìu-o núu Yă Ndiöxí. Te duha càchí tnúhu ní chídó tnùní ndíi núu tütú-gá: “Vá cání iní-ndó sǎ xíní ñùhu-xi cada-ndo #<sup>n</sup> sá vǎ yǒo tnàhí ndàcu cada sá cáá tǔu-ndo àndìu te cúñaha-ndo xìi Cristú cuu<sup>n</sup>-ndo ndìhi-gá núu ñùyíú-a.

<sup>7</sup> Te ni vǎ cání tǔcu iní-ndó sǎ quìhí<sup>n</sup> túu-ndo núú xǐndecu nchaa ñáyiu ní xíhí te cada-ndo sǎ Crìstú ndoto-gá”, duha càchí tnúhu-á<sup>n</sup> sǎ vǎ dúcá<sup>n</sup> càni iní-ó.

<sup>8</sup> Te càchí tucu tnúhu-á<sup>n</sup>: “Tnúhu Yá Ndiöxí sá ndécú ndìhi ñaha-xi xii-ndo chi sàni iní-ndó cuendá tnúhu-á<sup>n</sup> te càhá<sup>n</sup>-ndó”, duha càchí tnúhu-á<sup>n</sup>. Te tnúhu sá ndécú ndìhi-ndo-á<sup>n</sup> cúú-xí tnùhu càhá<sup>n</sup>-ndí núú ñáyiu, te xìni ñuhu-xi sá quìndáá iní-yu tnúhu-á<sup>n</sup>.

<sup>9</sup> Te núu na nǔnuu-ndo càhá<sup>n</sup>-ndó sǎ Xítóhó Jesucristú cúú-gǎ Xítóhó-ndó, te quìndáá iní-ndó nì yuhu ni iní-ndó sǎ Yă Ndiöxí ní dándótó-gǎ Xítóhó Jesucristú, te naníhí tàhú-ndó te núu duca<sup>n</sup> na càda-ndo.

<sup>10</sup> Te nchaa ñáyiu duca<sup>n</sup> sàndáá iní te càhá<sup>n</sup>-yu sá Xítóhó Jesucristú cúú-gǎ Xítóhó-yu, ñáyiu-á<sup>n</sup> cúdìú-yu núu Yă Ndiöxí te nàníhí tàhú-yu.

<sup>11</sup> Te núu tütú Yă Ndiöxí càchí-xi sá nì #<sup>n</sup> ñáyiu sàndáá iní ñáhá xìi Xítóhó Jesucristú vá ndíxí cuèchi iní-yu sá dúcá<sup>n</sup> sàndáá iní ñáhǎ-yu xii-gá.

<sup>12</sup> Te sá cúú-xí Xítóhó Jesucristú chi #<sup>n</sup>-ni cùu ñáyiu isràèl ndìhi ñáyiu ñá túú cùu ñáyiu isràèl, chi ñìu-gá cúú-gǎ Yaá cúnùu taxi tnuní-gá nchaa ñáyiu,

te ío váha quíde-gá sá cúú-xí nchàa ñáyiú càhá<sup>n</sup> ndíhi ñaha xì-gá.

13 Te quèe ndáá-xi nàcuáa càhá<sup>n</sup>-xi núú tütú Yá Ndiöxí núú càchí-xi: “Nchaa ñáyiú na càhá<sup>n</sup> ndàhú núú Xítohó Jesucrístú sá dácăcu nihnu ñaha-gă xii-yu, te ñáyiú-á<sup>n</sup> naníhí tàhú-yu”, duha càchí-xi núú tütú-gá.

14 Te ñáyiú-á<sup>n</sup> vă nihí-yu nàcuáa cáhá<sup>n</sup> ndàhú-yu núú-gă te núú ñá túú sàndáá iní ñáhă-yu xii-gá, te ni vă nihí-yu nàcuáa cadá-yu quindáá iní ñáhă-yu xii-gá te núú vátá cündedóho-gá-yu tnúhu-gá, te ni vă nihí-yu tnúhu-gá te núú vá yôo quíhí<sup>n</sup> cútnuhu ñaha xì-yu.

15 Te ni vă yôo quíhí<sup>n</sup> duca<sup>n</sup> cútnuhu ñaha xii-yu tnúhu-gá te núú Yá Ndiöxí vá téndàha-gá ñáyiú quíhí<sup>n</sup> cútnuhu ñaha xì-yu. Te núú tütú Yá Ndiöxí càchí-xi: “Ío vii ío váha cùu iní-ó vëxi ñáyiú dànehé ñáhá xì-o nacuáa ndùu tnúhu sá càhá<sup>n</sup> nàcuáa naníhí tàhú-ó”, duha càhá<sup>n</sup>-xi núú tütú-gá.

16 Te ñá ncháă-yu cuiní-yu quindáá iní-yu tnúhu-á<sup>n</sup>. Te ní quee ndáá-xi nàcuáa ní xáha<sup>n</sup> ndí Chàjá xii Yá Ndiöxí te duha ní xáha<sup>n</sup> ndí xii-gá: “Yòhó Dútú Ndiöxí na nàcani tnúhu-í núú-n să ío sacú-ni ñáyiú sàndáá iní-yu tnúhu càhá<sup>n</sup>-ndí”, duha ní xáha<sup>n</sup> ndí xii-gá.

17 Te xini ñuhu-xi sá dǐhna-gá cundedóho-yu tnúhu-á<sup>n</sup> cuendá duca<sup>n</sup> te quindáá iní-yu, te tnúhu-á<sup>n</sup> cúú-xí tnúhu Xítohó Jesucrístú.

18 Te vá cúú cáhá<sup>n</sup>-ó să ñà túú ní níhí ñáyiú isràél tnúhu-gá, chi ncháá-yu ní níhí-yu tnúhu-gá, chi núú tütú Yá Ndiöxí càchí-xi:

Cue téé ní cáhá<sup>n</sup> tnúhu Yá Ndiöxí ní cáhá<sup>n</sup>-güedé  
 tnúhu-gá núú ñáyiú,  
 te tnúhu-á<sup>n</sup> ní xíté nuu-xi nihí ñuyíú.  
 Duha càchí-xi núú tütú-gá.

<sup>19</sup> Te ni vǎ càhá<sup>n</sup>-ó sǎ ñáyiú isràél ñá túú ní cùu  
 tnuní iní-yu nàcuáa ndùu tnúhu-gá chi ní tecú  
 tnùní-yu. Te ndéé sanaha ñí chídó tnùní ndíi  
 Moisés nàcuáa ní xáha<sup>n</sup> Yá Ndiöxí xii ñáyiú isràél,  
 te duha ní xáha<sup>n</sup>-gǎ xií-yu:

Yúhú cada váha-í nchaa ñáyiú ñá túú cùu ñáyiú  
 isràél, ñáyiú ñá túú cùtnuní iní-xi nàcuáa  
 cada váha cundecu núù-í,  
 te nchòhó cudéé<sup>n</sup>-ndó nǔú-yu te cuu cuédú  
 íní-ndǒ-yu.

Duha ní xáha<sup>n</sup> Yá Ndiöxí xií-yu te duca<sup>n</sup> ñí chídó  
 tnùní ndíi Moisés.

<sup>20</sup> Te ndíi Chàíá ñá túú tnàhí ni yùhú ndíi ní quide  
 ndíi núú Yá Ndiöxí ní cáhá<sup>n</sup> ndíi tnúhu-gá, te ní  
 cachí ndíi:

Ñáyiú ñá túú nànducu ñaha xii-í ní cùu ní naníhí  
 ñáhǎ-yu xii-í,  
 te ni ñà túú ndùcu tnúhu ñàhá-yu xii-í ní cùu te ní  
 xiní ñáhǎ-yu.

Duha ní cachí ndíi Chàíá ní cáhá<sup>n</sup> ndíi tnúhu Yá  
 Ndiöxí.

<sup>21</sup> Te ní quide tucu ndíi núú Yá Ndiöxí ní cáhá<sup>n</sup>  
 ndíi tnúhu-gá cuèndá ñáyiú isràél, te ní cachí ndíi:  
 “Nchaa-ni nduu yìhí-í càhá<sup>n</sup>-í ñáyiú isràél te ñá túú  
 cuíní-yu quíndáá iní-yu chi ío sàá iní-yu”, duha ní  
 cachí ndíi Chàíá ní cáhá<sup>n</sup> ndíi tnúhu Yá Ndiöxí.

## 11

*Cuèndá ñáyiú isràél ñáyiú naníhí tàhú*

1 Te cuëi duca<sup>n</sup> dico vá càhá<sup>n</sup>-ó sǎ Yǎ Ndiõxí dáquèè tíhú-gǎ ñáyiú isràél chi ñiú-ni ñáyiú-á<sup>n</sup> cúú cuèndá-gá, chi yúhú tnàhá-í cúú-í mei tée isràél, te ñaní tnàhá-í ní cuu ndíi Àbrahám tée ní xíndecu ndéé sanaha víhi-gá, te ñiú-ni ñaní tnàhá-í ní cuu tucu ndíi Benjàmín.

2 Te ndéé sanaha dùca<sup>n</sup> ní cachí Yǎ Ndiõxí sá nchùhú ñáyiú isràél cúú-ndí ñáyiú cùu cuendá-gá, te ñá túú dàquee tíhú ñáhá-gǎ xii-ndí, te nchòhó sa xíní-ndó nàcuáa càhá<sup>n</sup>-xí núú tùtú Yǎ Ndiõxí núú càchí-xi nàcuáa ní quide té Èliás ní ndacá<sup>n</sup> cuéchi-dé núú-gǎ cuèndá ñáyiú isràél.

3 Te duha ní xáha<sup>n</sup>-dě xii-gá: “Yòhó Dútú Ndiõxí, ná nàcani tnúhu-í núú-n sǎ ñí sahní-yu cue tée càhá<sup>n</sup> tnúhu-n, te ní dátànú-yu núú xíhí quiti ndùu táhú-n, te yúhú-nǎ ní cácu-í ndécù-í dico nànducu ñahá-yu chi tnàhá-í cùmí-yu cahni ñahá-yu xii-í”, duha ní xáha<sup>n</sup>-dě xii Yá Ndiõxí.

4 Te Yá Ndiõxí ní xáha<sup>n</sup>-gǎ xii-dé: “Sa ní dáquéeé ñí<sup>n</sup>-í úsá mǐl cue tée cùu cuendá-í, te ñá túú nèhe-güedé sá yíñùhu núú Bàál sá càchí-yu cùu ndiõxí-yu te ñá ndàá sá ndiõxí cúú-xí”, duha ní xáha<sup>n</sup>-gǎ xii té Èliás.

5 Te duca<sup>n</sup> sǎtnahá-xi cùu vitna chi xíndecu ñáyiú ní cáhá<sup>n</sup>-gá ní chìtnahá ñáhá xii-gá, te duca<sup>n</sup> ñí quide-gá chi ní cundàhú iní ñáhá-gǎ xií-yu.

6 Te duca<sup>n</sup> ñí cáhá<sup>n</sup> ñáhá-gǎ xií-yu sá cùndàhú iní ñáhá-gǎ, te ñá díú cuèndá ñí<sup>n</sup> chù<sup>n</sup> quidé-yu duca<sup>n</sup> nì cáhá<sup>n</sup> ñáhá-gǎ xií-yu, chi núú ñí<sup>n</sup> cuèndá ñí<sup>n</sup> chù<sup>n</sup> quidé-yu duca<sup>n</sup> nì cáhá<sup>n</sup> ñáhá-gǎ xií-yu ña, te ñá díú-gǎ sá cúú ñí<sup>n</sup> méé-gǎ duca<sup>n</sup> nì cáhá<sup>n</sup> ñáhá-gǎ xií-yu te núu duca<sup>n</sup>.



<sup>7</sup> Te na cǎchí tnúhu-í xii-ndo nàcuáa cùu vitna sá ñáyiú isràél cuíní-yu cudíú-yu núú Yă Ndiǒxí dico ñá ndácũ-yu, dico dava ñáyiú ní cǎhá<sup>n</sup>-gá ñáyiú-á<sup>n</sup> cúdiú-yu núú-gă, te ñáyiú duca<sup>n</sup> ñà túú cùdiú núú-gă-á<sup>n</sup> ïo ní cuu sàá iní-yu núú-gă.

<sup>8</sup> Te ní quee ndáá-xi nàcuáa cǎhá<sup>n</sup>-xi núú tütú Yă Ndiǒxí núú cǎchí-xi: “Yă Ndiǒxí ní cachí-gá sá cùu-yu ñáyiú ïo nîi díquí-xi, chi cuëi ndèhé-yu nàcuáa cǎhá<sup>n</sup> tnúhu-gá dico ñá cútnùní iní-yu nàcuáa cǎhá<sup>n</sup>-xi, te cuëi ndèdóho-yu dico ñá túú quëe díquí-yu, te duca<sup>n</sup>-ni quidé-yu ndéé vitna”, duha cǎchí-xi núú tütú-gá.

<sup>9</sup> Te ndíi Dàvíí ní cachí ndíi: Ñáyiú ïo váha ndècu te cùdíi iní-yu quidé-yu vico, dico yáha-yu dàtná yáha ï<sup>n</sup> quití ngáva trampá àdi ï<sup>n</sup> quití ñá cútnùní iní-xi quëe xítí ñunu, chi cuíta nihnú-yu te nacháhu-yu nchaa sá quidě-yu.

<sup>10</sup> Te cùu-yu ñáyiú ñá túú vëdana tècú tnùní, te cùu tucú-yu dàtná ï<sup>n</sup> ñáyiú ïo ndòho nchido ï<sup>n</sup> sá vëe.

Duha ní cachí ndíi Dàvíí.

### *Ñáyiú ñá túú cùu ñáyiú isràél naníhí tàhú-yu*

<sup>11</sup> Te cuëi duca<sup>n</sup> dico vá cǎchí-ó sǎ sà dúcá<sup>n</sup> ñà túú ní quide ndáá ñáyiú isràél te ní xíta nihnu duú<sup>n</sup>-yu, te ñáhá chi sá dúcá<sup>n</sup> nî quidé-yu te ní ngúndecu ndíhi dava-gá ñáyiú tnúhu sá cǎhá<sup>n</sup> nàcuáa naníhí tàhú-yu, te ñáyiú isràél quiní-yu nàcuáa naníhí tàhú ñáyiú ñá túú cùu ñáyiú isràél, te tnàhá-yu cudíi iní-yu naníhí tàhú-yu.

<sup>12</sup> Te sá dúcá<sup>n</sup> nî quide sàá iní-yu ñá túú ní quide ndáá-yu núú Yă Ndiǒxí, te xíá<sup>n</sup> ní cuu-xi ï<sup>n</sup> sá

váha sá cúú-xí ñáyiú ñihí ñuyúú, dico sáá nduu te cada ñáyiú isràél nchaa nàcuáa càhá<sup>n</sup> Yá Ndiöxí, te dàvá-á<sup>n</sup> ío-gá váha cuu xii nchaa ñáyiú ñihí ñuyúú.

13 Te nchòhó ñáyiú ñá túú cùu ñáyiú isràél càchí tnúhu-í xii-ndo sã Yá Ndiöxí ní cachí-gá sá càhá<sup>n</sup>-í tnúhu-gá núú-ndó, te yúhú càchí-í sá ío càhnu cuu chiu<sup>n</sup> quide-í.

14 Te duha càhá<sup>n</sup>-í cuèndá sá nõu cudana ìó dava ñáyiú cùu ndi mee-í cudíí ìní-yu cada váha ñaha Yá Ndiöxí xii-yu dàtná quidé váha ñaha-gã xii-ndo, te naníhí tàhú-yu.

15 Te sá cuèndá sá ñí quee tíhú ñáyiú isràél ní nacáhá<sup>n</sup> cáhnú ìní tnáhá ñáyiú ñihí ñuyúú ndihí Yá Ndiöxí, dico na sáá nduu núcúndecu váha ñáyiú isràél ndihí Yá Ndiöxí, te ío-gá váha tnahá ñáyiú ñihí ñuyúú, te ñáyiú-á<sup>n</sup> cada iní-ó sã cúú-yu dàtná ñáyiú ní xíhí, dico dàvá-á<sup>n</sup> cada tucu iní-ó sã cúú-yu dàtná ñáyiú ní ndoto chi nucúndecu váha-yu ndihí-gá.

16 Te núu sá lúhá-ní ñí<sup>n</sup> tílúlú yusa<sup>n</sup> càváha te ñiu-ni duca<sup>n</sup> càváha ñihí. Te núu càváha yóho ñí<sup>n</sup> yutnu te ñiu-ni duca<sup>n</sup> càváha-xi ñihí-xi. Te ñiu-ni duca<sup>n</sup> sãtnahá-xi cùu ñáyiú isràél, chi ñaní tnáhã-yu ní xíndecu ndéé sanaha ñí cuú-yu ñáyiú ní cuu cuèndá ñáhá Yá Ndiöxí, te ñiu-ni duca<sup>n</sup> cùu cuèndá ñáhá-gã xii mèé-yu ndéé vitna.

17 Te ìó ñí<sup>n</sup> yutnu váha nàni olívú, te dava dité yutnu-á<sup>n</sup> ñí téhndé te ní nucódó dité yutnu òlívú cùtexínu, te mee-ñã yutnu òlívú váha-á<sup>n</sup> ío váha quide-xi nchito dité yutnu òlívú cùtexínu-á<sup>n</sup>. Te dité nchaa yutnu òlívú váha-á<sup>n</sup> cúú-xí dàtná ñáyiú isràél, te nchaa dité-xi sá ñí téhndé-á<sup>n</sup> cúú-xí ñiu-ni ñáyiú isràél ñáyiú ñá túú tnáhá tnúhu ndihí Yá

Ndiöxí. Te dité yutnu òlívú cùtexínu sá nǐ nucódó tñáhá-ǎ<sup>n</sup> cúú-xí dàtná ñáyíu ñá túú cùu ñáyíu isràél tñáhá tñúhu ndìhì Yá Ndiöxí.

<sup>18</sup> Te vá cání iní-ndó sǎ sá dúcá<sup>n</sup> ndècu váha-ndo ndìhì Yá Ndiöxí te ío cùnūu-ndo dacúúxí ñáyíu isràél, te vá dúcá<sup>n</sup> cání iní-ndó chí sá cuèndá nchaa ñaní tñáhá ñáyíu isràél ní xíndecu ndéé sanaha duca<sup>n</sup> ndècu váha-ndo ndìhì Yá Ndiöxí vitna, te ñá díú sǎ cuèndá nchòhó ndécú ndìhì váha ñáyíu-á<sup>n</sup> Yá Ndiöxí vitna.

<sup>19</sup> Te cudana sàni iní-ndó te càchí-ndó sǎ ñáyíu isràél ní quee tíhǔ-yu cuèndá sá nchòhó nucuíñí-ndó nǔǔ-yu nucúndecu váha-ndo ndìhì Yá Ndiöxí.

<sup>20</sup> Te ndáá sá nǐ quee tíhǔ-yu chí ñá túú ní sàndáá iní ñáhǎ-yu xii-gá, te nchòhó ío váha cùu ndecu-ndo ndìhì-gá chí ní sàndáá iní-ndó-gǎ, dico vá càchí-ndó sǎ ío càhnu cuu-ndo, te ío váha chí cuǎha cuèndá nàcuáa cundecu-ndo.

<sup>21</sup> Te cue ñáyíu isràél cúǔ-yu ñáyíu cùu cuendá-gá ní cùu te ní dáquéé tíhú ñáhǎ-gǎ xii-yu cuèndá sá ñá túú ní sàndáá iní ñáhǎ-yu xii-gá, te tñáhá nchòhó daquèe tíhú ñáhǎ-gǎ xii-ndo te núu na càda-ndo datná ní quide ñáyíu-á<sup>n</sup>.

<sup>22</sup> Te chí cáda cuèndá sá Yá Ndiöxí ío váha iní-gá, dico cùdéé<sup>n</sup>-gǎ núu nchaa ñáyíu ñá túú sàndáá iní ñáhǎ xii-gá, dico sá cúú-xí nchòhó cue ñáyíu sàndáá iní ñáhǎ xii-gá chí ío váha iní-gá. Te duca<sup>n</sup>-ni cùnūu váha iní-gá sá cúú-xí-ndó te núu vá dáña ndéé-ndó càda-ndo nacuáa càhá<sup>n</sup>-gǎ cuèndá sá ío váha iní-gá, te núu ñáhǎ te tñáhá nchòhó quee tíhú-ndó dàtná ní quee tíhú ñáyíu isràél, ñáyíu ñá túú ní sàndáá iní ñáhǎ xii-gá.

23 Dico núu ñáyiu isràél ñáyiu ní dáquéé tìhú ñáhá Yă Ndiõxí quíndáá iní ñáhă-yu xii-gá te nduu cuëndá ñáhá tùcu-gá xií-yu, te ñáyiu-á<sup>n</sup> cúũ-yu dàtná dava dité yutnu òlívú sá ñí téhndé te ní nucódó tnáhá tùcu. Te duca<sup>n</sup> sãtnahá-xi cùú-yu te núu na quíndáá iní ñáhă-yu xii-gá.

24 Te nchòhó cúú-ndó dàtná nchaa dité yutnu òlívú cùtexínu, chi ñá díú ñáyiu isràél cúú-ndó, te dité nchaa yutnu òlívú cùtexínu-á<sup>n</sup> ñí nucódó-xi núú dité yutnu òlívú váha-á<sup>n</sup>. Te yáchí-gá nucúndecu váha ñáyiu isràél ndihí Yă Ndiõxí, chi cùú-yu dàtná nchaa dité yutnu òlívú váha sá ñí téhndé te ní nucódó tnáhá tùcu. Te duca<sup>n</sup> sãtnahá-xi cùú-yu te núu na quíndáá iní ñáhă-yu xii-gá.

### *Sáa nduu te naníhí tàhú ñáyiu isràél*

25 Te nchòhó ñáyiu ndècu ndihí-í ichi Xítóhó Je-sucrístú, na càchí tnúhu-í xii-ndo ñ<sup>n</sup> tnúhu ndùu yuhu ni cuu, cuëndá sá vă cání ìní-ndó sã ïo-gá váha sàá díquí-ndó dàcúúxí ñáyiu isràél, chi dava ñáyiu isràél cúú sàá iní-yu núú Yă Ndiõxí ñini na ndihí ñáyiu ní cachí Yă Ndiõxí ngúndecu váha ndihí ñáhă-yu xii-gá, ñáyiu ñá túú cùu ñáyiu isràél.

26 Te nduu na ndihí ñáyiu-á<sup>n</sup> ngúndecu váha-yu ndihí Yă Ndiõxí, te dàvá-á<sup>n</sup> naníhí tàhú ñáyiu isràél chi quee ndáá-xi nàcuáa càhá<sup>n</sup> Yă Ndiõxí núú tütú-gá núú càchí-xi:

Ndàa ñuú Sión quixi Yaá cada naníhí tàhú nchaa ñáyiu,  
te diu-ni Yaá-á<sup>n</sup> cada-gá cuëndá sá dáñá nchaa ñáyiu isràél ichi cuèhé ichi duha.

27 Te yúhú cada càhnu iní-í nchaa cuéchi ñáyiú isràél, chi cada-í dàtná ní cachí-í ndéé sanaha. Duha càchí Yă Ndiöxí núú tùtú-gá.

28 Te sá cuèndá tnúhu sá càhá<sup>n</sup> nàcuáa naníhí tàhú-ó xiă<sup>n</sup> cúú ùhú iní ñáyiú isràél Yă Ndiöxí, te sá dúcá<sup>n</sup> quidé-yu xiă<sup>n</sup> nchòhó ní níhí-ndó tnúhu sá càhá<sup>n</sup> nàcuáa naníhí tàhú-ndó. Te ní cachí Yă Ndiöxí sá ñáyiú isràél cuu cuèndá-gá, te cùu iní ñáhá-ní-gă xií-yu, te duca<sup>n</sup> quide-gă chi duca<sup>n</sup> ñí xáha<sup>n</sup>-gă xii cue ñaní tnáhă-yu ní xíndecu ndéé sanaha.

29 Te Yă Ndiöxí ñá túú ndùu úhú iní-gá ì<sup>n</sup> sá táxí-gă, te ni ñà túú ndìxi cuéchi iní-gá sá càhá<sup>n</sup> ñáhá-gă xii-o.

30 Te nchòhó chi ñá túú sàndáá iní-ndó Yă Ndiöxí ní cùu, dico vitna ñini ñà túú sàndáá iní ñáhá ñáyiú isràél xii-gá, te ní cundàhú iní ñáhá-gă ní dácácu nihnu ñaha-gă xii-ndo núú ùhú núú ndàhú.

31 Te vitna quidé-yu dàtná ní xóo cada nchòhó cútnàhá ñá túú ní xóo quindáá iní-ndó-gă. Dico sáá nduu te natuha ñáhá-yu xii-gá te dácácu nihnu ñaha-gă xií-yu sá cundàhú iní ñáhá-gă dàtná ní quide ñaha-gă xii nchòhó.

32 Te Yă Ndiöxí ní dáñá-gă sá dúcá<sup>n</sup> cùnduu saá iní nchaa ñáyiú cuèndá cuìní-gá cundàhú iní ñáhá-gă xií-yu.

33 Te súúní văha quide ñaha Yă Ndiöxí xii-o, te ío váha xìní-gá nchaa cuéi sá ío andiú te cuéi sá ío ñuyíú-a, te duca<sup>n</sup> ío váha sáá nchaa sá xìní tnùní-gá. Te ñá ndácú-ó cùtnuní iní-ó ñá cúú nchaa sá sání iní-gá cada-gá, te ni ñă ndácú-ó cùtnuní iní-ó nàcuáa ndùu cuendá nchaa sá quidé-gă.

34 Te núú tùtú-gá càchí-xi: “Vá yóo ì<sup>n</sup> cùtnuní

iní-xi nàcuáa sàni iní Yă Ndiöxí, te ni vă yõ ì<sup>n</sup> ndàcu dacahu iní ñáhá xii-gá nàcuáa cáhá<sup>n</sup>-gá.

<sup>35</sup> Te Yă Ndiöxí ñá túú quide yica iní-gá cada-gá sá vâha sá cúú-xí ñăyiu cuendá ì<sup>n</sup> sá sãñáhá-yu xii-gá chi ñá túú dùca<sup>n</sup> quide-gá”, duha càchí-xi núú tütú-gá.

<sup>36</sup> Te duca<sup>n</sup> chi mee Yă Ndiöxí ní taxi ndecu-gá nchaandi túhú sá ió ñuyíú, te diu-ni mee-gă táxí tnùní-gá nchaa sá ñí taxi ndecu-gá, te nchaa cùu-xi cuendá-gá. Te vitna chí ná càchí-ó sã ìo càhnu cuu-gá ni caa ni quíhí<sup>n</sup>. Te duca<sup>n</sup> na cùnduu.

## 12

### *Cada-o nàcuáa nduu vétú iní Yă Ndiöxí*

<sup>1</sup> Te vitna nchòhó ñăyiu ndècu ndìhi-í ichi Xítohó Jesucrístú càchí tnúhu-í xii-ndo sã Yă Ndiöxí cùndàhú iní ñáhá-gă xii-o chìndee ñaha-gá, núu xíá<sup>n</sup> càhá<sup>n</sup> ndàhú-í núú-ndó sã dáñá-ndó mée-ndo núú ndáhá-gă, te cada iní-ndó sã cúú-ndó dàtná ì<sup>n</sup> táhú sã nchító-ó ñí nduu táhú-gă. Te cuu-ndo ñăyiu váha ñăyiu cada nchaa nàcuáa nduu vétú iní Yă Ndiöxí chí duca<sup>n</sup> tàú-ndó càda-ndo sá cúú-xí-gă.

<sup>2</sup> Te vá cáncìcú<sup>n</sup> nihnu-gá-ndó càda-ndo datná xíquide nchaa ñăyiu ndècu ichi cuehé ichi duha ndècu ñuyíú-a, te vá cúhú<sup>n</sup>-gă iní-ndó ìchi cuehé ichi duha-án, chi mee-ñá sá vâha cuhu<sup>n</sup> iní-ndó, te duca<sup>n</sup> te cutnùní iní-ndó nchàa nacuáa cuìní Yă Ndiöxí cada-ndo, te nchaa sá cuìní-gá cada-ndo cùu-xi mee-ni sá vâha, sã ìo váha ndùu vétú iní-gá, te cùu-xi nchaa sá xíní ñùhu-xi cada-ndo núú-gă.

<sup>3</sup> Te sá cuendá chiù<sup>n</sup> ní cundàhú iní ñáhá Yă Ndiöxí ní taxi-gá xii-í xíá<sup>n</sup> núu na càhá<sup>n</sup>-í dóho-ndo vitna: Vá cání ìní-ndó ì<sup>n</sup> sá ñà túú tàú-ndó càni

iní-ndó te cucaha<sup>n</sup>-ndo sã ão càhnu cuu-ndo. Te nchòhó ní sándáá iní-ndó Yã Ndiõxí nũu chindee ñaha-gá xii-ndo, te vitna chí cuãha cuendá nũu ná daha núu chiù<sup>n</sup>-gá ndacu-ndo càda-ndo.

<sup>4</sup> Te nchoo tìtní xichi cùu yiqui cuñú-ó, te ndi díí<sup>n</sup> ndì díí<sup>n</sup> chiù<sup>n</sup> guide-xi ì<sup>n</sup> ì<sup>n</sup>-xi.

<sup>5</sup> Te duca<sup>n</sup> sãtnahá tucu-xi cùu nchoo ñáyiu ndècu ndihì Xítóhó Jesucristú chí cuèi ná daha tnàhá-ó dico ì<sup>n</sup>-ni cùu-o ndihì-gá, te duca<sup>n</sup> mèe-o tucu ì<sup>n</sup>-ni cùu-o.

<sup>6</sup> Te mee Yã Ndiõxí ní cundàhú iní ñáhá-gã xii-o nĩ taxi-gá chiù<sup>n</sup> taú-ó càda-o ì<sup>n</sup> ì<sup>n</sup>-o te chindee ñaha-gá xii-o, te xìni ñuhu-xi cada-o nacuaá ndùu chiu<sup>n</sup> ní taxi-gá cada-o. Te núu ní nduu táhú-ó nũú-gã sá càhá<sup>n</sup>-ó tnũhu sá dácàhu iní ñáhá mèe-gá xii-o te cáhá<sup>n</sup>-ó nàcuáa sándáá iní-ó chindee ñaha-gá xii-o,

<sup>7</sup> àdi ní nduu táhú-ó nũú-gã sá ão váha chindee-o tnàha ñáyiu-o te ñiu-ni duca<sup>n</sup> càda-o, àdi ní nduu táhú-ó dànehé-ó ñáyiu tnúhu-gá te ñiu-ni duca<sup>n</sup> càda-o,

<sup>8</sup> àdi ní nduu táhú-ó nũú-gã sá dácàhá<sup>n</sup>-ó ñáyiu canchicú<sup>n</sup> nihnú-yu ichi-gá te ñiu-ni duca<sup>n</sup> càda-o, àdi ní nduu táhú-ó nũú-gã sá cuãñaha-o xìi-yu, ñaha ñáyiu-o sã ñihí-ó ndècu ndihì-o te ñiu-ni duca<sup>n</sup> càda-o, dico ni yùhu ni iní-ó cuãñaha-o xìi-yu, àdi ní nduu táhú-ó nũú-gã taxi tnùnì-ó te ñiu-ni duca<sup>n</sup> càda-o, te ni yùhu ni iní-ó càda-o, àdi ní nduu táhú-ó nũú-gã chindee-o cuè ñáyiu ndècu ndihì tnúndòho tnúhu ndàhú te ñiu-ni duca<sup>n</sup> càda-o, te ío cudíí iní-ó càda-o chiu<sup>n</sup>-án.

*Nchaa nàcuáa tàú-xi cada nchaa ñáyiu ndècu ichi Xítóhó Jesucristú*

9 Te cuu iní tnáhá ndìsa-ndo ì<sup>n</sup> ì<sup>n</sup>-ndo, te dañà-ndo nchàa sá cuèhé sá dúhá te cada-ndo mèe-ni sá vǎha.

10 Te ío cuu iní tnáhá-ndó, te cada-ndo cuendá sá ì<sup>n</sup>-ní ñǎyiu cùu-ndo, te ì<sup>n</sup> ì<sup>n</sup>-ndo càni-gá iní-ndó cànehe yǎñuhu núú tnáhá-ndó.

11 Te nducu ndèe-ndo cada-ndo nchaa chiu<sup>n</sup> tahu Xítóhó Jesucristú vá tühío-ndo, te cada-ndo nì yuhu ni iní-ndó sǎ cúú-xí-gǎ.

12 Te ío cudí<sup>í</sup> iní-ndó cùndecu-ndo chi ní ngúndecu ndìhi-ndo tnǎhu ndee iní sá cùndècu ndìhi-ndo Xítóhó Jesucristú, te cada càhnu iní-ndó cuèi nándi na càda ñaha ñáyiu xii-ndo sǎ cuendá-gá, te vá dáñá ndèe-ndó cǎhá<sup>n</sup> ndìhi-ndo Yǎ Ndiǒxí.

13 Te chindee tnàha-ndo te núu ío dava nchòhó ñáyiu ndècu ichi-gá ío ì<sup>n</sup> sá cúmání xii-ndo, te ío váha cuu iní-ndó còto-ndo ñáyiu véxi vehe-ndo.

14 Te cǎcá<sup>n</sup> táhú-ndó núú Yǎ Ndiǒxí cuendá nchaa ñáyiu nándi quide ñaha xii-ndo, te cǎcá<sup>n</sup> táhú-ndó núú-gǎ sá ná chindee ñaha-gá xií-yu te ñá díú dà cǎcá<sup>n</sup> táhú-ndó núú-gǎ sá ná dàcuíta nihnu ñaha-gǎ xií-yu.

15 Te núu ío ñáyiu cùdí<sup>í</sup> iní-xi te cudí<sup>í</sup> iní-ndó ndìhí-yu, te núu ío ñáyiu ndìhú iní-xi te ndìhú iní-ndó ndìhí-yu.

16 Te cuu ì<sup>n</sup>nuu-ndo cùndecu-ndo, te vá cǎdá càhnu-ndo mee-ndo, te tnahá tnúhu-ndo ndìhi nchaa ñáyiu ndàhú iní-xi, te vá cǎní iní-ndó sǎ ìo-gá túha-ndo.

17 Te vá nánchòcáva-ndo nàchinaa-ndo ì<sup>n</sup> sá quidé ñaha ñáyiu xii-ndo, te ío nducu ndèe-ndo cada-ndo mee-ni sá vǎha nàcuáa cuu váha iní ñáyiu.



18 Te ío nducu ndèe-ndo cada-ndo sá ndácú-ndó cùndecu váha-ndo ndìhi nchaa ñáyiu.

19 Te nchòhó ñáyiu ío cùu iní-í, vá cání iní-ndó nàchinaa-ndo ì<sup>n</sup> sá cádá ñàha ñáyiu xii-ndo, chi cundetu-ndo sã méé Yã Ndiõxí ná nàchinaa-gá sá quidé ñàhá-yu xii-ndo, chi quee ndáá-xi nàcuáa càhá<sup>n</sup> Yã Ndiõxí núú tütú-gá núú càchí-xi: “Yúhú dandòho-í-yu chi nachinaa-í nchaa sá quidé-yu”, duha càchí-gá núú tütú-gá.

20 Te xini ñuhu tucu-xi cada-ndo nacuáa càhá<sup>n</sup> tucu-xi ingá xichi núú tütú-gá núú càchí-xi: “Te núú ñáyiu cùu úhú iní ñàhá xii-ndo ñá túú sã cóhó sã cáxí-yu te cuáñaha-ndo xii-yu, te núú duca<sup>n</sup> na càda-ndo te ío cucaha<sup>n</sup> núú-yu”, duha càchí-xi núú tütú-gá.

21 Te núú ío ì<sup>n</sup> sá quidé ñàha tnaha ñáyiu-ndo xii-ndo te vá nánchòcáva-ndo nàchinaa-ndo sá quidé ñàhá-yu xii-ndo, chi cada-ndo sã váha sá cúú-xí-yu, te duca<sup>n</sup> te vá cádá-ndó sã ñà túú tàú-ndó càda-ndo núú Yã Ndiõxí dàtná quidé-yu.

## 13

1 Te nchaa ñáyiu tàú-yu quindáá iní-yu nchaa cue téé cùchiu<sup>n</sup>, chi Yá Ndiõxí ní cachí-gá sá cùndècu téé cùchiu<sup>n</sup> ñuyíú-a, núú xíã<sup>n</sup> xíndecu-güedé vitna.

2 Te nchaa ñáyiu ñá túú sàndáá iní ñàhá xii cue téé cùchiu<sup>n</sup> ñá túú tnàhá iní Yã Ndiõxí sá dúcá<sup>n</sup> quidé-yu, chi mee-gã ní cachí-gá sá cùndècu-güedé. Te nchaa ñáyiu duca<sup>n</sup> ñà túú sàndáá iní ñàhá xii cue téé cùchiu<sup>n</sup> nacháhu-yu sá dúcá<sup>n</sup> quidé-yu.

3 Te nchaa ñáyiu quide váha ñá túú yùhú-yu cue téé cùchiu<sup>n</sup> chi quide váha-yu, dico nchaa ñáyiu ñá túú quide váha chi xiyùhú-yu cue téé cùchiu<sup>n</sup>.

Te vitna núu nchòhó cuìní-ndó sǎ vǎ yùhú-ndó cuè tée cùchiu<sup>n</sup> te chí cádá vǎha, te duca<sup>n</sup> te cáhán<sup>n</sup> váha-güedé cuendá-ndó.

<sup>4</sup> Te Yá Ndiǒxí duca<sup>n</sup> nǐ cachí-gá cundecu-güedé cuendá cada-güedé sá ñà túú nǎ cuu cundecu-ndo, te núu ñá túú quide váha-ndo ndècu-ndo te quiyùhú iní-ndó nǔú-güedě, chí ñá túú àu<sup>n</sup> nǎ cuu ndècu ndihí-güedé tnúhu ndee ìní dandòho-güedé nchaa ñáyiu ñá túú quide váha, chí Yá Ndiǒxí duca<sup>n</sup> nǐ cachí-gá cundecu-güedé sá dúcá<sup>n</sup> càda-güedé dandòho-güedé nchaa ñáyiu ñá túú quide váha.

<sup>5</sup> Núu xǎ<sup>n</sup> ío xìni ñuhu-xi sá quìndáá iní-ndó nchàa cue tée cùchiu<sup>n</sup>, te ñá díú sǎ yùhú-ndó dàndòho ñaha-güedé xii-ndo, chí cada-ndo sǎ cútnùní iní-ndó sǎ cúú-xí ì<sup>n</sup> sǎ vǎha.

<sup>6</sup> Chí diu cuendá xǎ<sup>n</sup> sàcá<sup>n</sup>-ndó díhú<sup>n</sup> nǔú cuè tée cùchiu<sup>n</sup>, te duca<sup>n</sup> chí Yá Ndiǒxí duca<sup>n</sup> nǐ cachí-gá cundecu-güedé te diu-ná chìu<sup>n</sup> ndeé-güedé ñúhú ìní-güedé.

<sup>7</sup> Te nacháhu-ndo nchàa sá tàú-ndó nǔú nchàa ñáyiu tàú-ndó nǔú-xi, te cuèi díhú<sup>n</sup> tàú-ndó cuendá ñuhu-ndo nǔú cuè tée cùchiu<sup>n</sup> àdi nágá díhú<sup>n</sup> tàú-ndó nǔú-güedě te nacháhu-ndo nǔú-güedě. Te ío-gá canehe-ndo sǎ yíñùhu núú nchàa ñáyiu cùnuu, te cáhán<sup>n</sup> váha-ndo ndihí-yu.

<sup>8</sup> Te vá dácuídó-ndó ndùu nacháhu-ndo sǎ tàú-ndó nǔú tnàha ñáyiu-ndo, te cuu iní tnáhá-ndó ì<sup>n</sup> ì<sup>n</sup>-ndo. Te núu duca<sup>n</sup> quide-ndo ndecu-ndo ña, te quide-ndo nchaa nacuéa càhán<sup>n</sup> tnúhu sá sánú ìchi ñaha xii-o nacuéa cada-o cundecu-o.

<sup>9</sup> Te duha ndùu tnúhu càhán<sup>n</sup> Yá Ndiǒxí cuendá nchaa sǎ vǎ cúú càda-o: “Nchaa nchòhó cue tée vá càhán<sup>n</sup> ndihí-ndo ñáyiu díhí te núu ñá díú

ñàdihí-ndó cùu-yu, te duca<sup>n</sup>-ni nchàa nchohó cue ñáyiú dîhí tucu vá càhá<sup>n</sup> ndîhi-ndo tēe te núu ñá díú yî-ndo cuu-güedé, te vá cáhni-ndó tnàha ñáyiú-ndo, te vá dúhú-ndó sã ndécú ndîhí-yu, te vá dácàcu-ndo cuéchi neñuú, te vá xíhó-ndó sã ndécú ndîhi tnaha ñáyiú-ndo”, nchaa xéhé càhí Yã Ndiöxí sá vã cúú càda-o. Te tnúhu-a quide-o ndîhi nchaa dava-gá tnúhu sá sánú ìchi ñaha xii-o nacuéa cada-o cùndecu-o, te núu quide-o ingá tnúhu sá càhí-xi: “Cuu iní-ndó nchàa tnaha ñáyiú-ndo dàtná cúú iní-ndó mèe-ndo”, duha càhá<sup>n</sup> tnúhu-án. Te nchaa dava-gá quidé-ó te núu quide-o nacuéa càhá<sup>n</sup> tnúhu-a.

<sup>10</sup> Te nchaa ñáyiú cùu iní tnàha ñáyiú-xi te ñá túú quide úhú iní-yu tnàha ñáyiú-yu, te núu duca<sup>n</sup> cùu iní-yu tnàha ñáyiú-yu te quidé-yu nàcuáa càhá<sup>n</sup> tnúhu sá sánú ìchi ñaha xii-o nacuéa cada-o cùndecu-o.

<sup>11</sup> Te duca<sup>n</sup> xîni ñuhu-xi cada-ndo chi sa ní cutnùní iní-ndó nàcuáa ta xîca nduu cuáhá<sup>n</sup> ñuyíú-a, te ní sáá nduu sá ïo xîni ñuhu-xi ndixi túu iní-ó càda-o nchaa nacuéa càhá<sup>n</sup> Yã Ndiöxí, chi vitna sa ní cuyatni-gá nduu nàcuaca ñaha Xítohó Jesucristú xii-o dàcúxí ndéé cùtnáhá ní sándáá iní-ó tnúhu-gá.

<sup>12</sup> Te cada iní-ndó sã dàtná ì<sup>n</sup> niú sá sà ta cuyatni túndaá, duca<sup>n</sup> sãtnahá-xi cùu ñuyíú yíca cuéchi-a chi sa ta cuyatni nduu quixi tucu Xítohó Jesucristú, te núu xíá<sup>n</sup> xíní ñuhu-xi dañ-a nchaa sá cuèhé sá dúhá te cada-o mèe-ni sá vãha, te duca<sup>n</sup> te ni ì<sup>n</sup> sá cuèhé sá dúhá vã cúnù-xi taxi tnuní ñáhá-xí xii-o, te duca<sup>n</sup> te vá cúú-gã-ó dàtná ñáyiú ndècu núú néé chi cuu-ná-ó dàtná ñáyiú ndècu núú dító.

13 Te cada-o nchàa nacuáa tàú-xi cunduu cundecu-o datná tàú-xi cada ñáyiú ndècu ichi Xítóhó Jesucristú, te vá quihí<sup>n</sup>-ó vico cuehé vico duha, te vá cúú-ó ñáyiú quihu, te ni vă cãhá<sup>n</sup> ndihí-o ñáyiú ðihí te núu ñá díú ñàðihí-ó cùú-yu, te duca<sup>n</sup>-ni cuè ñáyiú ðihí tucu vá cãhá<sup>n</sup> ndihí-yu téé te núu ñá díú yĩ-yu cùu-güedé, te ni vă cùndècu-o ichi díí ìní, te ni vă nãá-ó ndihí tnahá ñáyiú-o, te ni vă cúú-ó ñáyiú cuédú ìní.

14 Te vitna nchòhó dañá-ndo mème-ndo sá Xítóhó Jesucristú ná chindee ñaha-gá xii-ndo càda váha-ndo cùndecu-ndo datná quidé mème-gá ndécú-gã, te vá cãní-gã ìní-ndó càda-ndo datná ní xóo cada-ndo cùtnàhá ní cunuu nchàa sá cuèhé sá dúhá ìní-ndó.

## 14

*Vá cuátnùhu tnahá-o nacuáa ndècu-o ichi Xítóhó Jesucristú*

1 Te núu ì<sup>n</sup> ñáyiú ndècu ichi Xítóhó Jesucristú ñá túú tècú tnùnì váha-yu nãcuáa cuìnì Yã Ndiõxí cadá-yu, te quehe<sup>n</sup> cuendá-ni-ndõ-yu te vá ténãá tnáhá-ndó ndihí-yu.

2 Chi ió ñáyiú sàni ìní sá cúú văha ìní Yã Ndiõxí sá cúú cãxí-yu nãni nihí-yu, te dava ñáyiú ñá túú cùtnunì váha ìní-yu nãcuáa cãhá<sup>n</sup> Yã Ndiõxí te mee-ni yücú xéxí-yu.

3 Te ñáyiú xèxi nchaa núú sã nihí-yu te vá dáquèè tíhũ-yu ñáyiú ñá túú xèxi, te duca<sup>n</sup>-ni ñáyiú duca<sup>n</sup> ñã túú xèxi-á<sup>n</sup> vă cuátnùhú-yu nchaa ñáyiú duca<sup>n</sup> xèxi nchaa núú sã nihí-xi-á<sup>n</sup>, chi tnáhá ñáyiú duca<sup>n</sup>

xèxi nchaa núú sǎ nihí-xi-á<sup>n</sup> quéhé<sup>n</sup> cuèndá ñáhá Yǎ Ndiǒxí xií-yu.

<sup>4</sup> Te ñá túú ndècu ndìhi-o tnúhu ndee iní cu-atnúhu-o ñáyiú xìnu cuechì, chí mee ñáyiú cùu pa-tróð<sup>n</sup>-yu tàú-yu cáhá<sup>n</sup>-yu te núu cùndáá ñáyiú xìnu cuechì núú-yu àdi ñá túú cùndáá-yu. Te duca<sup>n</sup> sǎtnahá-xi cùu ñáyiú xìnu cuechì núú Yǎ Ndiǒxí, chí mee-gǎ cáhá<sup>n</sup>-gǎ te núu nása quidé-yu, te ðiu-ni mee-gǎ cada te cundáá-yu cundecú-yu núú-gǎ.

<sup>5</sup> Te na càchí tnúhu tucu-í xii-ndo sǎ ió ñáyiú càchí sǎ ió dava nduu ío cǎhnu cuu-xi, te ió tucu dava ñáyiú càchí-yu sǎ ì<sup>n</sup>-ni cuu-xi nchaa-ni nduu, te xìni ñuhu-xi sǎ cùtnuní ndáá iní-yu sǎ ndáá cúú-xí nàcuáa càhá<sup>n</sup>-yu ì<sup>n</sup> ì<sup>n</sup>-yu.

<sup>6</sup> Te ñáyiú cánehe íí dava nduu quidé-yu sǎ néhě-yu sǎ yíñùhu núú Yǎ Ndiǒxí, te ñáyiú càchí sǎ ì<sup>n</sup>-ní cùu-xi nchaa-ni nduu quidé-yu sǎ néhě-yu sǎ yíñùhu núú Yǎ Ndiǒxí tnàhá-yu. Te ðiu-ni duca<sup>n</sup> sǎtnahá-xi cùu nchaa ñáyiú xèxi nchaa nání nihí-yu, chí quidé-yu sǎ néhě-yu sǎ yíñùhu núú Yǎ Ndiǒxí, chí ndàcá<sup>n</sup> táhǔ-yu núú-gǎ cuèndá nchaa sǎ nihí-yu. Te ðiu-ni duca<sup>n</sup> sǎtnahá-xi cùu nchaa ñáyiú ñá túú xèxi nchaa núú sǎ nchító-ó chí quidé-yu sǎ néhě-yu sǎ yíñùhu núú Yǎ Ndiǒxí, te ndàcá<sup>n</sup> táhǔ-yu núú-gǎ cuèndá nchaa sǎ nihí-yu.

<sup>7</sup> Te nchoo cuèi vitna ndècu vívú-ó àdi cuèi na cùú-ó dico ñá díú cuèndá méé-ó cùú-ó.

<sup>8</sup> Chí vitna ndècu vívú-ó te ndècu-o sǎ cúú-xí Xítohó Jesucristú àdi cuèi na cùú-ó dico cuú-ó ðiu-ni sǎ cúú-xí-gǎ, núu xíǎ<sup>n</sup> cuèi vitna ndècu vívú-ó àdi cuèi na cùú-ó dico ðiu-ni Xítohó Jesucristú cúú cuèndá ñáhá-gǎ xii-o.

<sup>9</sup> Chi Xítóhó Jesucristú ní xíhí-gá te ní ndoto-gá, te vitna cùu-gá Xítóhó nchaa ñáyiú, cuèi ñáyiú xĩndecu vívú te cuèi ñáyiú ní xíhí.

<sup>10</sup> Te nchòhó, ñá túú ndùu váha-xi cuatnuhu tnàha-ndo nacuáa ndècu-ndo ichi Xítóhó Jesucristú, te ni ñà túú ndùu váha-xi daquèe tíhú tnáhá-ndó, chi nchaa-o sáá nduu cùndecu-o núú Xítóhó Jesucristú, te mee-gă cachí-gá te núu ní quide ndáá-ó àdi ñá túú ní quide ndáá-ó.

<sup>11</sup> Te Yá Ndiõxí càchí-gá núú tütú-gá:  
Yúhú Yá Ndiõxí ndécù-í càchí tñúhu ndáá-í xii-ndo  
sá nchàa ñáyiú ngüñí xítí-yu núu-í,  
te ncháá-yu cáhá<sup>n</sup>-yu sá yùhú cúu-í Ndiõxí.  
Duha càchí Yá Ndiõxí núú tütú-gá.

<sup>12</sup> Núu xíã<sup>n</sup> nchaa-o ndè díí<sup>n</sup> nàcani tñúhu-o núú Yá Ndiõxí nchaa sá ñi quide-o.

*Vá dácuíta nihnu tnàha-o*

<sup>13</sup> Núu xíã<sup>n</sup> vá cuátnùhu tnaha-gá-ndó, te cada yica-ndo càda-ndo mee-ni sá vâha, te vá cáda-ndó ñ<sup>n</sup> sá ñà túú tàú-ndó càda-ndo cuendá sá vâ cuíta nihnu dava ñáyiú ndècu ndihí-ndo ichi Xítóhó Jesucristú.

<sup>14</sup> Te yúhú ndécú ndihí-í Xítóhó Jesucristú te cùtnuní ndáá iní-í sá ncháá núú sá cúu càxi-o cuu-ni caxi-o te vá cúu cuèchi. Te ñáyiú sàni iní sá vâ cúu càxí-yu te núu na càxí-yu te cuu cuèchi xíí-yu.

<sup>15</sup> Te nchòhó, te núu cuendá sá xéxí-ndó nchàa núú sá cúu càxi-ndo, cuendá xíã<sup>n</sup> ñá túú-gă cúu vâha iní nchaa ñáyiú ndècu ndihí-ndo ichi Xítóhó Jesucristú, te ñá túú-gă quidé-ndó sá cúu ìní ndisa-ndõ-yu te núu duca<sup>n</sup> na càda-ndo, te núu ñ<sup>n</sup> sá sání ìní-ndó càxi-ndo te cùtnuní iní-ndó sá

xǎ<sup>n</sup> cada-xi cuíta nihnu ñáyiú ndècu ndìhi-ndo ichi Xítóhó Jesucrístú te vá cáxí-ndó xǎ<sup>n</sup> te núu duca<sup>n</sup>, chi Xítóhó Jesucrístú ní xíhí-gá cuèndá-yu.

16 Te núu ì<sup>n</sup> sá quidé-ndó sàni iní-ndó sǎ cúú-xí ì<sup>n</sup> sá vǎha, te ñáyiú càchí-yu sá ñà túú vǎha te vá cádá-ndó cuèndá sá vǎ càhá<sup>n</sup> cuèhé-yu cuèndá-ndó.

17 Te sá yíndàha ñaha Yá Ndiöxí xii-o xǎ<sup>n</sup> ío xìni ñuhu-xi cada ndáá-ó cùndecu-o, te cundecu váha ndìhi tnàha-o, te cudíí iní-ó cùndecu-o chi Espíritú-gá ndécú ndìhi ñaha-xi xii-o, te nchaa xéhé ïo-gá cúnúu dacúúxí sǎ cóhó sǎ cáxí-ó.

18 Te nchaa ñáyiú duca<sup>n</sup> quide nchaa sá ïo-gá xíní ñuhu-xi, xinu cuechí-yu núú Xítóhó Jesucrístú, te sá dúcá<sup>n</sup> quide-yu te ndùu vétú iní Yǎ Ndiöxí, te cùdiú-yu núú ñáyiú.

19 Te nchoo chǐ ná ndùcu-o nacuáa cada-o cùndecu ndìhi váha tnàha-o, te nducu tùcu-o nacuáa cada-o chìndee tnúhu tnàha-o nacuáa cuíta cundáá-gá-ó núú Xítóhó Jesucrístú quíhí<sup>n</sup>.

20 Te ñá díú sǎ cuèndá ì<sup>n</sup> núú sǎ xéxí-ó, te dàquee tíhú-ó sǎ vǎha ní quide ñaha Yǎ Ndiöxí xii tnàha ñáyiú-o. Te na càchí tnúhu ndáá-í xii-ndo sǎ ncháá-ní núú sǎ cúú càxi-o, te dìcò-ni sá ñà túú ndùu váha-xi núú sá cuèndá-ni sá cáxí-ó ì<sup>n</sup> núú sǎ cúú càxi-o cuíta nihnu ì<sup>n</sup> tnàha ñáyiú-o.

21 Te váha-gá sá vǎ cáxí-ó cùñú te vá cóhó ndìdí, te ni ñà túú nǎgá cada-o te núu xító-o sá xǎ<sup>n</sup> cada te ngúíta tnàha ñáyiú-o càdá-yu sá ñà túú vǎha, àdi xító-o sá xǎ<sup>n</sup> cada te ngúíta-yu caní ì<sup>n</sup> caní úú iní-yu cundécú-yu ichi Xítóhó Jesucrístú, te vá cùndáá-gá-yu núú-gǎ te núu duca<sup>n</sup> na càda-o.

22 Te núu ì<sup>n</sup> sá vǎha sàni iní-ó càda-o, te vá

dátũu-o nũú ñăyiu chi mee-ni nũú Yă Ndiõxí dātũu-o. Te nchoo cùu-o ñáyiu ío váha táhú-xi te núu cùtnuní ndáá iní-ó sã quidé ndáá-ó nũu nándi cùu sá quidé-ó, te cùtnuní iní-ó sã ñà díú ì<sup>n</sup> cuéchi cùu-xi sá quidé-ó.

<sup>23</sup> Te núu nchoo sàni iní-ó sã quidé vâha-o àdi ñá túú quide váha-o òré xéxí-ó ì<sup>n</sup> núú sã xéxí-ó, te cuu cuéchi xii-o te núu duca<sup>n</sup> na càda-o. Te duca<sup>n</sup> cùu cuéchi xii-o chi ñá túú ì<sup>n</sup>-ni sá sání iní-ó, chi nchaa núú sã quidé-ó sàni ì<sup>n</sup> sàni úú iní-ó nũu váha-ni àdi ñá túú vâha-ni, te cuu cuéchi xii-o sã dúcá<sup>n</sup> quide-o.

## 15

### *Cada-o sã vâha sá cúú-xí tnàha ñáyiu-o*

<sup>1</sup> Te nchoo ñáyiu ío váha sàndáá iní ñáhá xii Xítóhó Jesucrìstú, xini ñuhu-xi cuañaha-o tnũhu ndee iní xii ñáyiu ñá túú ñihí ndéé cùndecu ichi-gá, te vá cáda-ó mèe-ni sá cúú-xí mèe-o.

<sup>2</sup> Te cada-o sã vâha nàcuáa cuu váha iní tnàha ñáyiu-o cuendá cuu-xi sá vâha sá cúú-xí-yu, te duca<sup>n</sup> cuíta ñihí ndéé-gã-yu quindáá iní-yu Xítóhó Jesucrìstú.

<sup>3</sup> Te Xítóhó Jesucrìstú ñá túú ní quide-gá mee-ni sã cúú vâha iní méé-gã, te ní quee ndáá-xi nàcuáa càhá<sup>n</sup>-xi núú tûtú Yă Ndiõxí nàcuáa ní xáha<sup>n</sup> Xítóhó Jesucrìstú xii-gá, te càchi-xi: “Nchaa ñáyiu cùu úhú iní ñáhá xii-n ní xícuèhé ní xíduha ñàhá-yu xii-í”, duha càhá<sup>n</sup>-xi núú tûtú Yă Ndiõxí nàcuáa ní xáha<sup>n</sup> Xítóhó Jesucrìstú xii-gá.

<sup>4</sup> Te ndéé sanaha ñi ngúndeé nchaa tnũhu Yá Ndiõxí núú tûtú-gá, te duca<sup>n</sup> ñi ngúndeé cuendá dacuàha-o, te tnũhu-á<sup>n</sup> dánèhé ñáhá-xí cùnduu cahnu iní-ó cuèi nándi nà yâha-o cùndecu-o ichi-gá,



te sá xíí tnũhu-á<sup>n</sup> te vá ndìhú-gá iní-ó cùndecu-o, te ñi-u-ni sá xíí tnũhu-á<sup>n</sup> cundecu ndìhi-o tnũhu ndee iní.

<sup>5</sup> Te Yá Ndiõxí quidé-gã ndécú ndìhi-o tnúhu càhnu iní, te ñi-u-ni-gá quidé-gã ñá túú ndìhú iní-ó ndècu-o. Te xicá<sup>n</sup> táhù-í núú-gã sá díú-gã ná cádá te cuu ñ<sup>n</sup>nuu-ndo cùndecu-ndo datná ní quide mee Xítohó Jesucrístú cùtnáhá ní xíndecu-gá ñuyíú-a.

<sup>6</sup> Te duca<sup>n</sup> nchàa-ndo cuu ñ<sup>n</sup>nuu-ndo, te daníhí tnáhá-ndó yóco táchí-ndó te cachí-ndó sã ño càhnu cuu Yá Ndiõxí Yaá cúú Tătă Xítohó Jesucrístú.

*Ñáyiu ñá túú cùu ñáyiu isràél ní níhí-yu tnúhu Xítohó Jesucrístú*

<sup>7</sup> Te núu xíã<sup>n</sup> chí quéhé<sup>n</sup> cuendá tnáhá dàtná ní quide Xítohó Jesucrístú ní quehe<sup>n</sup> cuendá ñáhá-gã xii-o, te núu duca<sup>n</sup> na càda-ndo te ío cuu càhnu Yá Ndiõxí.

<sup>8</sup> Te na càchí tnúhu-í xii-ndo sã Xítohó Jesucrístú ní quixi-gá ní quide-gá sá vãha sá cúú-xí ñáyiu isràél, te sá dúcá<sup>n</sup> ñí quide-gá xíã<sup>n</sup> cùtnùní ndáá iní-ó sã Yá Ndiõxí quidé-gã ñ<sup>n</sup> sá càhá<sup>n</sup>-gá, chí Xítohó Jesucrístú ní quide-gá nchaa nàcuáa ní xáha<sup>n</sup> Yá Ndiõxí xii cue ñaní tnáhá-ó ñí xíndecu ndéé sanaha.

<sup>9</sup> Te duca<sup>n</sup> ñí quide Xítohó Jesucrístú sá vãha sá cúú-xí ñáyiu isràél cuendá nchaa ñáyiu ñá túú cùu ñáyiu isràél cachí-yu sá ño càhnu cuu Yá Ndiõxí, te duca<sup>n</sup> quèsahá-yu chí ío cùndahú iní ñáhá-gã chíndèe ñaha-gá xii-yu, te quee ndáá-xi nàcuáa càhá<sup>n</sup>-xi núú tütú Yá Ndiõxí núú càchí-xi:

Yúhú cachí-í sá ño càhnu cuu-n núú nchàa ñáyiu ñá túú cùu ñáyiu isràél,  
te cata-í ndudú chiñuhu ñaha-í xii-n.  
Duha càchí-xi núú tütú-gá

10 Te càchí tucu-xi núú tütú-gá:

Te nchòhó ñáyiú ñá túú cùu ñáyiú isràél ío chí cúdǎí  
 ìní ndìhi ñáyiú isràél ñáyiú ndècu ndìhi-í.

Duha càchí-xi núú tütú-gá.

11 Te càchí tucu-xi ìngá xichi núú tütú-gá:

Nchaa nchòhó ñáyiú ñá túú cùu ñáyiú isràél chí  
 càhá<sup>n</sup> sá ío càhnu cuu Yá Ndiöxí,

te nchaa ñáyiú na càhá<sup>n</sup>-yu sá ío càhnu cuu-gá.

Duha càchí-xi núú tütú-gá.

12 Te ndí Chàíá càchí tucu ndí núú tütú Yă Ndiöxí:  
 Coó ì<sup>n</sup> ñaní tnáhá ndì Isàí téé ní xíndecu ndéé  
 sanaha,

te téé-á<sup>n</sup> taxi tnùní-dé cue ñáyiú ñá túú cùu ñáyiú  
 isràél,

te ñáyiú-á<sup>n</sup> cundee cùu cahnu iní ñáhă-yu xii-dé.

Duha ní càhá<sup>n</sup> ndí Chàíá càchí-xi núú tütú-gá.

13 Te xicá<sup>n</sup> táhù-í núú Yă Ndiöxí Yaá ní taxi  
 tnúhu ndee ìní ndécú ndìhi-o sá méé-gă ná càda  
 ío cudǎí ìní-ndó cùndecu-ndo, te duca<sup>n</sup> ío váha  
 cundecu ìní-ndó nǔú-gă chí sàndáá ìní-ndó-gă, te  
 duca<sup>n</sup> Espíritú-gá ná càda te uu<sup>n</sup>-gá uu<sup>n</sup>-gá cuita  
 ngúndecu ndìhi-ndo tnúhu ndee ìní quíhí<sup>n</sup> sá cáda  
 váha ñaha-gă xii-ndo.

14 Te nchòhó ñáyiú ndècu ndìhi-í ichi Xítohó Jesu-  
 crístú cùtnuní ndáá ìní-í sá nchòhó ío váha ìní-ndó,  
 te duca<sup>n</sup> ío váha cùtnuní ìní-ndó nchàa tnúhu váha,  
 te duca<sup>n</sup> ío dàsahú tnáhá-ndó nàcuáa cundecu-ndo.

15 Te dava tnúhu ní chídó tnùní-í núú tütú-a  
 cùu-xi tnúhu sá ío càhá<sup>n</sup>-í dóho-ndo, te duca<sup>n</sup> nǎ  
 tee-í cuendá sá nchòhó dandàcu ìní-ndó tnúhu-á<sup>n</sup>,  
 te ní tee-í chí Yá Ndiöxí ní cundàhú ìní ñáhá-gă xii-í  
 ní taxi-gá chùu<sup>n</sup> quide-í

16 xínú cuèchi-í núú Xítóhó Jesucrìstú càhá<sup>n</sup>-í tnúhu-gá núú ñáiyu ñá túú cùu ñáiyu isràél. Te tnúhu-á<sup>n</sup> cúu-xí tñùhu sá sánú ìchi ñaha xii-o nacuáa naníhí tǎhú-ó, te duca<sup>n</sup> dǎnehé-í ñáiyu ñá túú cùu ñáiyu isràél tnúhu Yá Ndiǒxí cuendá cuú-yu dǎtná ì<sup>n</sup> sá ndúú tǎhú-gǎ, te Espíritú-gá quidé-xí cùu-yu ñáiyu cùdùu núú-gǎ, te cùu váha iní ñáhá-gǎ xií-yu.

17 Te ío váha cùu iní-í cuendá nchaa chiú<sup>n</sup> quide-í sá cúu-xí Yǎ Ndiǒxí, chi Xítóhó Jesucrìstú ndécú ndìhi ñaha-gá xii-í.

18 Te mee-ni nàcuáa quide Xítóhó Jesucrìstú chíndèe ñaha-gá xii-í xǎ<sup>n</sup>-ni càhá<sup>n</sup>-í, te sá dúcá<sup>n</sup> quide-gá xǎ<sup>n</sup> ní sándáá iní cue ñáiyu ñá túú cùu ñáiyu isràél tnúhu-gá. Te duca<sup>n</sup> chi ní chindee ñaha-gá xii-í ní cáhá<sup>n</sup>-í tnúhu-gá te duca<sup>n</sup>-ni ní chindee ñaha-gá xii-í ní quide-í títí núú sǎ ní quide-í núú-yu ní xiní-yu.

19 Te Espíritú Yǎ Ndiǒxí ní quide-xi ní quide-í títí núú sǎ vǎ yǒo tnàhí ndàcu cada ní xiní-yu te ío ní cuñúhu-yu. Te nchaa ñuú ní sáhá<sup>n</sup>-í ní cáhá<sup>n</sup>-í tnúhu Xítóhó Jesucrìstú núú ñáiyu cuèi ndéé ñuú Jerusàlén, te cuèi ndéé distritú Íliricú, núu nchaa ñuú-á<sup>n</sup> ní sáhá<sup>n</sup>-í ní cáhá<sup>n</sup>-í núú-yu tnúhu sá càhá<sup>n</sup> nàcuáa naníhí tǎhú-ó.

20 Te duca<sup>n</sup> ío ndùcu ndee-í càhá<sup>n</sup>-í tnúhu sá càhá<sup>n</sup> nàcuáa naníhí tǎhú-ó núú vǎtá nihí-gá-yu tnúhu cuendá Xítóhó Jesucrìstú, te duca<sup>n</sup> quide-í chi ñá túú cuíní-í quíhí<sup>n</sup>-í cáhá<sup>n</sup>-í tnúhu-gá núú sà xíndecu ñáiyu càhá<sup>n</sup> tnúhu-gá.

21 Te quide-í nàcuáa càhá<sup>n</sup>-xi núú tütú Yǎ Ndiǒxí núú càhí-xi:

Ñáyiú vátá ñihí-gá tnúhu cuendá Yaa quixi ñuyú te  
 níhí-yu,  
 te duca<sup>n</sup> təcú tnùní-yu tnúhu-gá.  
 Duha càchí-xi núú tütú-gá.

*Té Păblú cuiní-dé quíhí<sup>n</sup>-dé ñuú Rómá*

22 Te sá dúcá<sup>n</sup> càhá<sup>n</sup>-í tnúhu-gá ñuu xíă<sup>n</sup> ñá túú  
 ní ndàcu-í quixi-í quixi coto ñaha-í xii-ndo cuéi  
 duca<sup>n</sup>-ni sàni iní-í quixi coto ñaha-í.

23 Te ní cuu titní cuía duca<sup>n</sup>-ni sàni iní-í quixi  
 coto ñaha-í xii-ndo, te vitna ní ndihí-í nchaa iha ní  
 cáhá<sup>n</sup>-í tnúhu Xítohó Jesucristú núú nchaa ñáyiú.

24 Núú xíă<sup>n</sup> sání ñní-í sá ndùu na quíhí<sup>n</sup>-í nació<sup>n</sup>  
 Èspaña te yáha cáhá<sup>n</sup>-í quini-í nása ndècu-ndo, te  
 dàvá-á<sup>n</sup> ño cudíí ñní-ó cùndecu tnaa-o, te duca<sup>n</sup> te òré  
 nucúhu<sup>n</sup> tucu-í ichi te cada ndee ñní-ndó chindee  
 ñaha-ndo xii-í.

25 Te vitna quíhí<sup>n</sup>-í ñuú Jerusalén quínehe-í  
 sá ndúú tǎhú ñáyiú ndècu ichi Xítohó Jesucristú  
 xĩndecu yàcá<sup>n</sup>.

26 Te ñáyiú xĩndecu ichi Xítohó Jesucristú ndécú  
 dìstrítú Macèdoniá, ndihí dìstrítú Acáyá ní cuu  
 ñnúnú-yu ní sacá<sup>n</sup> tnáhă-yu sá ndúú tǎhú ñáyiú  
 ndàhú xĩndecu ichi-gá ndécú ñuú Jerusalén.

27 Te duca<sup>n</sup> tnàhí ní cudíí ñní-yu cadá-yu, te duca<sup>n</sup>  
 tnàhí tàú-yu cadá-yu chindèé-yu ñáyiú xĩndecu  
 ñuú Jerusalén. Te ñáyiú Macèdoniá ndihí ñáyiú  
 Acáyá-á<sup>n</sup> ñà túú cùú-yu ñáyiú isràél. Te ñáyiú  
 xĩndecu ñuú Jerusalén cúú-yu mee-ni ñáyiú isràél, te  
 duca<sup>n</sup> tàú-yu cadá-yu chi sá cuendá ñáyiú isràél-á<sup>n</sup>  
 ní níhí-yu tnúhu sá càhá<sup>n</sup> nàcuáa naníhí tǎhú-yu,  
 núú xíă<sup>n</sup> tàú-yu chindee ñàhá-yu ndihí nchaa sá  
 ñihí-yu.

28 Te sátá ná yǎha quínguáha cuèndá-í-yu sá ndúú tǎhǔ-yu, te duca<sup>n</sup> te dǎtnùnǐ quee-í quíhí<sup>n</sup>-í nàció<sup>n</sup> Èspañá, te ichi yáha-í yáha cáhá<sup>n</sup>-í núú ndécú-ndó.

29 Te cùtnunǐ ndáá iní-í sá òré ná quèxio-í núú ndécú-ndó, te Xítóhó Jesucrístú ío chindee ñàha-gá xii-í cáhá<sup>n</sup>-í tnúhu-gá núú-ndó nàcuáa ío váha cundecu-ndo ìchi-gá.

30 Te nchòhó ñáyiú ndècu ndihí-í ichi Xítóhó Jesucrístú càhá<sup>n</sup> ndàhú-í núú-ndó sǎ ìo chindee ñàha-ndo xii-í cáhá<sup>n</sup> ndihí-o Yǎ Ndiǒxí cuèndá-í, te duca<sup>n</sup> càda-ndo chí ndècu ndihí-ndo Xítóhó Jesucrístú. Te Espíritú Yǎ Ndiǒxí quidé-xí cùu iní tnáhá-ó ìhí<sup>n</sup> ìhí<sup>n</sup>-o.

31 Te ío chí càcá<sup>n</sup> táhú nǔú Yǎ Ndiǒxí sá ná còto ñàha-gá xii-í, te ñá túú nǎ cada ñàha nchàa ñáyiú ñá túú sàndáa iní ñáhá xii-gá xǐndecu distritú Jùdeá. Te càcá<sup>n</sup> táhú tùcu-ndo núú-gǎ sá ncháa sǎ cànèhe-í quíhí<sup>n</sup> nduu táhú ñáyiú ndècu ichi-gá ndécú ñúú Jerusàlén ío váha cuu iní-yu quehe<sup>n</sup> cuèndá-yu.

32 Te duca<sup>n</sup> càda-ndo cuendá sá nǔu Yá Ndiǒxí ná càchí-gá te ío cudíí ìní-í òré quexìo-í núú ndécú-ndó, te ío váha cuu iní-í cundecu ndihí ñàha tnài xii-ndo.

33 Te vitna xicá<sup>n</sup> táhù-í núú Yǎ Ndiǒxí Yáa quidé ìo váha cùu iní-ó ndècu-o sá ná chindee chitúu ñàha-gǎ xii-ndo nchàa-ndo. Te duca<sup>n</sup> na cùnduu.

## 16

*Té Pǎblú quidé ndèe iní-dé ñáyiú ndècu ñúú Ròmá*

1 Te yúhú tendaha-ǐ tá Fèbé quixi-xi núú ndécú-ndó, te tnáhá-xi ndècu-xi ichi Xítóhó Jesucrístú, te quide-xi chiu<sup>n</sup> Yá Ndiǒxí sá cúú-xí

ñáyiú ndècu ichi Xítohó Jesucrìstú xǐndecu ñuú Cèncreá.

<sup>2</sup> Te cuíní-í sá ïo váha cuu iní-ndó quèhe<sup>n</sup> cuendá-ndó-xí, chi ndècu ndihí-xi Xítohó Jesucrìstú, te cada-ndo nàcuáa tàú-xi cunduu dàtná tàú-xi cada ñáyiú ndècu ichi-gá, te ío chindee-ndo-xi te núu ná cúú sǎ xíní ñùhu-xi, chi tnàhá-xi ío chindee-xi cue ñáyiú ndècu ichi Xítohó Jesucrìstú, te tnàhá yúhú duca<sup>n</sup> ïo chindee-xi.

<sup>3</sup> Te cúñaha-ndo ïo na càda ndee iní té Àquilú ndihí ñadhí-dé tá Prìscilá, chi ñáyiú-á<sup>n</sup> ñí quide chiu<sup>n</sup>-í ndihí-yu ní quide-ndí chiu<sup>n</sup> Xítohó Jesucrìstú.

<sup>4</sup> Chi mèe-yu ní cácu cuú-yu sá cuendá sá ñí dácácu ñàhá-yu xii-í sá ñí yáha-í, núu xǎ<sup>n</sup> ío ndàcá<sup>n</sup> táhù-í núù-yu, te ñá díú-ní yúhú duca<sup>n</sup> ïo ndàcá<sup>n</sup> táhù-í núù-yu chi tnàhá nchaa ñáyiú ñá túú cùu ñáyiú isràèl xǐndecu ichi-gá xǐndecu nchaa xichi duca<sup>n</sup> ïo ndàcá<sup>n</sup> táhù-yu núú tǎ Àquilú ndihí núú ñadhí-dé tá Prìscilá.

<sup>5</sup> Te cúñaha tùcu-ndo sá ïo na càda ndee iní nchaa ñáyiú xǐndecu ichi Xítohó Jesucrìstú tàcá vehe té Àquilú ndihí tá Prìscilá dácuahá-yu tnúhu-gá, te cúñaha tùcu-ndo sá ïo na càda ndee iní té Epènetú chi tnàhá-dé ío ñùhu iní-í-dé, chi té-á<sup>n</sup> cúú-dǎ té díhna nuu ñí sándáá iní tnúhu Xítohó Jesucrìstú distrítú Acáyá.

<sup>6</sup> Te cúñaha tùcu-ndo sá ïo na càda ndee iní tá Màriá xíchí ndécú ndihí-ndo, xíchí ïo ndùcu ndee xinu cuechi núú Xítohó Jesucrìstú.

<sup>7</sup> Te cúñaha tùcu-ndo sá ïo na càda ndee iní cue téé cùu ndi mee-í té Àndrónicú ndihí té Jùniás, chi

tnàhá-güedé ní xíhi ndíhi ñaha-güedě xii-í vecaá, te ío cùdiu-güedé núú nchàa cue téé ní táúchíú<sup>n</sup> Jèsús cáhá<sup>n</sup> tnúhu-gá. Te díhna-gá-güedé ní sándáá iní-güedé tnúhu Xítóhó Jesucrístú dácúúxí yùhú.

<sup>8</sup> Te cúñaha-ndo sǎ ná càda ndee iní té Àmpliás chi tnàhá-dé ío ñùhu iní-í-dé, te ndècu-dé tnàhá-dé ichi Xítóhó Jesucrístú.

<sup>9</sup> Te cúñaha tùcu-ndo xii té Bǎnú téé cùndíhi ñaha xii-o quide-o chiú<sup>n</sup> Xítóhó Jesucrístú sǎ ná càda ndee iní-dé, te cúñaha tùcu-ndo xii té Èstaquis sǎ ná càda ndee iní-dé chi tnàhá-dé ío ñùhu iní-í-dé.

<sup>10</sup> Te cúñaha tùcu-ndo xii té Àpelés sǎ ïo na càda ndee iní-dé, chi téé-á<sup>n</sup> ïo váha cùndáá-dé núú Xítóhó Jesucrístú, te cúñaha tùcu-ndo xii ñáyíu xǐndecu vehe té Aristóbulú sǎ ïo na càda ndee iní-yu.

<sup>11</sup> Te cúñaha-ndo xii té Heròdión téé cùu ndí mee-í sǎ ïo na càda ndee iní-dé, te cúñaha-ndo xii ñáyíu ndècu ichi Xítóhó Jesucrístú xǐndecu vehe té Nàrcisú sǎ ïo na càda ndee iní-yu.

<sup>12</sup> Te cúñaha-ndo xii tnàhá tá Trifená ndíhi tá Trifosá sǎ ïo na càda ndee iní-yu, chi tnàhá-yu quidé-yu chiú<sup>n</sup> Xítóhó Jesucrístú. Te tnàhá tá Pěrsidá xíchí ndécú ndíhi-o ichi Xítóhó Jesucrístú cúñaha-ndo xii-xi sǎ ïo na càda ndee iní-xi, chi tnàhá-xi ío ndècu ndee-xi quide-xi chiú<sup>n</sup> Xítóhó Jesucrístú.

<sup>13</sup> Te cúñaha-ndo tnàhá té Rǔfú téé ío váha sándáá iní tnúhu Xítóhó Jesucrístú sǎ ïo na càda ndee iní-dé ndíhi nǎná-dě, chi ñaha-á<sup>n</sup> quidé iní-í sǎ cúú-á<sup>n</sup> dàtná nǎná-í.

<sup>14</sup> Te cúñaha-ndo sǎ ïo na càda ndee iní té Àsíncritú, ndíhi té Flègonté, ndíhi té Hěrmás, ndíhi té Pàtrobás, ndíhi té Hěrmés, ndíhi nchaa dava-gá

cue ñáyiú ndècu ndihí-o ichi Xítóhó Jesucristú xĩndecu ndihí-güedé.

15 Te cúñaha tùcu-ndo sá ïo na càda ndee iní té Filólogo, ndihí tá Jüliá, ndihí té Nèréú, ndihí cúha té Nèréú, ndihí tá Òлимпás, ndihí nchaa dava-gá ñáyiú sàndáá iní tnúhu Xítóhó Jesucristú xĩndecu ndihí-yu.

16 Te ío yĩñùhu cada ndee iní tnáhá-ndó ìñ ìñ-ndo. Te nchaa ñáyiú tàcá nchaa iha dàcuaha tnúhu Xítóhó Jesucristú quidé ndèe iní ñáhã-yu xii-ndo.

17 Te nchòhó ñáyiú ndècu ndihí-í ichi Xítóhó Jesucristú càhá<sup>n</sup>-í dóho-ndo sã cádá cuendá-ndó nũu ío ñáyiú quide nacuaá vá cúú ìñ<sup>n</sup>nuu-ndo cun-decu-ndo, chi ñáyiú-án sánú ichi ñahá-yu ìñ<sup>n</sup> ichi ñá túú vãha, chi ñá túú ìñ<sup>n</sup>-ni cuu-xi tnúhu càhá<sup>n</sup>-yu ndihí tnúhu sá ñĩ níhí-ndó ndècu ndihí-ndo, te ñáyiú duca<sup>n</sup> xĩquide vá ñihí tnáhá-gã-ndó ndihí-yu.

18 Chi ñáyiú-án ñà túú quidé-yu chiu<sup>n</sup> sá cúú-xí Xítóhó Jesucristú, chi mee-ni sã cúú-xí mèé-yu quidé-yu, te mee-ni nchàa tnúhu sá ïo vii ío váha cuáhá<sup>n</sup> càhá<sup>n</sup>-yu òré cuáhá<sup>n</sup>-yu dándahú-yu nchaa ñáyiú ío yáchí sàndáá iní-xi ìñ<sup>n</sup> tnúhu.

19 Te nchaa ñáyiú ñihí-yu tnúhu sá nchòhó sàndáá iní-ndó tnũhu Xítóhó Jesucristú, núu xiã<sup>n</sup> ío cùdí<sup>n</sup> iní-í. Te cuiní-í sá nchòhó ío váha cutnùní iní-ndó nàcuáa cada-ndo mèe-ni sá vãha, te vá cání iní-ndó càda-ndo datná xĩquide nchaa ñáyiú ndècu ichi cuehé ichi duha.

20 Te Yá Ndióxi Yaá quidé ïo váha cùu iní-ó ndècu-o ío ndihí cada-gá cuendá sá sàcuíhná ñà túú-gã ná cada ñaha-xi xii-ndo, te xicá<sup>n</sup> táhù-í núú



Xítohó Jesucrìstú sá ïo na chìndee chitúu ñaha-gă xii-ndo.

<sup>21</sup> Te té Timùteú tée quìde ndìhi-í chù<sup>n</sup> Xítohó Jesucrìstú iha quìde ndee iní ñáhá-dě xii-ndo, te tnàhá té Lùciú, ndìhi té Jàsón, ndìhi té Sosipàtér cue tée cùu ndì mee-í quidé ndèe iní ñáhá-güedě xii-ndo.

<sup>22</sup> Te tnàhá yúhú té Tèrciú tée càdúha tutú-a cuèndá té Păblú quidé ndèe iní ñáhà-í xii-ndo, chi ì<sup>n</sup>-ni cùu-o ndìhi Xítohó Jesucrìstú.

<sup>23</sup> Te tnàhá té Găyú tée dii vèhe-xi ndecu-í quidé ndèe iní ñáhá-dě xii-ndo, te diu-dé ní taxi nùu-dé vehe tàcá ñáyiu dàcuahá-yu tnúhu Xítohó Jesucrìstú. Te tnàhá té Èrastú tée yìndaha díhú<sup>n</sup> ñùú quidé ndèe iní ñáhá-dě xii-ndo, te tnàhá té Cuărtú tée ndècu ndìhi-o ichi Xítohó Jesucrìstú quidé ndèe iní ñáhá-dě xii-ndo.

<sup>24</sup> Te xìcá<sup>n</sup> táhù-í núú Xítohó Jesucrìstú sá ïo na chìndee chitúu ñaha-gă xii-ndo nchàa-ndo. Te duca<sup>n</sup> na cùnduu.

### *Cáhá<sup>n</sup>-ó sǎ ïo cǎhnu cuu Yá Ndiǒxí*

<sup>25</sup> Te vitna chí ná cǎchí-ó sǎ ïo cǎhnu cuu Yá Ndiǒxí, chi mee-gă cada te ío-gá cuita níhí ndéé-gǎ-ndó cùndecu-ndo ichi Xítohó Jesucrìstú dàtná cǎchí tnúhu sá cǎhá<sup>n</sup> nàcuáa naníhí tǎhú-ó, tnúhu sá dánèhé-í ñáyiu cuèndá Xítohó Jesucrìstú, te nchaa tnúhu-a ì<sup>n</sup>-ni cùu-xi ndìhi nchaa tnúhu sá ní cachí Yá Ndiǒxí cuu yuhu ndéé cùtnàhá ní ngáva ñuyíú, te vitna ní quee túu-xi,

<sup>26</sup> chi mee Yá Ndiǒxí ní dátũu-gá núú-ó vitna, te cǎhá<sup>n</sup>-ndí nàcuáa ní chídó tnùnì cue tée ní xóo cǎhá<sup>n</sup> tnúhu Yá Ndiǒxí ndéé sanaha. Te duca<sup>n</sup> tnũhu sá ndúú yùhu ní cuu ta xíté nuu-xi ñìhì ñuyíú cuǎhá<sup>n</sup>,

chi duca<sup>n</sup> ñ cachí Yă Ndiöxí Yaá ndécú nchàa nduu  
nchaa quíú cunduu cuendá sá quìndáá iní ñáhá  
ñăyiu xii-gá, te tñí-yu nchaa tnúhu càhá<sup>n</sup>-gá.

<sup>27</sup> ;Te ñ<sup>n</sup>dì-ni Yá Ndiöxí cúú-gă Yaá ío sàá sá  
xìní tnùnì-xi! ;Te nchaa-o chǐ ná càchí-ó sǎ ïo  
càhnu cuu-gá, chi ndècu ndìhi-o Xítóhó Jesucrìstú,  
te duca<sup>n</sup>-ni càda-o ñi caa ñi quíhí<sup>n</sup>! Te duca<sup>n</sup> na  
cùnduu. Te ío chí cádá ndèe iní-ñă vitna.

**Tnúhu ní cáhá<sup>n</sup> yǎ ndiǒxí xito cùu uú**  
**New Testament in Mixtec, Peñoles (MX:mil:Mixtec,**  
**Peñoles)**

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

**Copyright Information**

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Peñoles

**© 2002, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

872f7754-0986-5ecd-a059-925a708a6939